

د. مها سامي

الهاشم

DIVORCED



مكتبة فريق_متميزون)
لتحويل الكتب النادرة الى صيغة نصية
قام بالتحويل لهذا الكتاب:



كلمه مهمة: هذا العمل هو بمثابة خدمة حصريه للمكفوفين، من منطلق حرص الجميع على تقديم ما أمكن من دعم للإنسان الكفيف، الذي يحتاج أكثر من غيره للدعم الاجتماعي والعلمي والتقني بحيث تعينه خدماتنا هذه على ممارسة حياته باستقلالية وراحة، وتعزز لديه الثقة بالنفس والاندماج بالمجتمع بشكل طبيعي.

وبسبب شح الخدمات المتوفرة للمكفوفين حرصنا على توفير خدمات نوعية تساعد الكفيف في المجالات التعليمية العلمية والثقافية وذلك بتسخير ما يتوفر من تقنيات خاصة لتحويل الكتب الي نصوص تكون بين أيديهم بشكل مجاني، ويمكن لبرامج القراءة الخاصة بالمكفوفين قراءتها.

مع تحيات: فريق (متميزون) انضم الى الجروب

[انضم الى القناة](#)

divorced الهانم

د. مها سامي

عن الكتاب..

- إلا قوليلي، انتي فسختي الخطوبة؟
- ما اسمهاش كدا، اسمها فركشت!
- وخطيبك عامل ايه دلوقت، ومين هون عليه الوقت؟
- اسمه الإكس، وبعدين خلاص، هو دمرني وعاش حياته!
- وانتي يا اللي هناك مطلقة؟
- اسمها divorced! كلمة مطلقة شكلها ست واقعة من فوق السطوح، أمهاتي في نفسها كدا، إنما divorced تديكي إحساس بال- strong independent woman!
- والمدام؟ جوزك سافر وسابلك العيال، ولا متوفي، ولا عايش معاكي بس كبير دماغه وشيلك الشيلة؟
- أولاً انفصلت، ثانيًا اسمها single mom! ثالثًا أنا شكلي لبست في حياطة!
- طيب طيب خلاص، المهم إن كلنا مشتركين في إننا بقينا سناجل، بغض النظر عن المسميات اللي بتتقال علينا وبتضايقنا.. لكن احنا اللي هنعط لكل مسمى معنى مختلف تمامًا عن اللي الناس مقتنعة به بقالهم سنين، وكمان هنعنعمهم به.. وهنخليهم كمان يحسدونا إننا حصلتنا أزمة في وقت ما.. هنكتشف سوا ازاي نخرج من سجن الماضي ونظبط الحاضر ونخطط صح للمستقبل.. كووول دا واحنا على وضعنا.. مفاجأة مش كدا؟!

oo oo oo oo oo



إهداء ..

هذا الكتاب إهداء لأمي، اللي لولاها ماكنتش خطيت خطوة واحدة في اتجاه أحلامي.. فهي من مَن ربنا وأهم عطاياه لمساندتي في رحلتي بعد الطلاق..

إهداء لوالدي، اللي أغلب الكلمات التي ذكرتها في كتابي هي كلماته، والقيم والمبادئ اللي زرعتها فينا لسنين..

إهداء لأخويا أحمد، اللي كان ومازال الدعم والسند والكلمات الإيجابية والتشجيع الدائم..

إهداء لأخويا مصطفى، اللي زهقته في عيشته عشان يراجع كل كام سطر أكتبهم، لما كان هيهرب ويسيب البلد..

وأكثر حد باهديله نجاحي كله، مش كتابي بس، هو خالي أحمد، اللي اتعلمت منه أشوف الأحلام وأصدقها وأحققها..

وأخيرًا باهديه لآخواتي البنات، اللي سمحولي أنقل تجاربهم وقصصهم الواقعية في كتابي، وكل أخواتنا البنات في كل الوطن العربي، سواء كانوا مطلقات أو أرامل.. متزوجات أو لاء..

∞ ∞ ∞ ∞ ∞



تقديم..

الهانم مها سامي..

بعثتلي بروفة الكتاب ده قبل ما تطبعه، وقالتي الله يكرمك يا بوب؛ اكتبلي كلمتين حلوين كده أحطهم مقدمة، وبالمره قول إن الكتاب حلو وتحفة وكده يعني..

أنا طبعا الكلام استفزني وقلت ايه التهريج ده!! ازاي حد يملي عليا أقول ايه وما أقولش ايه؟! طب الكتاب مش حلو من قبل ما أقرأه، واللي يزعل يزعل! لكن سبحان الله.. لسه بقلب في الصفحات أقوم ألاقي ايه؟ ظرف فيه ٥٠٠ جنيه! أيوة بقى، والله محتاجين النوع ده من الكتب، كتاب حلو ورائع وتحفة كمان، كفاية قوي إن صاحبتة بتقدر الناس كده!

ده طبعا كان موقفي قبل ما اقرا الكتاب، والكلمتين التهريج المعتادين بتوعي. لكن الحقيقة اللي بتمليها عليا أمانتي ككاتب بحترم الجمهور؛ إن الكتاب تجربة إنسانية أكثر من رائعة، ماكانش ينفع يقدمها غير مها سامي، البنوتة الزوجة المطلقة اللايف كوتش الدكتورة.. إنسانة عاشت في سنين بسيطة كل التجارب الإنسانية بحلوها ومرها.

الهانم ديفورسد..

كتاب بيعلمنا ازاي نبتدي حياتنا من جديد، مهما كانت التجربة المريرة اللي عشناها.. ازاي نتخلص من أثارها جونا ونحوّل الهزيمة لنصر، ازاي نتحدى أحزاننا ونبتسم فى وشها بمنتهى السخرية والثقة..

بجد لازم تقروه، علشان تستمتعوا بعمق المعلومة وبساطة الصياغة وخفة دم الكاتبة الفخر دي..

إيهاب معوض

∞ ∞ ∞ ∞ ∞



المقدمة

في مجتمعنا.. كلنا محطوطيين جوة صندوق، الصندوق هو صندوق «العاهات» والتقاليد البالية، اللي بغض النظر عن مخالفتها للدين فهي لازم تنطبق لأنها ببساطة بتوافق العرف..

أي واحدة ست بلا زوج لازم تعيش حياة تعيسة في مجتمع بيرفض الاختلاف، وبيطاردها كل يوم في تقييد حريتها المشروعة، ودا لأن عادات وتقاليد المجتمع اللي سبحان الله إحنا اللي فرضناها على نفسنا بتحطنا جوة نفس القالب، القالب ببساطة مجموعة مراحل لازم كلنا نعدي عليها، وهي مراحل تطور الإنسان المصري وفقا لعاداتنا وتقاليدنا حتى الآن وهو العام ٢٠١٨.

(معلش لازم أوثق المخطوطة بتاعتي عشان لو انقرضنا ولا حاجة ولقوها ناس من المستقبل)

المراحل:

1. طفل رضيع تخين لازم يخس ولو رفيع لازم يتخن.
 2. ولد أو بنت شطورة في المدرسة، ولازمَن وحتما ولا بد ولا مفر يطلع الأول.
 3. مراهق في الثانوية العامة ولازم يحصل على مجموع يؤهله لكليتين بس، الطب أو الهندسة، وما دونهما غير مقري وغير معترف بيه إلا عند قلة من المثقفين.
 4. هنا بنفترق بقى، بعد ما بنتخرج، الولد عن البنت.
 - الولد لازم يشتغل ويقبض مرتب معتبر عشان وهو بيتجوز يقدر يجيب النيش والذي منه.
 - البنت لازم تشقظ أي عريس وتنسى التفكير في أي حاجة، وإلا تبقى غريبة، وبالنسبة لهم أي نجاح في شغل أو أي مجال غير الجواز، مهما كان، غير مقري.
- الحمد لله شقظنا العريس واتجوزنا والولد جاب النيش والشبكة..
5. لازم نخلف طبعاً، هي دي محتاجة فقاقة؟ ولو اتأخرنا هتبقى مشكلة..
إيبيه، مفيش حاجة جاية في السكة؟ خلفنا بنت؟ إيه، مش هتجيبوا الولد اللي يشيل اسم أبوه؟

6. العيال لازم يمشوا على نفس الخطى، وكله تحت بند واحد ألا وهو: هذا ما وجدنا عليه آباءنا وأجدادنا، والويل كل الويل لمن تسول له نفسه بإرادته أو بغير إرادته أن يشذ عن هذه القاعدة، لأننا ببساطة لازم نكون نسخ من بعض.

هنا في الكتاب هنا نقش قضية ناس شذوا عن قاعدة من القواعد، بإرادتهم أو غصب عنهم، وهي إن البنت تكون من غير زوج، اللي بتتعرض لجميع الضغوط المنطقية واللا منطقية، لأنها ببساطة، من غير راجل، وصل الراجل ولا ضل الحيطه، ونظرا لأنها يا ولداه جوة الصندوق فبتفضل تفكر وفكرها يدور في نفس الحلقة المفرغة، وهي:

إن الزوج هو الحل للخروج من الأزمة أو الصندوق مش فارقة، للهروب من الضغوط حوالها، وبالرغم من إن - حسب الإحصائيات الأخيرة - عدد المطلقات بس وصل تقريبا ٣ مليون مطلقة، ومصر أصبحت الأولى عالميا في ارتفاع معدلات الطلاق بعد ما زادت النسبة في الخمسين سنة الأخيرة من ٧٪ وصلت ٤٠٪، إلا إن لسة ما حدش وصل إزاي نحل الأزمة عشان نقلل النسبة ولا حتى إزاي أي ست من غير زوج تتعايش بشكل طبيعي.

السؤال هنا:

يا ترى كام واحدة قررت تخرج برة الصندوق بجد، وقررت تعيد صياغة حياتها بالتفكير بشكل مختلف، برة فكرة إن الزوج هو الحل، ويا ترى كام واحدة نجحت، وكام واحدة صبرت لحد ما عرفت تغير نفسها عشان الدنيا تتغير حوالها؟ «إن الله لا يغير ما يقوم حتى يغيروا ما بأنفسهم».

وكام واحدة عرفت تجاوب على السؤالين اللي ببيجوا في بال أي واحدة مطلقة أو تأخرت في الزواج؟ (مابحش كلمة عانس) أو حتى فقدت الزوج بالوفاة (الأرملة).

السؤالين هما:

السؤال الأول:

أنا ماليش زوج ليه؟ هو أنا وحشة ولا إيه؟

والسؤال الثاني:

أنا هعمل إيه؟ أنا ضعت ولا إيه؟

لو كنتي لقيتي إجابة على السؤالين دول فبرافو عليك، إنتي من الناس اللي عرفوا يخرجوا برة الصندوق، ولو كنتي مالمقتيش، يبقى خشي في حزن أختك.. وأنا هقولك.

في الكتاب هنا، هنعيش مع شخصيات احتمال تلاقي نفسك في واحدة منهم..
هتجاوب على أسئلتهم اللي أكيد هتكون زي أسئلتك، وهنسألهم أسئلة
هتجاوبي عليها زيهم، أنا واثقة ومتأكدة إن هيكون فيه حاجات مشتركة كتير
بينك وبينهم، هنشوف مين دول وخرجوا من مشاكلهم إزاي.

الكتاب في شكل قصصي، بس في الحقيقة هو زي دليل لكل واحدة اتعرضت
لأزمة عدم وجود الزوج في مجتمعنا، يلا.. كوابية نسكافية وورقة وقلم وماركر
وتعالى.

∞ ∞ ∞ ∞ ∞



البداية

بس يا ستي

وراحت قايلالي وهي بتزقق: نظام شغلك وتأخيرك لحد الساعة تسعة بالليل دا ماينفعنيش، لازم تفهمي إنك مطلقة، وأم إسماعيل البوابة وجوزها عمو البواب وطنت جولفدان جارتنا وأونكل طلعت اللي في الدور الرابع وطنط كايداهم اللي في آخر الشارع، وجيران الجيران، والقارة المجاورة، وسكان المريخ والمجرة، قاعدين باصين عليكي وعلى تصرفاتك، الست المطلقة لازم تعرف حدودها عشان ماحدث يتكلم عليها نص كلمة.

بيني وبينك يا ريهام، أنا زهقت خالص من العيشة دي، والموال الحمضان اللي قايمة نايمة فيه، والمصيبة إني كل ما أقابل واحدة من صاحباتي المطلقات، أو حتى اللي أتأخرت شوية في الجواز ولا جوزها مات، ألاقها بتعاني الأمرين..

هزت رأسها في أسي:

معلش يا مها هتعملي إيه بس.. ماهي مامتك برضه.. آدي الله وآدي حكمته.. إنتي يعني هتقدري تغيري الواقع؟ دا أنا بابا لحد دلوقت بيطاردني باهتمامه الزايد، حُديه على إنه حب واهتمام وحاولي تنتزعي حريتك بالطريقة.

لمعت عيناي ونظرت لريهام بإعجاب:

- هو دا.. هغير الواقع.

- وهتغيره إزاي يا فالحة؟

قلت بحماس:

- هعمل جمعية نسائية بتضم كل الستات اللي نفسهم يغيروا الواقع، ونفرض على المجتمع كله إننا نمشي بالدين بدل العرف.

وبعد هذه الجملة تحديدا انفجرت ريهام في الضحك، وقالت وهي تحاول أن تتمالك نفسها:

جمعية إيه بس يا بنتي، دي حاجة قديمة قوي يعني، ماتزعليش مني، دي آخر جمعية سمعت عنها الرابطة الزراعية لحل مشاكل البطاطس والملوخية، والكلام دا كان في التمانينات باين، يا ماما دلوقت الدنيا اتغيرت، وجروبات الفيس والواتس مالية الدنيا.

شربت آخر رشفة من فنجان القهوة، وقلت وأنا أهم بالانصراف:
- بصي، النهارده إنتي قلتي درر، الواقع، وإن الزمن اتغير، أنا لازم أمشي.
قالت لي وهي تمسك يدي بقوة: لا، ما أنا لازم أفهم.
- هقولك بعدين، سلام دلوقتي.

ضربت ربهام كفا بكف، وهزت رأسها وهي بتعمل «مسم» بشفايفها
(بتممص شفايفها): يا عيني عليك يا مها، البت اتجننت باين.
يوه، نسيت أعرفكم بنفسي:

أنا مها سامي، مصرية عندي ٣٣ سنة، اتطلقت من سبع سنين، وطبعا لو لم
أكن مصرية لوددت أن أكون أمريكانية، عشان لما أتطلق أخذ نص ثروته
وأخرب بيته، وربنا يقدرنا على فعل الخير.

اتربيت تربية مغلقة جدا، وكنت من البيت للمدرسة ومن المدرسة للبيت، أيام
الدراسة كنت كأي بنت دحيحة، أو الغالب.. بقمط الحجاب ولبس نضارة كعب
كوباية.. بحب المذاكرة حب الحرامي للفلوس، ودا مش عشان المذاكرة في
حد ذاتها، ولكن لأنني طول عمري عنيدة وبعشق التحديات.. وماما ما شاء
الله عليها كانت دايمًا تخلق لي تحديات من نوع خاص.. زي إوعي تجيبي
مجموع أقل من ابن طنط نحمده.. ولا بنت طنط رسمية.. وفي خضم
التحديات الرهيبة دي ماكانش عندي وقت أتعامل نهائيا مع الجنس الآخر، ولا
كان عندي أصلا الرغبة في دا..

كان دايمًا عندي هدف أجيب ٩٩.٩٩٩٩٩ في المية، وخصوصا في الثانوية
العامة.. ولو كنت قابلتني ساعتها وسألتني عن السبب! كنت هقولك بمنتهى
الاعتزاز: عشان أنتصر على بنت طنط رسمية..

إنت بتسأل أسئلة غير منطقية الصراحة، من إمتي وإحنا بنسأل الأسئلة دي،
هذا ما وجدنا عليه آباءنا وأجدادنا، إن الناس لازم تخش كليات العِمة، قصدي
القمة..

عشان....

عشان.....

هو السؤال دا إجباري؟!

هاهاهاها.. بهزر طبعا، عشان من تقاليد المجتمع إن الدنيا بس مهندس
ودكتور، مبدأ إن كل واحد يعمل اللي بيحبه وينجح فيه مش موجود أصلا.

نفسى، لكن هديكو نبذة مختصرة خلال الكتاب عن شوية أحداث بسيطة قبل وبعد الطلاق.

طبعا كان نتاج الجواز دا ٣ أولاد، وأنا شلت مسؤوليتهم، واللى هيسألني طب ليه جبتي ٣ أولاد طالما كنتي حاسة إنها علاقه فاشلة، هقوله عيب بقى متخرجنيش أكثر من كدا، الإجابة معروفة: هذا ما وجدنا عليه آباءنا وأجدادنا. أصل جبت بنت قالولي عقبال ما تجيبي الولد، ولما جبت الولد قالولي.. لأ مقالوش الصراحة، التالت جه غلطة!

ولو سألتني ليه قعدتي معاه كل السنين دي؟!

الإجابة ببساطة إنني كنت جوة الصندوق، وهنا يحضرني مشهد محمود المليجي في فيلم الأرض، لما كان يتسحل في سبيل هدف سامي وهو التمسك بالأرض، أنا بقى كنت بتسحل خوف من المجتمع ومن الطلاق رغم انهيار العلاقة على كل المستويات، وفي يوم من ذات الأيام قررت أقوم من على الأرض، وقطعت التريون بتاع محمود المليجي (كان وشه فقر عليه)، وأخذت قرار الطلاق.

وبعد الطلاق أخذت ثاني قرار صح في حياتي، وهو أنني أعمل كارير شيفت، وأعمل الحاجة اللي بحبها، مجال التجميل، فتحت بيوتي سنتر، والحمد لله نجحت جدا.

أوعدكم إنني هكون بطلة قصة من القصص اللي في الكتاب، وهسيب مجال لخيال القارئ يخمن أنا مين.. أو يمكن ماتخمنوش لأنها للأسف قصة بتتكرر كل يوم وكل ساعة.

الآنسة اللي هناك بتسأل سؤال حلو أوي.. هو إنتي فعلا هتعملي جمعية بجد؟! ممكن هعمل، وممكن لأ، ممكن يبقى واقع واحتمال يكون خيال، بس مش دا المهم، المهم الهدف اللي عاوزين نوصله، وهو التغيير.

تغيير نفسنا

تغيير مجتمعنا

تغيير عاداتنا وتقاليدنا اللي كثير منها مغلوط

وأولها إننا نتقبل الاختلاف...

مها سامي



الفصل الأول: وشوشة أم أحمد

الخوف يجعل الناس أكثر حذرا.. وأكثر طاعة.. وأكثر عبودية.

سقراط

خرجت من عند صديقتي ريهام وكان يدور ببالي الآتي:

هل يا ترى تغيير المجتمع أشبه برابع المستحيلات؟ يا ترى ممكن أغير مسار المجتمع كله في جزئية عدم وجود الزوج في حياة المرأة المصرية وتقبلها هي شخصيا لهذا الأمر، وتقبل المجتمع للطرفين أيا كانوا راجل أو امرأة، في حالة عدم استمرار الزواج، ومن غير إلقاء اللوم على أي من الطرفين، أو تحميله سبب عدم نجاح العلاقة؟

وأفقت من شرودي فجأة على صوت الموبايل، ندى مساعدي في السنتر:
- ألو.

- أيوه يا دكتور، شفتي أم احمد مرات دسوقي بواب العمارة؟ ضربها وطلع عينها والناس اتلمت وكان حوار، هو حضرتك جاية إمتى؟
- حالا يا ندى، خمس دقائق وهكون عندك.

وصلت السنتر، ورميت نفسي على كرسي المكتب، كنت في قمة الاكتئاب، جلست أفكر في دسوقي وزوجته، يا ترى مين فيهم غلطان؟ أكيد كل طرف منهم عليه جزء من الخطأ، والفضول جعلني أقرر أن أستمع للمشكلة لمعرفة من المخطئ.

طلبت من ندى أن تخبر أم أحمد أنني أود مقابلتها.

دخلت المكتب وأنا واقفة أنظر إليها في ذهول، حاولت أن أسلم عليها ولكن لم أجد للأسف في وجهها مكانا واحدا خاليا من آثار معركتها الدامية مع زوجها، كان مغطى تماما بالكدمات كلوحة رسمها أحد الفنانين التشكيليين، إذ تظهر البراعة في اختيار أماكن كل تفصيلة، مع الحفاظ على الأبعاد.

ابتسمت في محاولة مني لتخفيف وطأة الموقف، وقلت لها:

- خير، إيه اللي حصل؟

ضحكت بأسى:

- الضرب للجدعان يا ضاكتورة، والسبت منا مالهاش غير بيتها وجوزها،
ودسوقي غلبان والله، هو بس عصبي حبتين.

- إمممم.. شكلك بتحبيه.

قالت بعدما احتل الحزن كل ملامحها:

- أومال، مش جوزي وأبو عيالي!

اقتربت مني وقالت بصوت أقرب للوشوشة:

- أهو ضل راجل ولا ضل حيطة، يعني هتطلق وأروح فين بكوم اللحم اللي
عندي؟ ماחדش ببشيل حد، أهو بيصرف علينا، وعدم اللامؤاخذة جزمة
الراجل قدام باب البيت بتعمل للسبت وللبيت ألف حساب.

- نظرت إلى عينيها مباشرة:

هنفترض إننا وفرنا الفلوس، وقطعنا لسان الناس عنك، دا مجرد افتراض.

سرحت:

- أكيد هحتاج راجل أنام في حضنه بالليل يا ضاكتورة.

قمت لأسلم عليها:

- معلش عطلتك كنت عاوزه اتطمئن عليكى.. عاوزه مني أي حاجة؟

- سألت عليكى العافية يا ضاكتورة، عاوزه بس طلب واحد، خصيمك النبي
ماتجيبش سيرة لدسوقي إنني حكيت معاكى.

- ماتخافيش، مش هجيبله سيرة خالص.

ناديت على مساعدتي وطلبت منها كوبا من القهوة، أحضرت القهوة وجلست
أمامي، كنت أنظر إلى السقف وحل الصمت على المكان، حتى كسرت هي
حاجز الصمت قائلة:

- شفتي أم أحمد؟ هو أنا اتعقدت من الجواز من شوية! كل الستات متبهدين.

- كلهم؟!

- آه كلهم.

وصاحباتي، اللي اتجوزت ومش مرتاحة، واللي اتطلقت، واللي اتعقدت
بسبب الاتنين.

- إنتي لسة صغيرة يا ندى ماتديش حكم عام، اتعلمي ماتديش أحكام عامة بسبب شوية تجارب شفيتها من خلال خريطتك الذهنية.

قوليلي يا نودي، إيه رأيك لو عملنا جمعية نسائية، ونشوف تجارب أكبر عدد ممكن من الستات عن قرب.

- ابتسمت ولمعت عيناها:

فكرة تحفة، بس هنعملها إزاي وليه؟

- بصي:

هنعملها ليه؟ عشان نساعد أي ست عايشة في مجتمعنا من غير زوج إنها تعيش حياة عادية.. ونساعد المطلقات ونفهم سبب مشاكلهم ونعالجها من جذرها، ونعدل فكرة المجتمع تجاه إنه يتم تقييم الست كإنسان أيا كان وضعها الاجتماعي.

- إزاي؟

- اسمعيني كويس.

وفي اليوم التالي..

المشهد كالآتي:

ندى تقف في طابور في جريدة الوسيط، تمسك في يدها قصاصة ورق مكتوب فيها الإعلان الذي سيتم نشره، كانت تتصبب عرقا وتحاول إخفاء الارتباك الذي بدا ظاهرا وبشدة، وتقدم رجلاً وتؤخر الأخرى، ولسان حالها يقول:

الله يخربيت اليوم اللي اشتغلت فيه مع دكتور مها.

تقدمت للموظف بخطوات حاولت أن تبدو واثقة.

- من فضلك عاوزه أنزل الإعلان دا في جريدة يوم الجمعة والجريدة الإلكترونية، وعاوزاه واضح وبخط عريض.

نظر الرجل للورقة بتركيز، فقد كان محتواها:

*** نبحث عن متطوعات ومتطوعين لجمعية.. الغرض منها تغيير نظرة المجتمع للمرأة عموماً، وكل امرأة بلا زوج خصوصاً، للاستعلام برجاء الاتصال برقم (.....)

انفجر الموظف في الضحك بعدما انتهى من قراءة الإعلان، وما كان منه غير أن أذعن لطلبها وأعطائها الوصل.
وفي هذه الأثناء..

أنا وربهام كنا في جولة شوبنج في المول، وحكيت لها ما حدث مع مرات دسوقي البواب، بعدما أنصتت للقصة باهتمام، سكتت برهة ثم قالت:

- إنتي حللتي كلام الست دي؟

- آه طبعا حللت كلامها، الست دي بكلامها البسيط العفوي لخصت سبب تمسك ستات كثير بمنظومة البيت مهما كانت فاشلة، ودا بسبب إنها الخاسر الأكبر بعد الطلاق أو فقدان الزوج ومنظومة الجواز عموما.
- صح.

- اسمعي:

الست لما قالت أهو أبو عيالي، المعنى الخفي للكلمة دي عاطفة الأمومة وخوفها على ولادها من المجهول.

ولما قالت أهو يبصرف علينا: تقصد إنه محققها الدعم المادي، أما كلمة أصل الناس بتعمل للبيت اللي فيه راجل ألف حساب فهنا تقصد المجتمع وخوفها من نظرة المجتمع، ولما قتلها ولو كل دا ما بقاش منه خوف، قالت من دون تردد أنا محتاجة حزن جوزي، وهنا دا احتياج الست الفطري للعاطفة، أما بقى كلمة ضل راجل ولا ضل حيلة، فدا الأمان.. يبقى لو لخصنا احتياجات الست من الراجل هنلاقيهم:

1. العاطفة والأمان

2. الدعم المادي

3. المجتمع

4. احتياجها ليه كأب وخوفها على ولادها.

نظرت إليّ بإعجاب ثم أردفت قائلة:

- كلامك فعلا سليم يا مها، بس أكيد مش كل الستات زي أم أحمد.

- أكيد نسب الاحتياجات هتختلف من واحدة للتانية حسب وضعها الاجتماعي وحاجات تانية كثير، بس في اعتقادي دي الاحتياجات الرئيسية.

- عارفة إحنا محتاجين إيه عشان نتأكد؟! نعرف عدد أكبر من مشاكل ستات تانية.

ضحكت بخبث:

- عيب عليك يا باشا، الإعلان عن الجمعية اللي قلتك عليها زمانه نزل في الوسيط وهنولعها.

- آه يا مجنونة لما بتحطي حاجة في دماغك، احكي لي التفاصيل وقولي لي المقر هيكون فين يا فالحة.

- عندي في سنتر التجميل بتاعي، ما انتي عارفة المكان كبير وعندي أماكن كتير فاضية، وهقولك التفاصيل حالا بس بعد ما تعزميني على آيس كريم.

∞ ∞ ∞ ∞ ∞



الفصل الثاني: المشكله الأولى: المجتمع

(أنا والمجتمع وهوأك)

«إذا كنت لا تخاف مما سوف يقوله الناس فأنت قد اجتزت الخطوة الأولى للنجاح»
باولو كويلو.

دخلت ندى المكتب وقد تهللت أساريرها، وقالت بصوت تملؤه الحماسة:

- مش ممكن يا دكتور، مش ملاحقين على الاتصالات، ناس كتير حاسين إن الفكرة مجنونة، وحب الاستطلاع مخليهم حابين يبجوا يتعرفوا على فكر الجمعية عن قرب وبأسرع وقت.

ارتسمت على وجهي علامات الارتياح:

- الحمد لله، أنا كنت متوقعة، قوليلي بقى الاتصالات من ستات ولا من رجالة؟

- يوووووه، من الاتنين وأنا سجلت كل الأرقام وقلتلهم هنرتب مواعيد قريب.

هنا تدخلت ملك مساعدي الثانية في الحوار قائلة:

- طب وأنا إيه دوري في الحوار دا؟

- دورك تسجيل أسماء كل الناس اللي هنقابلهم، وهنفلتر منهم فريق الجمعية والعضوات.

قالت ملك بتشكك:

- مش عارفة الجمعية دي هتنفع ولا لأ، خاصة بعد حوار جروبات الفيس والواتساب اللي مالية الدنيا.

ردت ندى:

- لا طبعا، الحاجات دي على أرض الواقع بتكون أنجح بكثير، وبعدين أدينا هنجرب مش هنخسر حاجة، ومش هننسى السوشيال ميديا طبعا وإحنا شغالين، أنا حطيت إعلان على الفيس بوك كمان.

رن الموبايل فحل الصمت في المكان، ردت ندى وبدا على وجهها الاهتمام:

- تمام يا فندم.

.....

- حاضر هسجل اسم حضرتك.

.....

- نعم؟ موعد النهارده ضروري؟! طيب لحظة من فضلك.

نظرت لي وشاورت لي باستفهام وقالت بصوت منخفض:

- واحدة اسمها مدام سالي.. مصممة تيجي تقابلك النهارده.

- استغربت الإصرار الشديد، ودون تردد:

- خليها تتفضل طبعاً.

- اتفضلي يا فندم، نورينا النهارده الساعة ٢ الظهر إن شاء الله، العنوان:

«.....».

أنهت ندى المكالمة ونظرت إلينا بتشكك قائلة:

- غريبة أوي الست دي، إيه سر الاستعجال؟

ردت ملك:

- يا خبر النهارده بفلوس بكرة يبقى ببلاش.

وفي تمام الثانية ظهراً..

وقف ثلاثتنا في شرفة السنتر المطل على الشارع من باب الفضول، وقفت سيارة فارهة أمام باب العمارة مباشرة، ونزلت منها سيدة آية في الجمال، حين رأيتهما تذكرت وصف نبيل فاروق لسونيا جراهام في سلسلة رجل المستحيل.

«المزة» كما يجب أن تكون، تتمتع بقوام ممشوق وخصر نحيل وينسدل شعرها الذهبي الناعم على كتفيها، كانت تمشي بخيلاء كما يمشي الطاووس، وبينما كنا نطالع المشهد وفتحت كل واحدة منا فاهها ببلاهة، رن جرس الباب، دخلت مسرعة إلى مكتبي حفاظاً على بريستيجي، ولم أنس بالطبع غلق فمي المفتوح.

وما هي إلا لحظات حتى طرقت ندى باب المكتب ونظرت إليّ ببلاهة، ويبدو أنها نسيت أن تغلق فمها من فرط الانبهار، وقالت بتلعثم:

- مدام سالي اللي اتصلت وطلبت تقابل حضرتك بسرعة، ومعادها دلوقتي.

دخلت السيدة الجميلة الغرفة على مهل، فوقفت وانحنيت لها انحناءة خفيفة للترحيب بها، وابتسمت بثقة، وأشارت إلى كرسي المكتب أمامي:

- اتفضلي يا فندم.

قالت ندى:

- تحبي تشربي إيه؟

أجابت برقة:

- لو ممكن شاي مطبوط.

خيم الصمت على المكان، وبينما كنت أنظر إليها نظرات متفحصة، قالت بعدما فتحت حقيبتها وأعطتني الكارت الشخصي:

- أعرفك بنفسي، أنا سالي عبد الواحد، أرملة من ٨ سنين.

- أهلا مدام سالي، أقدر أساعد حضرتك بإيه؟ ويا ريت أعرف سر رغبتك الملحة في إنك تقابليني بسرعة.

اكتست ملامحها بالحزن، وقالت بصوت يملؤه الأسى:

- عاوزة أكون من مؤسسي الجمعية مع حضرتك، وأي طلبات مادية أو غير مادية أنا في أتم الاستعداد ليها.

فقدت سيطرتي هذه المرة على انطباعاتي من شدة الدهشة:

- مش غريبة إن حضرتك...

قاطعتني بأدب قائلة:

- فاهمة كل اللي حضرتك عاوزة تقوليه، ولكن تقدري تقولي إني زي الغريق اللي بيتعلق في قشة، لما قرئت الإعلان في الجرنال جالي شعور قوي إن احتمال دا يكون آخر أمل هينجدني من اللي أنا فيه، ونقدر نعمل تغيير حقيقي في المجتمع، اسمحيلي آخذ من وقتك شوية وأحكلك قصتي.

هنا تحديدا طرقت ندى الباب ووضعت الشاي أمام مدام سالي.

تأملت ملامحها وشعرت أنها تأخذ لقب «الجمال الحزين» بجدارة.

وبدأت في سرد قصتها.

أنا يا دكتورة زوجي توفي من ٨ سنين، كنت ساعتها في نهاية العشرينات، من اليوم الأول للوفاة حسيت حرفيا إن نظرة الناس اتغيرت بشكل رهيب، هتكلم الأول بالنسبة للرجالة:

كنت بحس إني «لَقِيَّة» لأي راجل مريض تسول له نفسه إن الطريق مفتوح
أمامه لأي حاجة مش تمام...

- زي مين؟

- خدي عندك:

البواب

أخو البواب

أونكل الفكهاني

صاحب كشك السجاير اللي على ناصية الشارع

السايس بتاع الجراج

مدير مدرسة ولادي

زمايلي في الشغل

عم حمدان الفراش اللي عرض عليّ الجواز؛ بعد ما قتلته ميرسي على
الشاي اللي جابهولي وفكرني بالأغية...

وانهارت في البكاء.

قلت بحزن:

- تحبي نكمل وقت ثاني؟!

تنهدت بحرارة وأكملت كلامها:

- بالعكس عاوزه أفضفض، هكمل، بالنسبة بقي للستات، لو كلمتك عن
جيراني في العمارة اللي قاطعوني كلهم وماخلصش من نظراتهم في
الطالعة والنازلة، وهمساتهم مع مرات البواب،

ولو واحدة منهم حظها العاثر خلاها تركب الأسانسير معايا هي وجوزها ألاقها
بتحلق عليه، وهابن عليها تخيبه ورا ضهرها زي ما يكون هخطفه وأجري، وأنا
ببقى سامعاهم وهما ضارين بعض بالليل.

أما بقي أعز صديقاتي قاطعوني وبطلوا يدخلوني بيتهم وبيتهربوا مني، حتى
خالتي خافت على جوزها أونكل رأفت الشماشيري، وطنط عنايات صاحبة
ماما اللي قاطعتها بعد ما عمو شوكت جوزها عبر عن إعجابه بيّا.

هزيت راسي وضربت كف على كف:

- حمدان وشماشيري وشوكت، الوضع فعلا لا يحتمل.

أكملت كلامها قائلة:

- أما بقى أهل جوزي عيّنوا أخوه عشان يراقبني، وهددونني لو فكرت أتجوز هياخدو مني ولادي وكل حاجة جوزي اللي يرحمه سابها لنا، ولما جيت أترمي في حوض أهلي لقيتهم ما أنيل من ستي إلا سيدي، بيتعاملوا معايا على إنني عار ولازم أتدارى في بيتي لأنني مطمع، وعلاقتي ساءت بيهم جدا بعد ما اتقدملي زميلي في الشغل، راجل محترم بجد، زوجته اتوفت من سنتين، والدتي لما سمعت انهارت وقالتلي: إنتي عاوزة الناس تاكل وشنا إنك اتجوزتي بعد المرحوم جوزك؟ اعقلي وربّي ولادك، إنتي خلاص أخذتي نصيبك.. عيشي واسكتي.

وفي أثناء كلام سالي تذكرت أن في الهند عادة يتبعها الهندوس، أنهم بعد وفاة الزوج يقومون بحرق جثته ويحرقون زوجته معه وهي حية.. قلت في سرّي: على الأقل أرحم، يبولعوا فيها ويخلصوا بدل ما تعيش في الهم دا.. وبعدها فكرت في كلمة (الناس تاكل وشنا) وحادثت نفسي قائلة:

مين اللي اخترع الكلمة دي بجد، ويا ترى مين اللي بيطلع ياكل وش اللي بناتهم بيتجوزوا بعد الطلاق أو وفاة الزوج؟ أه لو يدلوني عليه والمصحف أأكله كل يوم كنتاكي على حسابي.. وأتصدى لعمليات أكل الوش غير المبررة من مثل هذا الشخص.. شعرت بنار في صدري وحاولت أن أتحلى بالهدوء لأن الموقف لا يحتمل، وبادرتها بسؤال:

- عندك اولاد؟

- الحمد لله ولد وبنت.

وفجأة أمسكت يدي بقوة وقالت لي بعد أن نظرت إلى عيني مباشرة:

- متأكدة إن كل دا فعلا ممكن يتغير؟ ممكن فعلا يجي اليوم اللي يتم تقييم الست في مجتمعنا تقييم آدمي بعيد عن الحالة الاجتماعية؟

- أكيد إن شاء الله، بس... لازم إحنا الأول نتغير.

- إزاي؟

أعطيتها ورقة تعريف بأهداف الجمعية، قرأتها باهتمام وقالت بحماسة:

- أنا معاكي.

شكرتني على حسن استماعي، وبينما كانت تهم بالانصراف ناديت عليها:

- مدام سالي، إن الله لا يغير ما بقوم حتى يغيروا ما بأنفسهم.

- هتغير وتغير إن شاء الله.

وبعد ما أغلقت الباب، جريت نحو التليفون، فلا بد من أن أحدث صديقتي الغالية، ريهام.

سمعت القصة باهتمام، وبعدما انتهيت قالت:

- مش هينفع الكلام في التليفون، هاتي بعضك وتعالى هعمل كوبايتين شاي على ما تيجي.

استقبلتني بوجهها البشوش، دخلنا لنجلس في غرفة الليفتنج.. وظلت كل واحدة منا شاردة الذهن لوقت لا بأس به.

وبعد تفكير عميق، قطعت الصمت وقلت لها:

- بصي.. خلاصة القصة بتاعة مدام سالي هي نقطة المجتمع اللي سبق ولمحت ليها أم أحمد البوابة، وأنا قلتك ساعتها إن الحَمَس مشاكل اللي قالتهم البوابة هم اللي بيقابلوا أي حد، لكن ينسب، قصة سالي هي المجتمع بعاهاته وتقاليده ونظرتة، بصي، الأول هنمسك نقطة نظرة المجتمع، ودا لأي ست بلا زوج بالمناسبة مش سالي بس، الستات حواليتها بيتعاملوا معاها كخطافة رجالة لأنها صغيرة وجميلة وأرملة، فإيه المانع ترضى بوضع زوج تانية ولا حتى رابعة ولا يمكن عرفي، خوفا من الوحدة ولتلبية احتياجاتها المعنوية، وغيرها، فاهماني طبعاً.

قالت بنفاد صبر:

- كملي.

- أما بقى الرجالة حواليتها فنظرتهم حدث ولا حرج، هي ببساطة صيدة سهلة، وخاصة الفكرة اللي صدرها الإعلام من زمان عن إن أي أرملة أو مطلقة، بتكون قاعده ليل نهار لابسة الكومبليزون الشفتشي.

ولن ننسى تألق النجمة هياتم والنجمة ناهد شريف في هذه الأدوار، والدور العالمي للأستاذ حمدي الوزير في فيلم «المغتصبون»، وقدرته على تجسيد الحيوان اللي جوة أي راجل للمشاهدين، الراجل نظرتة لست بتكون غريزية، وبيتخيل من خلال خريطته الذهنية إن الست هتفكر بنفس الأسلوب، وهو انتظار أي فرصة مهما كانت لتلبية احتياجاتها، بغض النظر عن اعتبارات الدين والعرف، وما نكرش طبعاً إن فيه ناس محترمين، لكن أنا بعلق على فكر الرجالة اللي قابلتهم سالي، حلو؟

- لا مش حلو.

- ليه؟

- إيه العرف يا مها؟

قلت من دون تردد:

- إننا مجتمع شرقي طبعا ما بنقبلش الغلط، وما بنقبلش الجواز برضه زي أم مدام سالي، عشان الناس ماتاكلش وشنا.

العرف إن الست تتربى طول عمرها، إن حياتها مستحيلة من غير راجل، وهوب ديل كيك لما جوزها يموت أو تفقد الزوج ماتتجوزش عشان الناس هتاكل وشنا، ولو فضلت من غير زوج برضه هياكلوا وشنا وتعيش تتعاقب! وبكدا نكون عملنا عادات وتقاليد ميكس، كل حاجة والعكس، خدنا جزء من الدين وهو إن الغلط ممنوع، اللي أصلا في مقابله أحلّ الزواج للأرملة والمطلقة، بس إحنا حرّمنا الجزء الثاني وأخدنا الأول فقط، وأخدنا الباقي من العرف والمجتمع اللي بيقول «أخذت نصيبها تعيش تربي ولادها وتسكت»، ويا ريتنا هنسيبها في حالها.

- حاجة تخنق فعلا.

- اصبري جيالك في الكلام، حل مشكلة مدام سالي هينقسم لشقين، الشق الأول: هي نفسها عليها جزء من المسؤولية:

* أولا: تحط حدود لكل راجل بمنتهى القوة والحزم، ولازم تقوي شخصيتها شوية.

* ثانيا: تطالب بحقها طالما في نطاق شرع الله وما بتعملش حاجة غلط، الحقوق لازم تنتزع ياريهام، وما يهملهاش كلام الناس.

* ثالثا: لازم تنجح في أي مجال، أولا عشان تلاقي نفسها، وثانيا عشان تنشغل.

ولو واحدة مطلقة عشان تشيل الصورة الذهنية المترسخة في دماغ الناس إن المطلقة فاشلة، نجاحها هيدعم ثقتها بنفسها وهيديها قوة غير عادية واحترام للذات بشكل غير عادي، ودا كمان هيعوض الحنة المنتقصة عندها.

أما بقى الشق الثاني: هو المجتمع..

عارفة مين محتاج يتغير؟

الستات!

- يا سلام! إذا كان هم اللي بيعانوا أصلا.

أشرت بإصبعي ناحيتها وقلت فجأة:

- بالظبط.. الموضوع منهم وإليهم..

* أولاً: كل ست تربي ابنها صح بداية من احترام إخواته البنات لاحترام بنات الجيران وبنات العيلة، راجل بمعنى الكلمة بيراقب الله في كل تصرفاته ويقدر يشيل المسؤولية، ويعتبر أي بنت كأنها أخته أو أمه.

سكث لبرهة وقلت بحزن:

* ثانياً: نحس ببعض يا ريهام، نحط نفسنا مكان بعض ونبطل نصدر أحكام على الناس ونحشر مناخيرنا في شؤونهم، وكل واحدة تحط نفسها مكان أختها.

الحماة تحط نفسها مكان مرات ابنها من أول وهي بتربيها، ومرات الابن تحت نفسها مكان حماتها، وأخت الزوج تحط نفسها مكان مرات أخوها والعكس، والمتجوزة تحط نفسها مكان اللي من غير زوج، ودايماً نحط في دماغنا إننا ممكن نكون مكان أي حد، ما حدش ضامن حاجة ولا حد عارف بكرة فيه إيه.

لازم مبادئنا ماتتجراش وتكون قناعاتنا واحدة أيا كان موقفنا إيه، أقولك المفاجأة: فيه ناس آراءها بتتغير تماماً تبعاً للناحية اللي هي واقفة فيها، يعني لو واحدة من جارات سالي مكانها هتلعن كل اللي بيعملوا فيها نفس التصرفات اللي هي بتعملها دلوقتي مع سالي.

- حاجة غريبة جداً، فكرتيني بواحدة جارتني! تصدقي فعلاً عندك حق، هوريكي دلوقتي نموذج تقريبا بيوضح اللي حكيتيه...

أمسكت ريهام هاتفها المحمول:

- هندهلك مدام وسيلة جارتني في الشارع اللي ورانا، واسمعي منها برضه.

- مين دي؟

- أرملة تونسية بقالها في مصر كام شهر، واتعرفت عليها في صلاة التراويح في رمضان.

عزمت ريهام مدام وسيلة لتأتي وتأخذ الشاي معنا.

وبعد ساعة، دخلت علينا سيدة في العقد الرابع من العمر، بشوش، ولكن يكمن في عينيها حزن دفين، أشارت ريهام ناحيتي وابتسمت قائلة:

- هعرفك بالدكتورة مها صاحبتني، عاوزه تتعرف عليك لأننا بتعمل بحث وعاوزه تحط فيه قصص للمطلقات والأرامل.

تنهدت وبدأت في سرد قصتها، وبعد محاولات جاهدة مني لفهم كلامها، حكمت لي أنها جاءت إلى مصر بعدما تعرضت لأزمة وفاة زوجها من بضعة أشهر.

قالت إن زوجها توفي بعد أن شاركت في المظاهرات المؤيدة لقانون تجريم الزواج الثاني في تونس، وذلك لإيمانها الكامل في ذلك الوقت بأنه ليس من حق أي رجل الزواج بأخرى، وليس من حق أي امرأة مهما كانت ظروفها أن تبني سعادتها على حساب أخرى.

قاطعتها بأدب:

- أنا ضد تجريم التعدد والوقوف أمام ما أحل الله، ولكن شايفة إن العدل الشرط الوحيد اللي ربنا حطه للتعدد شرط صعب التحقيق جدا، خاصة في ظل الظروف الاقتصادية اللي الناس عايشين فيها، وبالتالي إحنا ممكن نلجأ إليه في بعض الحالات النادرة، اللي يكون الراجل مؤهل لدا وقادر على تعويض زوجته الأولى ماديا ومعنويا، وعدم ظلم أي واحدة فيهم، أو لو عنده ظروف قهرية خلته يضطر يعمل كدا.

قالت وصوتها يقطر ألما:

- دا رأيك دلوقتي؟! وخاصة بعد ما خضتي تجربة الطلاق؟!

- آه طبعا.. ودا رأيي وأنا متزوجة وأنا مطلقة.

انهارت في البكاء:

- بعد وفاة زوجي حسيت بآلام إخواني المطلقات والأرامل، وأنا دلوقتي بنادي بالتعدد ومقتنعة بيه جدا..

أكملت كلامها قائلة:

- نفسي ربنا يغفرلي، وحاسة وبشدة إن ربنا حطني في الموقف دا عشان أتعلم درس عمري.

ثم قالت وهي تهم بالانصراف:

- يا ريت تحكي حكايتي للناس ويستفيدوا منها، لو فعلا عاوزة عملي حاجة يا ريت الناس يوصلهم مبدأ حب لأخيك ما تحب لنفسك، واللي مانرضاهوش على نفسنا وعلى ولادنا مانرضاهوش على حد.

- ماتجلديش نفسك.

تنهدت بحرقة:

- أسأل الله أن يوفقك.

عدت لمنزلي في الساعة التاسعة ونصف مساءً، وأنا في أتم الاستعداد لخناقة كل يوم المعهودة، الخاصة بطنط جولفدان ونظراتها وأونكل طلعت ومراته، وبالطبع لم ننس طنط كايدهم، وبعدما سمعت الطريحة، ألقيت نفسي على الفراش، وأخذ يجول بخاطري ما حدث خلال اليوم، وتذكرت الأحداث الأليمة التي مررت بها كمطلقة، فوضع المطلقة في المجتمع للأسف أسوأ بكثير من وضع الأرملة.

الأرملة ما حدث لها لم يكن بإرادتها، أما المطلقة فهي موصومة بالفشل، إضافة إلى كل ما تعاني منه الأرملة مثل سالي.

وجلست أحدث نفسي قائلة:

نظرة المجتمع للمطلقة، خاصة وأي ست من غير زوج عموماً بتخلي الست تجري ناحية أي جوازة مهما كانت، أو ترضى بأي عيشة والسلام، بسبب خوفها من المجتمع، ودي من الحاجات اللي بتخلي بعض الرجالة في مركز قوة بسبب معرفته بظلم المجتمع، اللي بيتم استغلاله كنقطة للوي دراع الست عشان تستحمل، أسهل من تصليح عيوبه، أو إيجاد حل جذري لمشاكلهم، وافتكرت على طول في بداية طلاقي لما كنت مخيبة الموضوع، وكانت طنط جولفدان جارتنا بتبصلي بنظرات متفحصة وهي بتسأل:

- إنتي قاعدة عند ماما ليه؟ وفيين جوزك ما بنشفهوش ليه؟

وكنت أتهرب ببعض الكلمات المتلثمة زي: «أصل جوزي مسافر... مات... هرسه قطر... خرج ولم يعد... راح يجيب ورقة بوسطة وزمانه جاي...» وتعبها نظرة شريرة مع شعور بزهو الانتصار من طنط جولفدان إن تخمينها كان صح، وإن المفاجأة إني... إني...

مش قادرة أقولها... اتطلقت.

بس كنت بحب شعور النعامة اللي دافنة راسها في الرمل، وإن الناس عارفة بس أنا مش عارفة إنهم عارفين.

والحقيقة إني ما كنتش فاهمة إيه اللي يدعو للخجل، وبعد ما درست الكوتشنج فهمت إن اللي يدعو للخجل إني كنت ماشية طول عمري بالمسطرة على قانون ورغبات المجتمع، بس المرة دي مش بإرادتي، الظروف خلتنني أخرج برة الإطار واتطلق، ودا كان تفسيره في عقلي الواعي واللاواعي إني فشلت... مها سامي فشلت أجدعان... مرسى الزناتي اتضرب يا رجالة، وللأسف لأننا محاطين بالأغبياء مع انعدام ثقتي في نفسي وفي قراري، وصل الشعور دا للناس اللي حواليا، لدرجة إن البوابة جتلي في يوم وقالتلي:

- بجولك يا ضاكتورة.. رئيس مجلس إدارة العمارة كان عاوز يزود الصيانة عليكو.. جولته دي بنتهم مُطلجة وبتجري على عيالها.

لن أنسى منظرها مع رذاذ فمها المتطاير الذي جعلني أشعر بقذارة المجتمع... (بحب الفصحى قوي لوصف المواقف الجوهرية دي).

وحقيقة الأمر إن زيادة فلوس الصيانة مش معضلة بالنسبة لنا ولا حاجة، لكن هي كانت عاوزة تحط كلمة مطلقة في جملة مفيدة، نظام «قفشتك يا خلبوصة».

وأول شغل طبعا اضطريت إني أنزله كان شغل في صيدلية، وفضلت لابسة دبلتي عشان ماחדش يضايقني، أما المضايقات اللي اتعرضتها من أهل والدتي كانت مصمصة الشفايف، ويا «حبيبتي» ربنا يجعل عوضك في ولادك، وصاحباتي كانوا خايفين مني لاحسدهم، وماكانوش يتصلوا بيا إلا عشان يسمعونني سيل من الشكاوى والخناقات والصراعات الدامية بينهم وبين أزواجهم.

في الفترة دي، قررت أشد الفيشة، وهي فيشة مشاعري، عشان أعرف أعيش، كانت مشاعري متعادلة، أو بالأحرى مافيش مشاعر، مشاعري وأنا قاعدة في عزاء جدتي الله يرحمها كانت لا تختلف أبدا عن مشاعري وأنا في الجونة بقضي وقت لطيف مع ولادي، نفس الانطباعات من برة، ونفس الفصلان من جوة، ولما درست كوتشنيج فهمت إني كدا فعلا انفصلت عن الواقع كنوع من أنواع الهروب، ودا كان أكبر غلط، لأن الطبيعي جدا إن الواحد يحزن ويعيط ويتضايق ويغضب بس لازم يتعامل مع المشاعر صح، إنه يتقبلها وبعدين يفهم هل المشاعر دي فعلا تستاهل تكون حقيقية وموجودة ولا لأ.

لو ضربتلكم مثال لشعور كان مسيطر عليّ، الشعور بالحزن الشديد..

الحزن ليه؟

عشان أنا فاشلة...

وايه يا مها اللي محسسك بكدا؟

إني اتطلقت...

طيب وهل إنتي قصرتي؟

يمين عظيم أبدا ما قصرتش...

طيب ما نبذل الكلمة ونخليها بدل فشل... تجربة عدت عليّ واستفدت منها...

الفكرة هنا إن مشاعرنا مش هي إحنا، أو بمعنى ثاني مش بتعكس الحقيقة والواقع، وعشان تفهمي الكلام دا لازم تفهمي المشاعر بتتولد إزاي، الأول إنتي بتشوفي حدث، والحدث دا بتشوفيه من خلال خريطةك الذهنية، الحدث بيولد فكرة، والفكرة بتولد شعور، طيب يعني إيه بتشوفي الحدث خلال الخريطة الذهنية؟ يعني من خلال تربيتك وقناعاتك وخبراتك السابقة في الحياة اللي وارد جدا تكون صح ووارد جدا تكون غلط، وبالتالي المشاعر المتولدة ممكن تكون صح وممكن تكون غلط، بمعنى ثاني إن مشاعرك ما هي إلا انعكاس لطريقة تفكيرك، خلينا نضرب مثال...

وأنا في الثانوية العامة أمل جارتنا في الدور الرابع جابت ٧٠٪، لما سمعت المجموع حسيت جوايا يا عيني أمل فاشلة أوي، مجموع أمل هو الحدث، الحدث ولد فكرة وهي أمل فاشلة، الفكرة ولدت شعور وهو شعور بالشفقة تجاه أمل، هل أنا حكمي أصلا صح؟ لأ مش صح، لأن حكمي مبني على تربية ماما، إن لازم نخش طب وصيدلة وما دونهما فشل، بالمناسبة، أمل بقى كانت فرحانة جدا بالنتيجة، لأنها كانت باصة للموضوع من خلال خريطة ذهنية ثانية خالص، وعلى فكرة، اتخرجت من كلية التجارة وماسكة دلوقتي إدارة بنك من أشهر البنوك في مصر، وأسرتها ربنا يبارك أسرة سعيدة جدا.

يبقي لازم تفهمي إن مش دايمًا مشاعرك بتكون صح، وقيسي على كذا مشاعر الخوف والخجل غير المبرر من الطلاق ونظرة المجتمع، وغيرها من المشاعر، لما بيجيلك الشعور دا الأول تقبليه، وبعدين اسألني نفسك سؤال واحد: هل الشعور دا مفيد بالنسبة لي؟ وابتدي اسألني نفسك إيه المعاني اللي ورا الشعور دا...

إيه السبب فيها...

واشتغلي عليها وغيريها...

شوفتوني وأنا كوتش.. ألاقش حد يكتشفني؟

هاتي تمن الكتاب بقى...

إحم معلش... ما علينا...

طيب الكلام اللي فات بيلخص إزاي أحسن نظرتي لنفسي...

طب إزاي أحسن نظرة المجتمع لي؟

بصي يا بنتي، إنتي مش مجبرة تحسني نظرة الناس ليكي نهائيًا، لأن كل واحد هيحكم عليك من خلال خريطةه الذهنية المبنية على قناعاته وتفكيره، بدليل حكم طنط جولفدان جارتنا عليّ إني مثلا فاشلة معروف أسبابه، لكن لو سألنا

جون، شاب أمريكي متحرر، عن نظرتة ليًا بعد ما أخذت قرار الطلاق هيقول:
واو فتناستيك... سترونج إنديننت وومن... وطالما اللي حصل ان بابليك
ومفيش فيلنجس سوو وات؟ لأنه حكم من خلال قناعاته وتربيته وخبراته
السابقة، يبقى لازم تقتنعي إن نظرة الناس ليكي مش لازم تكون صح،
وإوعي تغلطي الغلطة الشنعاء إنك تقيمي نفسك من نظرة الناس ليكي.

هحكيكو حكاية كدا هتفهموا منها وجهة نظر..

وإحنا صغيرين كان بيلعب معانا ولد جارنا، كان شخصية لزجة للغاية، عنده
شر دفين إنه يقدر يخلي أي طفل مننا...

يعيط

يضحك

ينهار

كان أكبر مننا في السن وكان منمر عليّ (معجب ولهان) فماكانش بيضايقي
كثير...

وفي يوم من ذات الأيام اعترفلي إنه في غاية السعادة لأن ريموت كل العيال
في إيده، وبيقدر يتحكم فيهم عن بعد... لما درست الكوتشنج فهمت مباشرة
إن الغلط ماكانش عند الولد دا وأمثاله من الأشخاص في المجتمع، زي البوابة
وطنط جولفدان وغيرهم...

تتخلوا؟!!

الغلط كان عندي أنا إني سمحت لحد إنه يتحكم في مشاعري ويكون هو
المهيمن عليها، تخيلي إنك تكوني مش مسيطرة على مشاعرك! ومديّة كارت
بلانش لكل من هب ودب إنه يضايقك.. ينرفك.. يفرحك.. يزعلك.. ومشاعرك
مابقتش ملكية خاصة ليكي... هار اسوح... شيء يدعو للإزبهلال لما نركز
فيه...

لو جيتلك البيت ودخلت من غير إحم ولا دستور... ورحت ناحية الصالون
ودلقت عليه عصير، وشويه رحت نازلة بشومة على كرسي من الكراسي،
وملمعة التراييزة..

هتسمحيلي؟!!

أكيد طبعا لأ..

طب على فكرة مشاعرك أغلى من الصالون بكثير، ببساطة خدي القرار إنك
مش هتسمح لي لأني حد مهما كان إنه يكون له هيمنة على مشاعرك

وأحاسيسك، أنا أخذت القرار على فكرة ودشنت (بتعجيني أوي كلمة دشنت دي بالمناسبة، ومبسوطة إن جه اليوم اللي كتبتها فيه، يا ما انت كريم يا رب) دشنت هاشتاج...

#ريموتي_في_ايدي

لايك وفولو وشير إلهي يستركم.

إحم... القصد...

إيه رأيك في كل اللي فات؟ حلو؟!

ماشى حلو، عرفت يا مها هعمل إيه في مشكلة المجتمع إلى حد ما، ولو إن الصورة مش واضحة أوي، بس ماشى هكمل الكتاب يمكن توضح...

لكن يبقى السؤال المهم اللولبي الجهني اللي عشانه اتعمل الكتاب، ألا وهو...

أنا اتطلقت ليه؟!

أو إشمعنى أنا من دون الناس اللي بقيت من غير زوج، سواء خسرتة بالموت أو لسة ماقابلتوش؟

تعالى نكمل... هنعرف سوا...

∞ ∞ ∞ ∞ ∞



الفصل الثالث: المشكلة الثانية: الدعم المادي

طالق يا مدام إنتي وولادك...

«لا نملك المال، لذا فعلينا أن نفكر»

أرنست رذرفورد

كانت ندى تقوم بحصر الأعداد المتقدمة للجمعية باهتمام، بينما كنت أقف في شرفة مكثبي في التاسعة صباحا، أستنشق نسيم الهواء النقي... وشعرت بأن الأمل قريب... أقرب مما أتوقع... أفقت من شرودي على صوت ندى وهي تقول بتذمر:

- العدد كبير بشكل غير طبيعي، استحالة تقابل كل دول... ولا إيه رأيك يا دكتور؟

- للأسف لازم نقابلهم كلهم، عشان نختر مؤسسي الجمعية والأعضاء زي ما اتفقنا.

- طيب ومدام سالي، فعلا حضرتك هتديها دور أساسي في الجمعية؟

- آه، الست متحمسة للفكرة جدا ومؤمنة بيها، وعندها رغبة حقيقية وإرادة للتغيير، والحاجات دي من أهم الأسس في الجمعية.

خبطت ندى على رأسها وقالت:

- كنت هنسى، مدام سالي جاية بعد شوية، كنت إديتها ميعاد امبارح.

مر اليوم بسلام بعدما اتفقت مع مدام سالي على أن تتولى منصب وكيل الجمعية، ومرت بعدها الأيام، وقابلنا العديد من الشخصيات من كل صوب وحب، وسمعنا قصصا يشيب لها الولدان.. البعض منها كان مكررا والبعض لا.. وبعد شهر كامل من المقابلات وقع اختيارنا على أكثر الشخصيات المميزة لتولي مناصب مهمة في الجمعية، إحدى هذه الشخصيات مدام نجلاء منصور...

كانت تفاصيل لقائنا الأول كالتالي...

من عادتي أن أراقب الحضور وتصرفاتهم من خلف بارافان يفصل بين مكثبي والريسبشن.. لتكوين انطباع مبدئي عنهم... نجلاء منصور سيدة أربعينية.. تنظر لمن حولها بمنتهى الاستغراب والانزعاج.

وحيثما أمعنت النظر لاحظت أن انزعاجها مبرر، فالجميع يتحدثون بمنتهى الفوضى، وتتعانق أصواتهم في سماء الريببشن لتطل علينا أكثر السيمفونيات بشاعة في التاريخ.. فتقافة استماع الآخر وانتظاره ليكمل حديثه مفقودة للأسف في مجتمعنا.

حينما جاء دورها دخلت المكتب وجلست دون أن تنطق بكلمة واحدة، وأخذت تتفقد الغرفة بعينها ثم قالت فجأة:

- واضح إنك حد ناجح وطموح.

- ممكن أتشرف بيكي.

- مدام نجلاء منصور، خريجة كلية السن، مطلقة ومعايا ولدين.

- أهلا وسهلا يا فندم.

- حكايتي باختصار إني اتطلقت بعد خمس سنين من جوازي، كنت متجوزة زميلي في الجامعة بعد قصة حب طويلة، وتنازلت عن حجات كثير، واكتفيت بشبكة فضة وشقة عادية جدا..

ورغم رفض أهلي الشديد بسبب فرق المستوى الاجتماعي بيننا، صممت وركبت دماغي.

وبعد الجواز بسنة والدي توفي، وخسرنا كل حاجة حرفيا بسبب قلة ضمير الناس اللي كان مشاركهم في كل مشاريعه، والدي كان راجل أعمال، بعنا اللي وانا واللي قدامنا، وللأسف والدتي ماتت بعد والدي بسنة، من الحسرة.

بعد وفاة والدي ووالدتي جوزي بدأت معاملته تتغير تماما من سيئ لأسوأ، وكل ما كنت أطلب منه إنا نصلح علاقتنا كان يرد عليّ رد واحد «احمدي ربنا إني بصرف عليك إنتي وعيالك.. عيشي يا بنت الناس واقصري الشر، لو اتطلقتي هتاخدي من المحكمة متين جنيه ومش هتعرفي تعيشي»، ما اطولش عليك طلبت الطلاق لكنه رفض، مش حبا فينا إنما عشان ماخُدش أي حقوق مادية منه، بالرغم من إنه رجل أعمال ناجح جدا، فلجات للقضاء عشان أخلص، للأسف فضل يضغط عليّ ويستعمل أساليب محامين مش بيخافوا من ربنا، وعمل عقد بيع للشقة لأخوه وغير العفش بتاعي كله، وخرجت من الجوازة يا مولاي كما خلقتني، وبولادي ربنا يخليهملي عمر وزياد، وتنصل بعدها تماما من مسؤوليات الولاد المادية والمعنوية، وبدأت زيارته للأولاد تتباعد تماما، وسمعت إنه اتجوز من سنة كدا.

سألت باهتمام:

- وانتو عايشين إزاي؟

قالت بمنتهى الرضا:

- الحمد لله أنا دارسة كذا لغة، وبشتغل مترجمة من البيت، ومن فلوس الترجمة أُجرت شقة في حي شعبي أنا وولادي، وأهي ماشية نحمد ربنا.

- إيه سر اهتمام حضرتك بالجمعية؟

ردت بمنتهى الانكسار:

- عشان أكون صريحة معاكي، لو عندكم فرصة عمل أزود بيها دخلي، وأكيد عشان عجبتي الفكرة ونفسي أكون عضو معاكم، نفسي كل ست طلبت الطلاق لاستحالة العشرة تاخذ حقها وحق ولادها زي ما الدين بيقول، لازم أي راجل يفهم إن الطلاق ربنا ماشرعهوش لينا عشان الست تتعاقب بيه، ربنا شرعه كبوابة للخروج من علاقة فاشلة عشان نعمل حياة أفضل للطرفين وللأولاد.

نفسي كل راجل يحس إن ولاده قبل الطلاق هم ولاده بعد الطلاق مهما كانت والدتهم وحشة، مش ذنبهم يتعاقبوا بان والدتهم تقوم بدور مش دورها، وهو دور إنها تصرف عليهم.

ودا بيخليها تقصر في دورها كأم، وبالتالي بيخلي الأولاد يطلعوا مش أسوياً، زي بالظبط لو منظومة الأسرة اكتملت عشان بس خوف من تهديد زي الفلوس وغيرها، ساعتها بيكون الطرفين الأب والأم عايشين سوا وهم مش في كامل طاقتهم النفسية، لأن الموضوع إجبار ودا بيخلي نفسية الأولاد تتدمر.

نفسي كل أب يعرف إن مش معنى إن علاقته بأم أولاده انتهت، يعقُبها مباشرة انتهاء علاقته بأولاده وتنصله من كافة أعبائه المادية والإنسانية، كفى بالمرء إثماً أن يضيّع من يعول، صح ولا إيه يا دكتوراه؟!

انبهرت بطريقة مدام نجلاء وعرضها للمشكلة بشكل منمق وراق، ولاحظت طوال حديثها أنها كانت تضغط على أصابع يدها بارتباك نظراً لتصريحها برغبتها في فرصة عمل. شعرت بحرج شديد لأجلها، وقلت بسرعة:

- طبعا صح.. تصدقي إنك بنت حلال، كنا بندور على حد ينظم معانا شغل الجمعية، وكمان متحدث رسمي باسم الجمعية، ومش هنلاقي أرقى منك.

نظرت إليّ في خجل وقالت بمنتهى الطفولية:

- بجد؟

- آه والله.. يا ريت بقى تجيبي السي في بتاعتك، وتقدري تستلمي الشغل من بكرة.

- أنا اتريت على النظام، وتأكدي إني هحط أسس وهظبط بإذن الله حاجات كثير.

همت بالوقوف وقالت وهي تصافحني وتغمز بعينها:

- بالمناسبة الدنيا برة فوضى جدا.

ضحكت:

- إنتي هتنظميها إن شاء الله...

∞ ∞ ∞ ∞ ∞

«قال رايح فين يا حظ؟ رايح لعفانتهم.. طب والحلوين يا حظ؟ كفاية عليهم حلاوتهم».

كان هذا تعليق ملك، مساعدتي، على قصة مدام نجلاء...

قالت ندى بتشكك:

- إيش عرفنا إن كلامها صح؟ ما يمكن تكون بتضحك علينا وعاوزة شغل وخلص.

نظرت لندي بهدوء:

- اللي ماتعرفيهوش إن دا مقرر للأسف عند أي ست بتتطلق، وكل الرجال إلا من رحم ربي بيكونوا مذاكرينه من الجلدة للجلدة، وبينفدوه بحذافيره، بيعتبروا نقطة المادة والفلوس بمثابة كارت ضغط لاستمرار الست في العلاقة، ودا أكيد حل أسهل من إنه يصلح من نفسه ويدور على حل جذري لمشاكله بينه وبين مراته، والغلطان يعترف بغلظه، ولما الست بتركب دماغها وتتطلق.. فورا بيظهر الكارت دا عشان ترجع لعقلها زي ما يقولوا.

ولما مابترجعش وتصمم بيبتدي الضغط اللي بعده، وهو الضغط عليها من خلال أولادها وهو التقصير في حقوقهم المعنوية..

نظام: شفتي أضرار الطلاق؟

مش عمليتي سبع رجالة في بعض وهولاكو في نفسك وطلبتني الطلاق.. اشربي..

بنت مين في مصر انتي عشان تطلبي الطلاق؟! ما تعيشي وترضي زي ما كل الناس عايشين...

ولو سألتني راجل من دول: طب ليه عملت كدا؟ هيقولك كاس وداير علي الناس.

هنا يحضرني السؤال اللي هيطير برج من نافوخي.. أليس منكم رجل رشيد؟!
ليه ماتحطتش قوانين واضحة تناسب العصر اللي إحنا فيه، قوانين تردع أمثال الأستاذ عزت جوز مدام نجلاء؟ طالما مايخافش من ربنا يخاف من قانون، ومايكونش فيه أي تلاعب.. تكون أحكام واضحة وصرحة تناسب ظروف الحياة الصعبة، مش نفقة ٣٠٠ جنيه و٢٠٠ جنيه!

قالت ندى وهي شاردة:

- أنا لازم أروح أقابل الأستاذ عزت دا وأسمع منه.
- بجد؟ عندك استعداد عملي كدا؟
- آه عندي، بصراحة الفضول هيموتني ولازم أسمع وجهة نظره.
- حيث كدا بقى سيبيني أفكر وأقولك هنعلمها إزاي!

∞ ∞ ∞ ∞ ∞

وبعدها ببضعة أيام..

كانت ندى تقف أمام شركة عزت أفلاطون للاستيراد والتصدير، ترتدي نظارة سوداء، خلعت النظارة، وما إن قرأت الاسم حتى كادت تسقط مغشيا عليها من الضحك، أفلاطون؟ يعني قادم من المدينة الفاضلة، يا مسهل يا رب..

دخلت إلى الشركة بخطى واثقة، حتى وصلت لمكتب سكرتيرة أستاذ عزت.. نظرت للسكرتيرة وقالت بثقة:

- من فضلك أنا معايا معاد مع أستاذ عزت، اتصلت بحضرتك امبارح وحددتيلي معاد النهارده عشان أقابله.

- أتشرف بالاسم يا فندم؟

- ندى بسيوني صحفية في جريدة الحقيقة الكاذبة.

- آه تمام.. أستاذ عزت في انتظارك.

دخلت ندى مكتب الأستاذ عزت..

كان يتحدث في هاتفه المحمول، وانتهزت الفرصة لتتأمل الأستاذ عزت ومكتبه كما يروق لها، ديكور المكتب كان فارها إلى حد كبير..

أما هو فيشبه عادل أدهم وممثلي أدوار الشر...

كان يناقش أحد شركائه بانفعال بخصوص صفقة حصل منها على ربح مليون جنيه، وهذا أقل من سقف توقعاته بمراحل...

أنهى مكالمته وأخذ يطالع الأوراق أمامه، وقال دون أن ينظر لندى...

- أهلا يا آنسة، أي خدمة؟

تلعثمت في الكلام:

- أنا يا فندم ندى بسيوني صحفية في جريدة...

قاطعها قائلاً:

- عارف، ادخلي في الموضوع من فضلك.

- أنا بعمل ريبورتاج عن ارتفاع حالات الطلاق في مصر، وقابلت زوجة حضرتك السابقة السيدة نجلاء في محكمة الأسرة... وحكت الموضوع من وجهة نظرها، وقلت أبدا.. لازم أسمع من الطرف الثاني اللي ممكن يكون مظلوم، وهو حضرتك طبعاً، وطبعاً الموضوع هينزل في الجريدة من غير ذكر أي أسماء.

تبدلت ملامح الرجل بعد سماع هذه الكلمة تحديداً من الغضب إلى الارتياح، وقال:

- تشربي إيه؟

- لو ممكن عصير برتقان.

ضغط الرجل على زر أمامه:

- عصير برتقان فريش هنا للآنسة يا نجوان من فضلك بسرعة.

تنهد الرجل بحركة مسرحية، وتابع قائلاً:

- إيه، هقولك إيه بس يا آنسة ندى!

أنا زي زي أي راجل مصري بريء، اتجوزت وكان نفسي أبقى راجل في بيتي، وعادي يعني عندي شوية عيوب بسيطة، الست هانم ماستحملتش وخربت البيت، ونسيت إن أنا الراجل، المسترجلة مااحترمتش رجولتي، ولم تقدرها على الإطلاق، حضرتك سمعتي أغنية الراجل بتاعة رامي صبري؟

- آه طبعاً يا فندم.

- المدام كانت بترد الكلمة بعشرة، وماعملتس حساب للعشرة.

- طيب يا فندم طالما ماكنتوش متفقين ليه ما اتطلقتوش بالمعروف؟

- أنا عملت فوق المعروف، صاحبي محسن حسين طلق مراته ويديها نفقة سبعين جنيه في الشهر لابنها.

- آه أكيد يا فندم بتركب بيهم تاكسي رايج جاي تروح تسلم على الأستاذ محسن وترجع.

أكمل الرجل حديثه:

- أنا اتعاملت بالمعروف، وقتلتها هديكي ٣٠٠ جنيه للغيل في الشهر، ورفضت.

- ياه يا فندم على كرم أخلاق حضرتك.

أمسك المسبحة وقال وهو يستحضر الروحانيات:

- الحمد لله، الواحد بيعامل ربنا، مايبنتظرش الرد من البشر..

- وحضرتك بقى بتشوف الأولاد؟

قال بحزن مصطنع:

- منها لله، حرمتني منهم بشكل غير مباشر.

- شكل غير مباشر إزاي يعني؟!

- لما كنت بروح أزور العيال كل سنة مرة بلاقيهم شاربين الكره من ناحيتي، يلا ربنا على الظالم.

- وحضرتك ليه بتزورهم كل سنة مرة؟

- محسن حسين بيزور ابنه كل ٣ سنين، لكن الواحد مايبحبش يعمل كدا، الواحد دايمًا بيحب يتعامل بالإحسان والمعروف، طب أحكيلك حاجة مش هتصدقها، من سنة لما قابلتهم كنت لسة متجوز مراتي الجديدة، أخذتهم عندها في البيت اللي كانوا عايشين فيه وعلى نفس عفشهم وحاجة أمهم، عادي بقى ما هيّ اللي سابت الحاجات دي بمزاجها ودمرت بيتها براحتها وطلبت الطلاق.. المهم، قلت للولاد شايفين مرات باباكم كيوت إزاي؟ قولولها بقى يا ماما، ومن ساعتها ماتعرفيش العقربة أمهم قالتهم إيه، مش عاوزين يشوفوني ولا يقابلوني تاني.

وبعد هذه الكلمة تحديدا شعرت ندى بشعور واحد، ألا وهو: إهروب يا ويلد.

عادت ندى من مقابلتها مع أستاذ عزت، وظلت على وجهها علامات الذعر لأيام عديدة، ولم يختف الذعر إلا بعد جهود مضنية من الجميع لتهدئة روعها، حكّت لنا ندى تفاصيل المقابلة بعدما هدأت، وبا ليتها ما حكّت.

تعليقي أنا - وأعوذ بالله من كلمة أنا:-

بالمناسبة، القصة الأخيرة مش قصة من خيالي، وللأسف فيها حاجات كثير مطابقة للواقع، لما سمعت قصص المطلقات لقيت إن دا عامل مشترك بين الأغلبية، جريت على المصحف وفتحت سورة الطلاق، لفت انتباهي إن ربنا سبحانه وتعالى حطلنا قواعد ثابتة وواضحة للتعامل في الأمور دي، وأخذت بالي إن بعد أوامر ربنا الصريحة في السورة مباشرة جاءت الآية:

«وَكَايْنٍ مِّنْ قَرْيَةٍ عَنَّتْ عَنْ أَمْرِ رَبِّهَا وَرُسُلِهِ فَحَاسَبْنَاهَا حِسَابًا شَدِيدًا وَعَدَّوْنَاهَا عَدَاوًا تُّكْرًا».

ودا تهديد ووعيد واضح من ربنا سبحانه وتعالى بعد ما قال ﴿لِيُنْفِقَ ذُو سَعَةٍ مِّنْ سَعَتِهِ وَمَنْ قُدِرَ عَلَيْهِ رِزْقُهُ فَلْيُنْفِقْ مِمَّا آتَاهُ اللَّهُ﴾، ما يعني إن مفيش أي اختيارات قدام أي راجل بعد الطلاق إلا الإنفاق، سواء كان مقتدر أو غير مقتدر، طيب والحل يا مها؟

لو ربنا ابتلاني براجل لا يخشى في الله إلا ولا ذمة هموت أنا والعيال ولا إيه؟ لأ طبعا ما حدش قال كدا، تأكدي إنك مع السعي في طلب الرزق ربنا هيسترها عليك وهيبعتك رزق أولادك، ودا مش كلام كتب، دا كلام حقيقي.

وعلى سيرة السعي بلا حظ ستات كثير بتقوللي أنا مفيش في أيدي حاجة أعملها، كلمة السعي بتفكرني فورا بالسيدة هاجر لما كانت في الصحراء مع سيدنا إسماعيل ولوحدهم، ماكانش في أيدها حاجة تعملها، قامت تجري رايح جاي تدور على المياه، ودا بالطبط اللي المفروض تعمله، إنك تسعي، وتأكدي إن ربنا لازم هيرزقك ويفتحلك أبواب، وفيه كمان حاجة مهمة..

عزيرتي المطلقة والرؤية (رؤية الأولاد لباهاهم)، أوقات كثير بنسمع عن أمهات بيمنعوا طليقهم من إنه يشوف الولاد لأسباب كثير، من الأسباب دي:

إنها تكون اتطلقت غدر ومغلولة منه.

إنه يكون ممتنع عن نفقة ولاده.

إنها خيفة إنه يخطفهم.

إنها خيفة ولادها يحبوه أو يملا دماغهم من ناحيتها.

بصي بقى يا ست الناس، هنمسك سبب سبب وهنتناقش فيه:

إنك اتطلقتي غدر ومغلولة منه:

هنا هقولك اسألني نفسك إنتي مغلولة منه ليه

هتقولي دمر حياتي

هقولك حياتك في إيد ربنا بس، وماحدش قادر يعمل حاجة في حياة حد إلا بإذن ربنا ثم...

عارفه ثم إيه؟

ثم بإذنك إنتي...

لو أخذتي القرار إن حياتك ماتدمرتش وقمتي وقفتي على رجليكي تاني وإنتي قادرة على ده، وإنتي مقتنعة إن أي مشكله في حياتي ممكن أخلق منها نجاح، هتلاقي مشكلتك انحلت..

وبعدين؟ نتنقل للنقطة الثانية...

إنه مايبصرفش على ولاده وحيآخدهم وهو مايبدفعش ولا مليم ودي بقى أنا بحبها أوي،

أجمل إحساس في الكون إنه يبجي يتسول عياله...

وحطي مليون خط تحت يتسول!

عارفة شعور إنك اليد العليا؟ عارفة شعور إنك بتديهومله وإنتي قوية وهو مخزي وعارف قد إيه هو صغير قدام ربنا وقدام نفسه وقدام ولاده؟

ثانيا حطي في دماغك إن ربنا هيحاسبه على النفقة.

واتني ربنا هيحاسبك على قطيعة الرحم، إحساس رائع إنك تحسيه عمال يغرس في الوحل وإنتي بتضحكي وتشهدي الله عليه، وإنتي محتاجة ربنا أوي في حياتك إوعي تغضبيه.

خايفة يخطفهم

ديه تشوفي فيها رأي القانون، ولكن إوعي تمتنعي عن الرؤية اللي بتحددها المحكمة لنفس أسباب رقم اتنين.

خايفة يملا ودان عيالك من ناحيتك

هقولك كلمة واحدة، أنا لما بتخيله بيملأ ودان عيالي بقعد بثقة في جلسة مسرحية على كرسي أنتيك وأرّجّع شهري لورا، وأحط رجل على رجل، وأضحك ضحكات متقطعة تعقبها ابتسامة سخرية، وهمس في ودانك بكلمة واحدة، سيبهم يعرفوا الحقيقة لوحدهم، إن ماكانوش عارفينها، ودا لأنك لازم

تتأكدي إن الطفل بفطرته السليمة يعرف يحدد كويس جدا مين اللي بيعمل
ومين اللي مايي عملش، ومين الصح ومين الغلط.

إوعي تحرقني دمك لو سمعتي كلمة كدا ولا كدا.. وحاولي دايمًا تثبتي قدام
ولادك عدم صدق الكلام اللي بيسمعه بأفعالك مش بأقوالك، وعوديهم على
قد ما تقدري ماينقلوش الكلام.

بمناسبة الكلام عن الأب مايصرفش على ولاده، كنت مرة بتناقش أنا
وصديقة مطلقة برضه بتقوللي:

- عارفة يا بت يا مها، الفلوس اللي باخدها من الشغل دي لو بصرفها على
نفسى كلها، كان زمان عندي خواتم سوليتير مش خاتم واحد.

قلتها كلمه مانسيتهاش طول حياتها:

- بالمناسبة الفلوس الكثير اللي بتجيلك دي ببساطة رزق ولادك.

هحكيلكم حاجة واقعية حصلت معايا أنا شخصيا، بعد طلاقى مباشرة والدي
رجع من الشغل مستغرب جدا، ونده على ماما وقالها:

- النهارده حصلت حاجة غريبة جدا في الشغل، زودولي المرتب مبلغ محترم،
رغم إن ماحدث فيهم يعرف أي شيء عن حياتي الشخصية، دا رزق بنتك
وعيالها.

حطي في دماغك حاجة:

أي فلوس بتصرفيها على ولادك مبدئيا هي جتلك عشان رزقهم، وربنا حابب
يستخدمك ليهم عشان تصرفي الفلوس اللي رزقك بيها عليهم، وكمان يديكي
أجر على كدا، شفتي ربنا رحيم إزاي؟!

والله العظيم استحالة ربنا يسبيك وإنتي بتسعي، ورامية حمولك عليه،
تابعيني في أحداث الكتاب هتعرفي حجات كتير بخصوص النقطة دي.

طيب برده ماقولتيليش أعمل إيه عشان أصرف على العيال؟!

مفيش حل غير إنني أخبط البت مفك جنب عينها وتنزل تشحت في أي إشارة،
والواد هتفقله مع الميكانيكي اللي على أول الشارع، أهم يجيبوا مصاريفهم.

والأهم من دا كله متاخذينيش في دوكة..

أنا اتطلقت ليه؟!

طب أنا ضعت ولا إيه؟!

صبرك عليا وهتعرفي كل حاجة.

∞ ∞ ∞ ∞ ∞



الفصل الرابع: المشكلة الثالثة: البحث عن السند والأمان والدعم العاطفي هيببيج

«على خطايانا يجب أن نبكي حقا، وليس علي أي هجر أو أي فراق أو أي مرض أو أي موت، وتلك حال الذين قدروا الله حق قدره».

د. مصطفى محمود

في أول زيارة لها دخلت السنتر وجلست على أقرب أريكة لشاشة التليفزيون.. أشارت لندی بأدب:

- ممكن تجييلي قناة روتانا كلاسيك من فضلك؟ أصل فيلم نهر الحب زمانه شغال دلوقتي.

حاولت ندى أن تكتم ضحكتها وقالت:

- طبعا يا فندم لحظة واحدة.

وجرت نحو المكتب بعد أن انفجرت في الضحك.. طرقت الباب ودلفت إلى الحجرة دون استئذان:

- إلحقي يا دكتور مها، فيه واحدة ست برة نكتة بجد، أول ما دخلت سألتني على الريموت عاوزة روتانا كلاسيك عشان نهر الحب، هو لسه فيه حد بيتفرج على الأفلام دي أصلا!

استغربت حديث ندى بشدة ولم أصدقها للوهلة الأولى، وخرجت من مكنتي على مهل لأتابع هذه السيدة من وراء البارافان.

سيدة تبدو في أوائل الثلاثينات، ملامحها طفولية إلى حد كبير، كانت تنظر إلى التلفاز بمنتهى الهيام، وتتنهد تنهيدات متقطعة تعبيراً عن انفعالها مع مشهد قبلة عمر الشريف مع فاتن حمامة،

(البوسة اللي كانت بعد ما وقع من على الفرس وراح المستشفى)، جريت نحو المكتب وأغلقت الباب بهدوء وألصقت ظهري به بعد أن جحظت عينا، وقلت بصرخة مكتومة:

- يادي النيلة! هو إنتي منهم؟ خلاص عرفت يا شابة إيه اللي جراك...

كانت ندى تقف في الخارج وقد دخلت في نوبة من الضحك الهستيري، طلبت منها أن تتوقف فوراً عن الضحك، وتدخل هذه السيدة الحاملة لنعرف حكايتها.

دخلت إلى المكتب، فتحت حقيبتها وأخرجت وردة حمراء وابتسمت قائلة؛
معلش حاجة بسيطة... إن شاء الله بالتوفيق..

- تسلميلي، بحب الورد البلدي أوي.

- بتعرفي في لغة الورد يا دكتور؟!

- آه الورد الأحمر تعبير عن الحب.

- فعلا، أنا والله حبيتك في الله جدا من قبل ما أشوفك، بنت خالتي بقت
عضوة هنا معاكم وحكتلي عن حضرتك كثير، بنت خالتي مدام مروة،
انضمتكم الأسبوع اللي فات، هي مهندسة معمارية.

- آه افكرت، حضرتك أستاذة هيام، مظبوط؟

ابتسمت:

- ياه، مبسوفة جدا إنك افكرتيني، مروة قالتلي فعلا إنها حكتك عني، بس
للأسف كنت مشغولة، كان عندي معرض الأسبوع اللي فات كله، ودا اللي
أخرنى.

- آه، حضرتك رسامة، باشمهندسة مروة قالتلي فعلا.

- مش رسامة قوي يعني، يقولو رسمي حلو.

سكتت لبرهة ثم قالت فجأة:

- هدخل في الموضوع على طول عشان ماضيّعش وقتك.

أنا يا ستي سافرت مع بابا وماما السعودية من وأنا عندي خمس سنين، طبعا
كان مقفول علينا جدا ومالناش احتكاك مع حد خالص، وماكاناش بنخرج كثير..
حضرتك عارفة العيشة في الغربية صعبة.

كنا بنزل في الأجازات بس، كنت كل أجازة بشتري الأعداد الجديدة من
روايات زهور وعبير وكل شرايط الفيديو بتاعة الأفلام الرومانسية.. عشان
أسلي نفسي طول السنة، وكمان كنت بحب الرسم قوي.

ولما وصلت للثانوية العامة جبت مجموع مش بطال.. بعد المعادلة لقيت إن
المجموع قل أوي... ولما زعلت لأنني تعبت جامد ماما قالتلي البنات مالهاش
غير بيتها وجوزها يا هيام، خشي أي كلية مش هتفرق، بس الحمد لله
مجموعي دخلني كلية الفنون الجميلة، ونزلت مصر وقعدت عند عمتي، لأن
بابا وماما فضلوا في السعودية.

وابتسمت بحزن ثم قالت:

- عمتي عندها ولد وبنت، كانت علاقتي بيهم سطحية جدا، بشوفهم بس في الأجازات، لحد ما نزلت مصر وعشت عندهم.. مش هكذب عليكى مشاعري بدأت تتحرك من ناحية ابن عمتي...

ورغم إنى كنت شايفة عيوبه لكن العشرة والأيام خلتنى اتعلقت بيه أكثر.. عمتي كان ليها نظام في تربية ابنها... أعتقد انه نظام سائد في بيوت كثير... يعني كانت بتخلينا نعمله الشاي ونرؤقه أوضته، وكان ممكن ساعات يتناول على بنت عمتي بطرق مختلفة... وطبعاً كانت عمتي دايماً تقف في صفه مهما كان غلطان، وتيجي على بنتها وتقولها احترمي أخوكى... كان براحتة بيخرج وقت ما هو عايز ويرجع وقت ما هو عايز.. ومش شايل أى مسؤوليات...

المهم هو كمان بادلنى نفس الشعور، واتفقنا إنه أول ما يتخرج من كلية التجارة يفتح عمتي وبابا.

عشت أجمل أيام حياتي وأنا مستتية اليوم اللي هنتجوز فيه.. ورغم كل عيوبه الواضحة قدامي إلا إنى كنت معمية عنها تماماً.. لأنى ما صدقت أخيراً لقيت واحد هطلع معاه كل طاقة الحب اللي جويا.

بعد الخطوبة بدأت ألاحظ عدم احترامه ليا، ولما كنت بشتكى لماما كانت دايماً تقوللى بكرة يعقل لما يتجوز، ما كل الرجالة كدا، إحنا عايشين أهو ومستحملين.

نظرت إليها بعدما انقبضت لأنى توقعته الأحداث التالية..

أكملت حديثها:

- المهم الحمد لله إتجوزنا، وبعد الجواز ظهرت عيوبه بشكل فج جدا، كنا بنتخانق كثير أوي...

وكنت أقعد أقوله حرام عليك أنا محتالك تقعد تتكلم معايا وتحس بيا، وخاصة بعد ما حملت في بنتي مريم، كان بيسيبنى ويخرج وممكن كمان بيات برة وماعرفش عنه أى حاجة، وبعد ولادة مريم الوضع ساء تماماً والفجوة زادت جدا، ولقيته في يوم جاي من برة وقاللى: أنا مسافر جتلي فرصة شغل برة مصر، كلها كام شهر هظبط أمورى وهبعثلك.

سألته باهتمام:

- وفعلاً سافر؟

وعند هذا السؤال تحديدا انفجرت في البكاء... أخذت تمسح دموعها مثل الأطفال ثم قالت:

- سافر ومارجعتش... الكلام دا بقاله ٣ سنين... ما عرفش عنه أي حاجة...
قعدت أول سنتين أدور بكل طريقة عنه عشان بس أعرف حي ولا ميت،
وفعلا من سنة عرفت إنه بخير واتجوز واحدة أجنبية هناك، مهما أوصفلك
الأيام بتعدي عليا إزاي مش هتتخلي، أنا قبل ما أنام بالليل بفتح كل أنوار
الشقة من كتر الرعب أنا ومريم.

دا غير شعوري الدائم بالاحتياج العاطفي، وفقدت خلاص الشعور بالأمان للأبد،
لما سمعت من مروة بنت خالتي عن الجمعية بتاعتك قررت آجي انضم ليكم،
عشان تسندوني وتساعدوني أطلع من أزمتي.

- إنتي حد مميز جدا بالمناسبة ومش هتكوني مجرد عضوة معانا، أنا هخليكي
تمسكي منصب إداري.

قالتلي بحزن:

- اللي تشوفيه، أهم حاجة تشوفيلي حل لشعوري الدائم بالفراغ العاطفي.

- وليه ما طلبتيش الطلاق؟!

- عشان عندي أمل يرجع لبيته وبنته.. زي ما ماما دايمًا بتقوللي نزوة وهتعددي.

- بس؟

- وعشان بحبه.

- تفتكري؟

- مش عارفة، بس...

دكتورة مها، أنا عاوزة أحب واتحب، ودا الإنسان الوحيد اللي حبيته في حياتي،
مش حاسة إنني هعرف أحب حد غيره.. ولا هلاقي حد يحبني وأنا مطلقه
ومعايا بنت.

وانهارت في البكاء مرة أخرى...

حاولت أن أهدئ من روعها، وقلت لها بحنان:

- بتحبي مريم يا هيام؟!

- آه طبعا.

- متأكدة؟! ماجالكيش أبدا شعور إن مريم موقفة حالك لو في حالة إنك مثلا
فكرتي في الانفصال إنك تشوفي حياة جديدة؟

تلعثمت قائلة:

- مريم رزق وأنا بحمد ربنا عليه.

- ماجاوتيش السؤال.

قالت والدموع محتبسة في عينيها:

- مش هكذب عليكى.. أنا بحب مريم وعاوزه برضه يقالي زوج، إيه التعارض؟! إنتي ماتعرفيش آخر عيد دا عدى عليا إزاي.

أسندت ظهري على الكرسي وقلت لها بهدوء:

- طيب اسمعيني كويس... هحكيلك قصص بنات وستات معانا في الجمعية، هعرفك عليهم إن شاء الله...

قاطعتني بأدب:

- أنا عارفة اللي هتقوليه، بس يا دكتورة مها دي فطرة ربنا، وأنا واحدة جربت يقالي بيت.. وزوج.. عاوزه أحس إني مع زوجي بخرج وأروح أزور أهله وأروح لأهلي وأبقى سعيدة...

نسهر بالليل نتفرج على فيلم ولا مسرحية... ونقعد نضحك مع العيال ونشتريلهم طلباتهم سوا.

قلت لها:

- اسمعيني من فضلك، العيد اللي فات دا كذا حد جه الجمعية بيشتكي من حاجات مختلفة، مدام إيمان منهم، وحكتلي الموقف التالي:

كانت واقفة في الشباك بتبص على العيال اللي بيلعبوا في الشارع، لابسين لبس العيد اللي باباهم ومامتهم جابوهولهم... بتبص لحالها بأسى... أحمد جوزها راجل محترم ويحبها أوي ومش مخلي نفسها في حاجة، وعايشة معاه أحلى قصة حب في الدنيا...

لكن للأسف ربنا ماقدرلهاش الإنجاب.. بتبكي بالدموع وتقول برضه أنا نفسي أحب وأتحب، بس مش زيك من زوج.. لأ.. هي نفسها تحب وتتحب من طفل يقولها يا ماما، يحضنها حضن بريء مالوش غرض، يقول كلام طفولي تقعد تضحك عليه.. تجيله لبس وتشوف الفرحة في عينيه باللعبة الجديدة.

إستني لحظة، هنروح دلوقتي لعلا، علا كانت جنب التليفون ليلة العيد بتبكي... أصلها غصب عنها استنت مامتها تتصل تعيد عليها زي كل سنة... بس المرة دي مش هتتصل... أصل مامتها ماتت السنة اللي فاتت، علا ابنها فرحان قوي باللبس الجديد وجوزها جه من برة جايلها لبس العيد ويقولها قومي وربني.. كل سنة وإنتي حبيبتى، بص في وشها وقالها: مالك يا علا؟

قالتله يا مروان أنا نفسي أحب وأتحب، أنا عاوزة حضن ماما يا مروان، اللي مفيش حاجة في الدنيا هتعوضني عنه.

ثواني من فضلك...

أما بقى ياسمين...

ياسمين أخوها مقاطعها يقاله سنتين... وهي طالعة على السلم شافت أخو جارتها طالع عندها وشايلها كل ما لذ وطاب بمناسبة العيد، ياسمين كانت بتحب أخوها قوي، قعدت تعيط وتقول ياه الأخوة فطرة، وأنا عندي أخ كان نفسي قوي أحب واتحب من أخويا، وأحس إن عندي ضرر وسند.

فهمتي حاجة؟

إننا نحب ونتحب دي فطرة، بس الحب أنواع، تأكدي إن دايمًا بصرك هيمتد لنوع الحب اللي ناقص عندك، آه صح كل حب وليه طعم وممتعة مختلفة عن الثاني، وآه معاكي إن مفيش حب يغني عن حب، لكن عشان تعيشي سعيدة قدامك اختيارين.

ترمي نفسك لأي حد عشان أحب واتحب ودا ما اعتقدش حل يناسبك.

تدعي ربنا وتنشغلي بالحب اللي عندك لحد ما ربنا يكرمك بالحب اللي يناسبك.

ولحد ما يبجي تأكدي إن في عالم موازي فيه ناس تتمنى تبدل معاكي، تاخدي الحب اللي عندها وتديها الحب اللي عندك، لأن ما حدش فينا مدرك إن اختيارات ربنا لنا هي الصح، بس نفهم الحكمة.

قالتلي:

- طيب واحتياجي للسند؟

- السند الأول والآخر هو الله يا هيام، ثم البشر، وساعتها لازم يكون السند مش حيطة أسند عليها، ولا خوف بيان في مواقف تافهة، ولا صرف فلوس والسلام، السند هو الضهر اللي عمره ما يكشفك أو يخذلك، غير كدا يبقى إنتي بتكدبي كدبة على نفسك وبتصدقها، فهمتي يا هيام؟!

تنهدت بعدما ارتسمت على وجهها علامات الارتياح إلى حد ما:

- آه، فهمت، الحمد لله على كل حال.

قلت لها وأنا أغمز بعيني:

- أنا بحبك أوي على فكرة.. والوردة فرحتني بجد.

جلسنا بعدها نتحدث لساعة كاملة، وودعتها بعدما وعدتني أن تتولى منصبا
مهما جدا في الجمعية:

- هتحل مشاكل كل الناس اللي عاوزة تحب وتتحب.

تعليقي بما إني الكاتب وبتاع...

هيبيبيبيب... آه والله الكلمة دي ضيعت أجيال وخربت بيوت، عاوزة أحب
وأتحب وبعقبها هيبيبيب، الروايات والأفلام الرومانسية غير المنطقية ضيعت
بنات جيل بحاله، خلتنا نعلي سقف توقعاتنا، قوم بعد الجواز السقف وقع على
دماغنا فلقتها نصين... أي والنعمة...

أنا كـ«مها» كان عندي طقوس خاصة عند مشاهدة الأفلام وقراءة الكتب اللي
من النوعية دي..

كان لازم أخذ وضعية لبنى عبد العزيز وهي بتكلم عبهليم في «التشليفون»
في فيلم الوسادة الخالية..

(اللي مش عارف الوضع أرجوكم ماتحرجونيش أكثر من كدا)

الحاجات دي كانت بتغسلني من جوة، وكنت بقوم بعد قراءة أي رواية وبكأني
عاملة دماغ منقوع البراطيش المعتمر..

كنت بحس خير اللهم اجعله خير إني كائن منشكح.. الفراشات بتطير فوق
شعري والقلوب بتنط من عيني، وكنت بحس الأرض بقت ساحة جليد، وأنا
بالرينا بتتزلج بكل خفة ورشاقة.

الكلام اللي فوق دا أدى إلى إني لما اتجوزت دخلت الجواز وأنا ميح...

وبعد الجواز تمحورت حواليه بشكل غير طبيعي.

ماكانش عندي أي طموح ولا أي هدف ولا أي حاجة في الحياة سوى إن
علاقتنا تتحسن عشان...

عشان...

يا دي الكسوف.

عشان يبجي اليوم إننا نضرب بعض بالمخدرات الريش، والريش يتنطور على
الأرض.. وماعرفش مين كان هيلمّه، ولا كان عندي مخدة ريش أصلا...

ماكنتش عارفة إن الجواز مسؤولية وحاجات كتير جدا، والقصص الوهمية اللي
آخرها العريس والعروسة اتجوزوا وعاشوا في تبات ونبات وخلفوا صبيان
ونبات...

ماحدث كملها لنا وقالنا وهيحدثوا بعض في الآخر ببلح أمهات... طالما
ماحطوش أهدافا مشتركات... ومافقتش من الوهم اللي كنت فيه إلا لما
اتطلقت...

ساعتها بس فهمت إن الخريطة الذهنية بتاعتي كانت متبرمجة إن معنى كلمة
حب هو حب العروسة للعريس والجري للمتاعيس.. وهو كان عنده حاجات
تانية خالص في خريطة الذهنية... خلتنا ماتقابلناش أبدا في نقطة... ولما
قعدت مع نفسي بعدين فهمت إن فيه أنواع كتير جدا في الدنيا من الحب،
أولهم:

حب ربنا

ثم حبي لولادي

حبي لإخواتي

حبي لبابا وماما

حبي لصاحباتي المخلصين والضحكة الحلوة اللي بتطلع معاهم من القلب...

حبي لقرايبي وولاد خالاتي...

حبي لجيرانتي....

حبي للقطعة بتاعتي وهي بتتمسح فيا عشان أأكلها الصبح...

وفيه حب ماكنتش واخدة بالي مني خالص...

عارفين حبي لمين؟

حبي لنفسي...

لما درست الكوتشنج عرفت إن المفروض يكون عندنا حاجة اسمها الـ self
esteem

ودا تقدير الإنسان لذاته وحبه غير المشروط ليها...

Self esteem: حب الذات

بيرمز إلى إيه هو شعورك تجاه نفسك، يعني من الآخر هو مرآة أو انعكاس
لحبك الإيجابي لنفسك.

وغالبا ينتج من التجارب والمواقف اللي أدت إلى تشكيل شخصيتك دلوقتي.

كتير مننا بيعتبر إن حب الذات شيء مش صح، ويعتبره أنانية أو مش من
حقه، ودا يخليه يتنقل تدريجيا لمرحلة جلد الذات وتحميلها فوق طاقتها،

وتعريضها دائما للوم غير المبرر والشعور بالذنب على كل صغيرة وكبيرة،
وانتظار التقدير من برة، مايبكونش نابع من جوه...

والغريب إننا ممكن نلاقي أشخاص عندهم Self confidence، أو ثقه بالنفس،
لكن ما عندهم ش حب لذاتهم، ودا لأن الثقة بالنفس هي شعورك تجاه قدراتك
اللي ممكن جدا تتغير من موقف للتاني...
لو ضربنا مثال هيام...

هي رسامة ناجحة جدا وعندها ثقة في دا... لكن كونها منفصلة عن زوجها
خلاها مش واثقة في نفسها في النقطة دي...

وبناء عليه لو ما عندهاش حب غير مشروط لذاتها، الموقف دا هيخليها تتعب
جدا وهتنتظر الدعم من برة...

وهتفضل تدور على الحد اللي هيديها الحته الناقصة... لأنها للأسف مش
جواها... وهي حته التقدير... اللي مرتبطة بحب الذات.

الحل هنا:

- حبي نفسك.

- ركزي على مواطن القوة عندك.

- حبك لذاتك مش هيتأثر حتى لو غلِطتي، أو حياتك مشيت عكس الاتجاه اللي
كنتي مخططاه.

- ماترهنيش تقديرك وحبك لذاتك بحب معين، وهو حب راجل يدخل في
حياتي ولو مالمقيتوش خلاص هفقد حبي وتقديري لذاتي.

واستمعي بأنواع الحب الثانية في حياتك.

- لو مشيتي الخطوات اللي فاتت صح، أوكدلك إنك لو جتلك فرصة اختيار
زوج هتختاري صح، لأنه مش نابع من احتياج عاوزه أسده ولكن نابع عن
قناعات.. ولو ما قابلتيش الشخص المناسب مش هتزعلي وهتكلمي حياتك.

عارفين المشكلة في إيه؟

المشكلة في التربية بتاعتنا اللي خلطنا كبنات نعلق الآمال كلها على الجواز...
في حين الجواز يا جماعة وسيلة مش غاية أقسم بالله...

بمعنى، إني لا أنكر النوع دا من الحب وهو حب المرأة للرجل، ولكن أنكر
تعظيمه في خيال البنت بشكل غير عادي، لدرجة إنه يصبح غاية وعاوزه
أحقها.. أنا بتجوز بس عشان أحب وأتحب، وعشان عندي طموحات مؤجلة

هحقها مع زوج المستقبل، فبحضن القَطْر وبرمي نفسي في أي حوار عشان
الهدف النبيل دا...

ومابشوفش أي حب ثاني حواليا..

وفي حين في عالم موازي للأسف بعض الأسر ربّوا ولادهم الشباب على
الأنانية وانعدام المسؤولية، وإنه يحب نفسه جدا ويقدر ذاته جدا جدا...

لو عملنا جدول مقارنة، زي بتاع أيام المدرسة، بين تربية أغلبية الولاد والبنات
في مجتمعنا...

قبل الجواز:

الولد: ألف بنت تتمناك، إوعى تتنازل عن أيتها حاجة.

البنات: إرضي يا بنتي، البنت مالهاش غير بيتها وجوزها وبكرة يتغير بعد
الجواز.. حد لاقى عرسان اليومين دول.. الراجل مايعيبوش غير جيبه.. وأما
يتقدم واحد جيبه مخروم... إرضي بقى عشان تلحقي... المهم إرضي
وخلص.

أثناء الجواز:

الولد: إوعى تتنازل يا واد أحسن تمشّي كلمتها عليك، إنت الطرف الأقوى..
طلقها لو قالت يمّ.

البنات: إنتي خلاص اتجوزتي، إوعي تتطلقي أحسن تفضحيننا، الست تعشش
والراجل يطقّش.

بعد الطلاق:

الولد: إتجوز طبعاً، هو فيه راجل يقدر يعيش من غير ست تخدمه ويقرفها في
عيشتها، وعادي بنات بنوت وهيرضوا بيك.. إنت راجل.. هنجوزك ست ستها.

البنات: عيشي بقى ربي ولادك، ربنا يجعل عوضك فيهم... واصرفي عليهم
واتهرسي واعلمي دور مش دورك أصلاً.

طب أنا بنت وماليش غير بيتي وجوزي؟!

لا معلش إلبسي في حيطة ماتحكيلناش مشاكلك الشخصية... آه... طب...

عازرة أحب زي شادية وكمال الشناوي...

لأ خلاص دبل كيك واقلبي الشريط على الوش الثاني...

طب وخريطتي الذهنية؟! أروح بيها فين؟!

اطلعي على برنامج أريد حلا.. ولعي فيها ماتقرفيناش بقى.

السؤال اللي يطرح بلح.. إزاي قادرين نعيش والفجوة رهيبة بين تربية الولد والبنت، وتشكيل الخريطة الذهنية بتاعة كل واحد فيهم بالمنظر دا؟

ولا ننكر طبعا إن فيه شباب فعلا محترمين بجد، داخل الجواز لأهداف جميلة عاوز يحققها، يلاقي يا عين أمه أخطبوط متنكر في شكل واحدة اسمها مراته، مابتعملش أي حاجة في الحياة غير مراقبته، ووضع جهاز تنصت لمعرفة خط سيره..

رحت لأصحابك ليه؟

ماكلمتنيش ليه؟

منك لله، الاهتمام ما بيتطلبش؟

قوللي يا بيبي خمستلاف مرة!

ما هي من الأول فيه صواميل واقعة في دماغها أصلا، وداخله بتدور على حاجة واحدة،

كمال الشناوي، أو فاروق الفيشاوي، على حسب طموحها بقى، ونرجع نقول ارتفاع معدلات الطلاق وارتفاع سن الزواج للشباب والبنت...

ماشي، خلصتي؟!

قوليلنا بقى:

أنا اتطلقت ليه؟!

أنا ماليش زوج ليه؟!

أنا ماكنتش معجبة بكمال الشناوي، أنا كان فتى أحلامي أصلا عماد حمدي...

يكونش دا السبب؟

ثواني.. الصبر...

∞ ∞ ∞ ∞ ∞



الفصل الخامس: المشكلة الرابعة: الأبناء بعد الانفصال...

محمود ابن طنط دولت

(كلكم راع وكلكم مسؤول عن رعيته)

محمد ^

بينما كنت أتناول قهوتي الصباحية، دخلت ملك إلى المكتب وقالت وهي تقوم بترتيب الأوراق:

- الراجل البواب غلط وخط الجرنال دا قدام باب السنتر عندنا... دخلته خفت يتهدل لحد ما أسأله دا بتاع مين، خليه عندك في المكتب يا دكتور، وشوية وهروحله أديهوله.

كنت أنظر إليها بعدم اكتراث حتى وضعت الجريدة أمامي مباشرة، ولفت انتباهي خبر مكتوب بالمانشيت العريض «المهندس محمود الأسعد يتقدم بدعوى قضائية ضد والديه رجل الأعمال الشهير حمدي الأسعد والدكتورة دولت الفقي».

«قام المهندس محمود الأسعد بتقديم دعوى قضائية ضد والديه، حيث يطالب مقدم الدعوى بالتعويض عن حرمانه من حنان الأب والأم منذ نعومة أظفاره بسبب انفصالهما... هذا وقد طالب الأسعد بإرساء مبدأ قانوني وقضائي في الحالات المماثلة لتعويض الأبناء عن معاناتهم بسبب انفصال الوالدين، وتقصيرهما تجاه الأبناء الذين يدفعون ضريبة اختيارات الوالدين الخاطئة في الحياة، وقد حددت دائرة التعويضات بمحكمة جنوب القاهرة الجلسة التي تقرر انعقادها في الحادي عشر من الشهر المقبل».

نظرت إلى الجريدة.. وأخذت أقرأ الخبر مرات عديدة، غير مصدقة لما أراه، لاحظت ملك انفعالي فقالت بصوت يشوبه القلق:

- فيه حاجة يا دكتور مها؟!

- ناوليني موبايلي يا ملك بسرعة.

قمت بالاتصال بصديقتي الصحفية رانيا سعد الدين.

- ألو.. إزيك يا روني عاملة إيه؟

- أهلا يا موها.. الناس الوحشة اللي ناسيانا.

- أنا؟ لا والله دا إنتي على طول على بالي.
- فينك يا بنتي رحتي وقولتي عِدّولي.
- معلش حقك عليا، كنت مشغولة شوية اليومين اللي فاتوا، بقالي كثير ماكلمتكيش.. عندي أخبار جديدة كثير جدا.
- إيه فرحيني.
- لأ مش اللي في بالك... عملت جمعية... هقابلك أحكيك على كل حاجة، بس المهم بقولك إيه.. قرئت النهارده خبر في الجرنان إن محمود الأسعد رافع قضية على والده ووالدته وكلام كبير كدا..
- آه يا بنتي دا الموضوع دا بقاله شهر في المحاكم.
- طيب بقولك يا رانيا، أنا عاوزة أقابل الباشمهندس محمود دا ضروري جدا.. عشان خاطري.
- إيمممم.. ماشي إديني فرصة كدا وعلى بالليل هكون وصلت لرقمه، هبعتهولك على الواتس.
- مانحرمش يا رانيا.. وإنتي كمان لازم أقابلك ضروري نقعد وأحكيك على الجمعية النسائية بتاعتي.
- آه الجمعية النسائية لحل مشاكل الستات النكدية.. ههههههه.
- هههههههه ماشي اتريقي... اصبري والله هتبقى خبطة صحفية جامدة جدا ليكي.. هتعجبك الفكرة قوي.. بس أنا لسه في مرحلة تأسيس الجمعية... هظبط الدنيا وهكلمك على طول.
- ماشي يا مها.. زي ما اتفقنا بقى هبعثلك الرقم بالليل إن شاء الله.
- وفي تمام الساعة التاسعة مساء، أرسلت لي رانيا هاتف الباشمهندس محمود... استجمعت قواي وطلبت الرقم..
- ألو.
- أيوه، مساء الخير باشمهندس محمود..
- مساء النور.. مين حضرتك؟
- أنا الدكتور ه مها سامي.. من غير مقدمات، أنا بأسس جمعية لمناقشة مشاكل اجتماعية بتتعرض ليها المرأة عموما والمطلقات والأرامل خصوصا، ويهمني جدا أقابلك أسمع منك حاجات كثير.

ضحك ثم قال:

- دا بجد ولا صحفية؟!

ضحكت بدوري:

- آه والله بجد، ولما نتقابل هعرف حضرتك تفاصيل أكثر.

- مفيش مانع... إيه الميعاد اللي يناسبك؟

- لو ممكن تنورني في الجمعية عشان تتأكد بنفسك ما عنديش مشكلة.

- تمام يناسبك بكرة الساعة كام؟!

- ١١ صباحا كويس؟!

- كويس جدا، هستأذنك أعرف العنوان.

- آه طبعا، العنوان «.....».

في انتظارك وتتقابل على خير إن شاء الله.

أغلقت الهاتف وجلست أعد الساعات، فلقد كاد الفضول يقتلني لمعرفة سبب قيام هذا الشاب بهذه الدعوى الفريدة من نوعها.

وفي صباح اليوم التالي في تمام الحادية عشرة صباحا، رن جرس الباب...

فتحت ندى الباب... حينما سمعت جرس الباب وقفت كعادتي خلف البارافان أراقب الموقف، فإذا بشاب طويل ذي جسم رياضي أسمر البشرة، يبدو أنه على مشارف الثلاثين من العمر...

قال بأدب:

- محمود الأسعد، وعندني معاد مع الدكتورة مها سامي.

أشارت ندى نحو الداخل، وقالت بصوت ولهان:

- اتفضل ارتاح لحظة هبلغ الدكتور.

خطت مسرعة نحو مكثبي، وأغلقت الباب، وإذا بها تفتح باب المكتب وقد بدت السعادة على ملامحها، وقالت ببلاهة:

- يا لهوي يا دكتورة مها، اللي شفته برة لا يتكتب ولا يتقري، واحد برة خير اللهم اجعله خير مَرَّ بعضلات عريض المنكعين شلولخ كدا في نفسه... هيبسبح... خصيمك النبي ماترديله طلب.

ضحكت بشدة:

- أردله إيه دا أنا اللي محتاجاله.. روجي شوفيه هيشرب إيه ودخله بسرعة.
جلست أتحدث معه، وأخبرته عن فكرة الجمعية، وحكيت له كل شيء من
البداية، طوال حديثي كان ينصت إلي جيدا ولم ينطق بكلمة واحدة...
وبعدما انتهيت سألني بأدب:

- إيه المطلوب مني تحديدا أقدر أساعد حضرتك بيه؟!
- بص أنا هكون صريحة معاك، أنا عاوزة أسمع قصتك لأنها هتفيدني جدا في
إني أنصح السيدات اللي في الجمعية، أو حتى الرجالة اللي معانا، إزاي
تتعامل مع نفسية الأولاد بعد الانفصال أو فقدان الأب أو الأم.
(ماقدرتش أقولّه: إنت رفعت قضية على باباك ومامتك ليه؟)
تنهد بحزن وقال:

- أنا والدي ووالدتي منفصلين من وأنا عندي ست سنين.. أنا فاهم كويس جدا
إن في بعض الأحيان بيكون انفصال الأب والأم رحمة وأحسن لصحة الأبناء
النفسية، أكثر من الاستمرار في جو فيه أسرة مفككة الأب والأم
مايبحترموش فيه بعض...

ولكن دا بشرط واحد إن يتم إدارته بشكل مضبوط بين الطرفين والأولاد...
غير كدا الحلين زي بعض.

المشاعر اللي حسيت بيها بعد انفصال والدي ووالدتي دايمًا بفتكرها زي ما
تكون امبارح...

كنت دايمًا حاسس بالخوف والقلق، وأوقات كنت بحس بالذنب لأنني كنت
مفكر إن أنا السبب، كنت بحلم بكوايبس بصفة مستمرة.. دا غير شعوري
الدائم بالوحدة والضعف والعجز...

بعد الانفصال طبعًا والدتي أخذتني ورحنا عشنا مع جدتي ربنا يرحمها... كنت
دايمًا بحس بمشاعر العداة المتبادلة بينهم، وكان كل واحد فيهم بيحملني
رسايل أوصلها للطرف الثاني...

ولما كنت بروح أزور والدي كنت بلا حظ إنه بيتكلم مع عماتي عن ماما بشكل
كان بيزعجني...

وبعدها بفترة بسيطة اتجوز.. وربنا منّ عليه بأولاد تانيين كنت بحسه إنه بيحب
إخواتي أكثر مني...

دا غير إنه كان بيتهرب أوقات كثير من الوفاء بالتزاماتي المادية... وكذلك والدتي كانت دائما تتكلم عن والدي مع جدتي واخوالي بشكل كان بيحرجني جدا... كنت بكره نفسي لما كان خالي عماد يقوللي:

- أبوك مش بيحبك يا محمود.

ويقعد يحكي لي في مواقف كثير تثبت قد إيه إن والدي كان سيئ... وبعدها بفترة والدتي كمان اتجوزت وسابتنني لجدتي الله يرحمها...

ودا أصابني بالحزن والاكتئاب فترة طويلة..

وكل دا أدى إلى إن مستوايا الدراسي كان منخفض بشكل كبير...

كانوا بيشفونني كل فترة كزيارات، وكل واحد فيهم شاف حياته...

وعدت عليا فترة كنت ضايع حرفيا... لحد الثانوية العامة لما قابلت أستاذي الفاضل أستاذ أسامة... قربني منه بعد ما عرف ظروفني، واتعلمت منه حاجات كثير جدا، وكان له الفضل بعد ربنا في تغيير مسار حياتي... والحمد لله جبت مجموع كبير ودخلت كلية الهندسة واتخرجت بتقدير جيد جدا... لما كبرت فهمت إن والدي ووالدتي كان اختيارهم لبعض من البداية اختيار خاطئ.. والانفصال حق طبيعي جدا من حقوقهم في حالة استحالة العشرة...

لكن اللي ماكانش من حقهم إنهم يضيعوني..

كان لازم كل واحد فيهم يظهر احترام للطرف الثاني بشكل أفضل من كدا...

كان ممكن جدا يبقى طلاقهم حضاري...

ومايظلمونيش بينهم في النص، وفي الوقت دا بس كان هيبقي الاختيار دا أفضل من الاستمرار في حياة أسرية غير مريحة.

امتلات عينايا بالدموع التي حاولت إخفاءها.. فلقد تذكرت أبنائي ورجوت من الله أن يكون سندي في تربيتهم...

أفقت من شرودي على صوت محمود:

- طول عمري بفكر إنهم لازم يفهموا إن اللي عملوه معايا كان غلط... لأنهم بيرفضوا النقاش معايا... ومالقتش قدامي غير إنني ألجأ للقانون، ورفعت الدعوى القضائية اللي الناس كلها مستغرابها، وأكد حضرتك سمعتي عنها، ودا سبب اتصالك بيا.

قلت له في وجل:

- فعلا مش هكدب عليك دا سبب اتصالي بيك في البداية.. لكن أنا فعلا نفسي تنضم معنا للجمعية.. وتساعدنا في إنك توجّهنا إزاي نحقق الدعم النفسي للأولاد في حالة فقدان الأب أو الأم تحت أي ظرف.

قال دون تردد:

- أنا مستعد جدا لأنني أعجبت بكلام حضرتك في البداية... وكمان فيه حاجات تانية كتير هقدر أفيدكم بيها في الجمعية...

بس هبقى أقولك عليها في وقتها.

وابتسم ابتسامة يملؤها الغموض.

- هنتورنا يا باشمهندس محمود، وشرف لنا بجد إنك هتكون معنا، بس ممكن أسألك سؤال؟

إنت زعلان إن والدتك اتجوزت؟

أجاب دون تردد:

- إطلاقا.. مش دي مشكلتي.. أنا استحالة أفكر تفكير جاهل إني أمنعها حق من حقوقها في الحياة، لكن اللي كان دايمًا بيزعجني إنها قصرت جدا من ناحيتي هي ووالدي من أول يوم في الطلاق، وهما الاتنين حملوني تمن الغلطة كلها، في حين إني ماكانش ليا أي ذنب في أي حاجة.

نظر في ساعته وقال بعد أن هم بالوقوف:

- سعيد إني قابلتك، لكن لازم أمشي عشان ورايا ميعاد.

قلت له بتردد:

- ممكن أطلب منك طلب؟

نظر إليّ مستفهما، فأكملت قائلة:

- عاوزه أقابل والدتك، ينفع؟!

أخرج قلما وورقة من جيبه، وكتب الرقم ووضعها على المكتب، وقال:

- إن شاء الله أحدد موعد تاني ونشوف إزاي أقدر أساعد حضرتك في الجمعية.

انصرف محمود، وشعرت أن قلبي كاد ينفطر من الحزن... ونظرت إلى هاتفني المحمول بعد أن تذكرت ربهام... فلقد سافرت مع زوجها الفترة الماضية، ولكنني شعرت باحتياج شديد إلى التحدث معها.

قمت بالاتصال بها لمعرفة هل عادت من السفر أم لا.

- ياه، إنتي في مصر.. رجعتي إمتى؟

- لسه راجعة النهارده.. معلش ماكنتش عارفة أكلمك خالص طول ما انا برة مصر، كنت مشغولة جدا... طمنيني على الجمعية، وصلتي لفين؟

- لأ أنا لازم أشوفك بكرة، عاوزاكي ضروري جدا.

- طيب ماشي، خلاص تعاليلي النادي الساعة واحدة الظهر كدا.. ماشي؟

- خلاص ماشي.

كنت منتظرة ريهام في النادي، وجلست أطالع كل الأطفال ولسان حالي يقول:

- من منكم يحمل هما أكبر من عمره فوق كتفيه الصغيرتين؟

جاءت ريهام وتعانقنا بشدة، وحكيت لها كل ما حدث طوال فترة غيابها، وحتى حكاية محمود الأسعد.

- إيه رأيك، أتصل بوالدته؟

- إمامم، مش عارفة، إنتي عاوزة تكلمها ليه؟

- بصراحة عاوزة أعرف إيه الأبعاد النفسية اللي تخلي أم تعمل كدا مع ابنها، وبينني وبينك يمكن أعرف أصلح العلاقة بينهم.

- ماشي اللي تشوفيه، بس أنا شايفة إن فيه حاجة أهم المفروض نعملها، نروح لحد مختص نفهم منه إيه الأبعاد النفسية للأطفال في الوضع دا، وإزاي نتغلب عليها، عشان تقدري بجد تساعدي الستات اللي في الجمعية.. وإنتي كمان لازم تعرفي تتعامل مع ولادك إزاي.

- تعرفي حد؟

- آه، صاحبتني دكتورة نهى الطنب... دكتورة نفسية وشخصية ممتازة.

- فوراً جُدِلي معاها ميعاد... وأنا هتصل بدكتورة دولت والدة محمود، لازم أقابلها وأسمع منها.

∞ ∞ ∞ ∞ ∞

وبعدها بيضعة أيام...

- أهلا وسهلا يا دكتورة دولت، أنا سعيدة جدا إن حضرتك وافقتي تقابليني.

تنهدت بحزن:

- أهلا بيكي يا حبيبتي.. الحقيقة أنا قررت أقابلك بعد ما حكيتيلي اللي حصل بينك وبين محمود.

- أنا سمعت منه، ولو وقت حضرتك يسمح تحكي لي من وجهة نظرك.

- أنا زيي زي أي واحدة بتتطلق بيكون قدامها اختارين، يا إما تضحي بحياتها وتعيش لولادها.. يا إما تيجي شويه علي ولادها في سبيل سعادتها..

أنا عارفة إنني غلطت في حق محمود لما اتجوزت.. كان لازم أعيش عشانه، لكن دا كان أكبر من طاقتي واحتمالي فعلا ساعتها، خاصة إنني فعلا ماشفتش يوم عدل مع باباه...

وسكنت بعدما أخرجت منديلا من حقيبتها لتمسح دموعها، ثم أكملت:

- ماكانش عندي حل بعد جوازي غير إنني أهرب.. لأنني كل ما كنت بشوف محمود كنت بفتكر الماضي، وكان زي مراية بتفكرني إنني إنسان سيئة وظلمته...

- للأسف دي مشكلة أي واحدة بتنفصل أو زوجها يموت وهي معاها أولاد... وماحدث بيتناول الأزمة بشكل مضبوط..

لازم نلجأ للمختصين عشان تتعامل مع نفسية الطفل بشكل سليم.. لأن وهو صغير بتكون مشاعره سهلة الكسر لأبعد الحدود...

ولكن دا لا يعني إن حضرتك غلطتي إنك اتجوزتي...

اسمحي لي أقول لحضرتك إنك ربما جانبك الصواب في هندلة الطلاق ومن بعده جواز حضرتك،

وبالمناسبة الاختيار الثاني إنك كنتي تعيشي من غير جواز عشان محمود، كان هينعكس عليه برضه بالسلب!

- إزاي؟!

- لأن طالما كان عندك رغبة ملحة في إنك تتجوزي تاني وحاسة إن وجود محمود حائل دون تنفيذ رغبتك دي، ماكنتيش هتتعاملني معاه بكامل طاقتك النفسية.

- واضح إنك فاهمة حاجات كثير.

- لأ مش الفكرة، ولكن من خلال تعاملاتي مع ستات كثير شايفة إن مفيش قانون ثابت، بمعنى اللي عاوزه تتجوز تتجوز طبعاً، لكن تدير الموضوع مضبوط، بداية من تهيئة الأولاد نفسياً، ونهاية باختيار زوج مناسب يصلح إنه

يكون في يوم من الأيام أب للأولاد دول، واللي مش عاوزة تتجوز لازم برضه تكون قادرة على إدارة الأمور بشكل إنها ماتحسش إن ولادها السبب، وفي نفس الوقت تكون قد قرارها واختيارها وعندها طاقة نفسية إنها تستمر كدا من غير ما تقصر في حقهم، وفي الآخر ماينفعلش نخط قوالب جامدة، ونقول إن اللي بتتجوز ظلمت ولادها، واللي مابتتجوزش هي اللي بطلت وتمام.

ثم سألتها:

- حضرتك سعيدة في حياتك؟! -

قالت بأسى:

- كلنا بنفضل عايشين في الدنيا بنجري ورا وهم السعادة، ولكن في نهاية العمر بنكتشف إن السعادة في الدنيا مجرد سراب.. لكن فعلا زي ما انتي بتقولي، أنا أسأت إدارة الموضوع، فعشت بتأنيب الضمير تجاه محمود طول حياتي...

وانهمرت دموعها وقالت:

- وبالمناسبة مش لايمة عليه في اللي هو عمله.

- حضرتك تزعلي مني لو اتدخلت وحاولت إنني أقرب وجهات النظر بينك وبين باشمهندس محمود؟

قالت بصوت يملؤه الحزن:

- للأسف مفيش فايده.. ناس كثير حاولوا وهو شايل مني بشكل رهيب.

- إديني فرصة.. يمكن.

- مفيش مانع يا حبيبتى.

اتصلت بي ريهام وأخبرتني أن لدينا موعدا مع الدكتورة نهى الطنب، في تمام الساعة السادسة مساء...

وبعدما سمعت الدكتورة نهى مني القصة باهتمام قالت:

- للأسف يا دكتورة مها ما عندناش أبدا ثقافة التعامل مع الأطفال بعد حدث زي الطلاق، عقولهم الصغيرة مابتقدرش تستوعبه، ويا ريتنا بنلجأ للمختصين عشان يساعدونا، لكن للأسف بنمشي على مبدأ أسأل مجرب ولا تسأل طبيب.

بصي، أكيد حالة كل طفل بتختلف عن الثاني لكن في شوية حاجات مشتركة هقولك عليها...

الطفل محتاج للطرفين، الأب والأم، ويكون يفكر في إنه عاوزهم هما الاتنين يشاركوه حياته، لأن لما مش يشاركوه بيحس إنه مش مهم.

لازم الاب والام يكون فيه بينهم اتفاق على المسائل المتعلقة بيه، لأن لما بتحصل بينهم المشاكل على حاجة تخصه بيحس بالذنب.

الطفل بيكون حاسس إنه عاوز يحب الأب والأم، مش لازم يكره حد على حساب حد وينضغط عليه بسبب كدا... ويكون عاوز يستمتع بالوقت اللي هيقتضيه مع الاتنين.

الطفل بيكون عاوز الاتصال يكون بين الوالدين بشكل مباشر ومايشيلش فوق طاقتة، ويعملوه وسيلة لنقل الرسائل ما بينهم.

مفيش داعي إنهم يتكلموا عن بعض بشكل وحش قدام الطفل، لأن دا بيحسسه إن فيه معركة ولازم يكون في صف واحد فيهم ضد الثاني.

بل بالعكس الطفل في الوقت دا لما بيسمع مدح أبوه أو أمه للطرف الآخر بيعلي عنده التقدير للذات، والأهم من دا كله الطفل بيكون عاوز يحس بالحب والطمأنينة والدعم، ونديله الفرصة إنه يعبر عن مشاعره، كل دي حاجات بتحقله التوازن النفسي...

ومانساش طبعا التقارب الجسدي، زي الحضن والطبطة على الكتف اللي بتكون وسيلة قوية لتطمين الطفل وإعطاؤه رسالة مضمونها الحب والأمان.

مفيش داعي للدلع الزايد.

وهكرلك ثاني، لازم نقرا كتب ونرجع للمتخصصين عشان نعدي الفترة دي بأمان، ويكون فيه إدارة جيدة للموضوع...

وعاوزه أقولك حاجة بالمناسبة...

فيه أمهات كتير بيحبوا ولادهم بيعانوا من انهيارات نفسية، بسبب استمرار الأم في علاقتها مع الأب، ولكن الطفل بجد بيكون في حالة ضياع نفسي..

يعني الأمر مش مقتصر على الأولاد اللي والدهم ووالدتهم منفصلين...

وبالتالي لازم الطفل يحس بالاحترام المتبادل بين الوالدين سواء كانوا متجوزين أو منفصلين...

ولازم يفهم إن الطلاق بداية لحياة جديدة أحلى مش نهاية الدنيا...

عودة لطنت جولفدان.. وتعليقي:

من موقعي هذا بحب أشكر طنط جولفدان القوية، وطلتها البهية وهي فاتحة باب الشقة عشان تشوف اللي طالع واللي نازل...

والحقيقة هي كان ليها الفضل وحقت نجاح ساحق في تشكيل الخريطة الذهنية بتاعة كل بنات العمارة والعمائر المجاورة..

نجحت ببساطة إنها تخلينا بقينا عايشين بندور في الفلك بتاعها، وعاوزين نحقلها رغباتها عشان ماتشمتش فينا ونسمع صوت «مسم» اللي كان يجيب لآخر الشارع... لما كنا نخترق القانون اللي رسمه المجتمع...

الحقيقة طنت جولفدان هي المجتمع بذاته، اللي بيخلينا نتجاهل رغباتنا الحقيقية ونعيش حياة رسموها ناس غيرنا، لمجرد إننا خايفين نمشي ضد الحياة اللي رسموها.

وحتى لو قررنا نخالف اختياراتهم فإحنا بنستخبي منهم وبنعيش بعقدة الذنب غير المبررة،

كان يجب أن يقتلوا جولفدان قبل أن تتكاثر.

مفيش حاجة ثابتة في إن اللي بتتجوز بتظلم ولادها واللي مابتتجوزش مابتظلمهمش.

هديكى شوية اختيارات وتقوليلي رأيك.

واحدة عايشة مع أبو عيالها وبيتخانقوا كل يوم، مش قادرة تتمالك أعصابها ولا تربى ولادها مطبوط في جو نفسي سليم، وواحدة اتطلقت من أبو عيالها وهتموت عشان هي مطلقة ومش قادرة تتمالك أعصابها ولا تربى ولادها بشكل سليم..

واحدة اتطلقت وعايشة لوحدها مش عاوزة تتجوز، وبتربى عيالها بس سعيدة وعارفة تربى ولادها في جو نفسي سليم.

وواحدة اتطلقت واتجوزت واحد تاني ومبسوطة وبتربى عيالها في جو نفسي سليم.

وواحدة اتطلقت واتجوزت واحد تاني وحزينة مش بتربى ولادها في جو نفسي سليم.

تفتكروا مين فيهم صح ومين فيهم غلط؟

أنا رأيي اللي هتكون سعيدة اللي فهمت احتياجاتها وكانت صريحة مع نفسها، بغض النظر عن المجتمع، ثم أحسنت إدارة الأمور.

أنا شفت كتير ما بيتجوزوش، وبتظلم وبتعامل ولادها مش بكامل طاقتها النفسية، لأنها ماشية ضد تيار احتياجاتها خوفا من كلام الناس، ومفيش حاجة اسمها إن العيل لما يتربى مع أبوه بيطلع كويس واللي ما يترباش بيطلع ضايع..

ممكن يتربى مع أبوه ويطلع بايظ، ويتربى من غيره ويطلع كويس..
الفكرة كلها في إدارة الأمور بشكل صحيح.

هلاقي واحدة بتقوللي يعني أجيب لولادي جوز أم؟!
إنتي ماسمعتيش عن الواد حناطة اللي أمه جابت جوز أم؛ وكان بيخلع للواد ضوافة وطلعت قصتهم في جرنان دموع الندم؟!
بصيلي هنا وأنا بكلمك..

ولا البت فكها اللي جوز أمها... أستغفر الله العظيم.. عندنا ولايا.
هرد عليكى معلش، هو المشكلة إن أم حناطة وأم فكها اتجوزوا؟!
ولا مشكلتهم إنهم اختاروا غلط؟! مش فاهمة يعني.
ثانيا بلاش التعميم.. ما فيه نماذج كويسة...

وبعدين هو الفكرة إنه أبوهم ولا مش أبوهم ولا من غير أب خالص؟!
ولا الفكرة إنى...
أختار صح..

وأدير الأمور بشكل سليم يوصلني لأحسن نتيجة إلى حد كبير، تكون مرضية لكل الأطراف؟!!

على فكرة، ممكن يكون أبو ولادك ويسيء معاملتهم جدا.
ساعتها تستمري معاه عشان هو أبو العيال؟
كوني صريحة مع نفسك!

ولا عشان دا الشكل اللي المجتمع عاوزنا نكون عليه؟ أب وأم وولاد وبس!
وعشان هو أبو العيال براحته يموتك ويموت العيال.
طب بنت نفسيا سوية، بس باباها ومامتها منفصلين... لأصل مامتها مطلقة.
طب بنت معقدة نفسيا بس باباها ومامتها مع بعض... آه عادي المهم مامتها مش مطلقة.

طب أم اختارت تربي ولادها في جو نفسي سليم لوحدها..
لأ دول تربية ستات!

كل دي ردود واختيارات المجتمع اللي غالبا اختياراته ماتناسبنيش، لأننا مش
زي بعض وماينفعلش كلنا نعيش بنفس الأسلوب...
ونلاقي بعض الستات تتقمص دور أمينة رزق في أكثر أفلامها نكدا، وتقول
بصوتها:

«أنا هوهب نفسي للأولاد»

لأ ماتعمليش كدا أرجوكي، لو عندك رغبة وظهر قدامك حد كويس بس
بترفضي لمجرد إنك خايفة من الناس.. أو خايفة من الفشل... وتقول هوهب
نفسى للأولاد.

أي اختيار هتختاره.. تكون دي قناعاتك بجد مش عشان المجتمع عاوز كدا
والناس هتقول إيه...

حل مشكلة الأبناء بتتلخص في كلمتين...

خليكي صريحة مع نفسك...

إنتي عاوزة تعملي إيه...

وإيه الاتجاه اللي هتدي فيه أكثر ناحية نفسك وولادك...

ومايكونش مخالف لدينك..

سواء مع باباهم

مع زوج ثاني

لوحدهك

ولتذهب جولفدان إلى الجحيم!

طب هنسالك سؤال...

إحنا مالناش زوج ليه؟

طب بصي... طنط دولت اتطلقت ليه؟!

هتعرفي.



الفصل السادس: ياما في الجمعية مظالم

«ما يعتقد الآخرون عنك ليس من شأنك، ولكن ما تعتقده عن نفسك هو شأنك مدى الحياة»

باولو كويلو

سمعت صوته وهو يقول بانفعال:

- أنا لازم أقابلها حالا من فضلك.

ندى:

- لو سمحت يا أستاذ مش كدا، حضرتك مش واخذ معاد مسبق.

- أرجوكي لازم أقابلها حالا، لأن فيه حاجات كتير لازم تعرفها.

- ممكن يا فندم حضرتك تهدي ثواني على ما أبلغها؟!

كنت أجلس في غرفة المكتب، وقد انتابني الرعب.. دخلت مساعدتي وأغلقت خلفها الباب بهدوء وقالت بصوت منخفض:

- فيه راجل بره عمال يزعم، عاوز يقابلك حالا، والمشكلة فيه ناس بره معاهم مواعيد..

راجل غريب مع إن شكله محترم جدا وليسه شيك أوي.

- عاوزني في إيه ومنفعل أوي كدا ليه؟! بصي يا ندى.. معلش اعتذري للناس اللي بره ودخله نشوف حكايته.

دخل الرجل إلى مكتبي بسرعة من فرط انفعاله، كما لو كان سجيناً وأحدهم أطلق سراحه.

صافحني بأدب وقال:

- آسف جدا على الطريقة اللي دخلت بيها، أنا كنت جاي أقابلك بعد ما سمعت عنك وعن الجمعية اللي بتعملها... بس استُفزيت جدا من طريقة الستات اللي قاعدين بره...

كانو بيتناقشوا عن ظلم المجتمع للستات، ولما قلت فيه رجاله بتتظلم اتكلموا بسخرية بشكل أزعجني..

أنا جاركم هنا في العمارة، ودسوقي البواب حكالي عنكم، أنا مطلق زوجتي بقالي سنتين و...

قاطعته قائلة:

- تشرب إيه؟

بعدها لاحظت انفعاله، فقد كان يتحدث كما لو كان أحدهم يلاحقه...

قال بعد أن هداً نسبياً:

- لا لا متشكر جداً.

أكمل حديثه قائلاً:

- أنا لسة عارف من دسوقي التفاصيل النهارده.. كنت عارف إن فيه حد بيعمل جمعية في العمارة، والحقيقة ماكنتش مهتم إنني أعرف التفاصيل...

ومن شوية وأنا نازل وقفت أدردش معاه، وقاللي إن الجمعية دي لمساندة المطلقات والأرامل وأي واحدة مالهاش زوج.

قلت بابتسامة:

- مضبوط.

قال بصوت يقطر مرارة:

- دا على اعتبار إن الستات مظلومين أصلاً؟!

قلت بعد أن حاولت أن أحافظ على ثباتي الانفعالي:

- لأ طبعا يا فندم مفيش قانون ثابت، ولا حاجة ينفع فيها التعميم..

إن الستات كلهم مظلومين

أو الرجالة كلهم ظالمين

والعكس...

ماينفعش أبدا نعمم.

قال بعد أن ارتاح إلى حد كبير:

- أعرفك بنفسي.. أنا شادي الدمنهوري.. دكتور أسنان...

ثم أردف بخجل:

- بكرر أسفي لو كنت دخلت بشكل غير لائق..

أصل بصراحه بحس إن الرجاله دايمه محصورين في أدوار الشر.. هههههه...
وكل ما أقابل حد ويعرف إني مطلق بيتعامل معايا بمبدأ إني إنسان الغاب
طويل الناب.

ضحكت:

- فعلا، بس مش الكل والله... أنا فاهمة دا كويس...
ومتحمسة أسمع حكاية حضرتك.

تنهد ثم أردف قائلا:

- أنا أستاذ مساعد في كلية طب الأسنان جامعة عين شمس... طليقتي كانت
طالبة عندي في الكلية..

أعجبت بيها جدا...

وحاولت ألفت انتباهها بكل الطرق لحد ما فعلا ارتبطنا وفاتحتها إني عاوز
أتقدم لها...

من أول يوم دخلت فيه بيتهم لاحظت إن والدتها هي الأمر الناهي في البيت...

والدها راجل طيب ووالدتها شخصية قوية ومسيطره...

طلبوا مني طلبات فوق قدراتي بشكل رهيب، ورغم كذا نفذت كل رغباتهم،
لأني فعلا كنت بحب سارة أوي وعاوز الموضوع يتم...

وطبعاً كنت متغاضي عن حجات كتير جدا...

سارة للأسف كانت شخصيتها ملغية تماما قدام والدتها...

وأثناء فترة الخطوبة كانت والدتها بتتعمد تحسني إن الكلمة كلمتها...

وكان عندي شعور دائم إني داخل حرب طروادة، بحارب طواحين الهواء، ولو
سألتيني: عشان إيه؟ هقولك والله ما أعرف...

كانت كل حاجة تقول لأ لمجرد الأ... ماشية معايا بمبدأ خالف تعرف...

كنت بحمد ربنا إن والدتي متوفية، وإلا كانت قامت بينهم الحرب العالمية
الثالثة...

وماتقوليليش وإيه اللي جبرك لأني ببساطة كنت وما زلت بحب سارة...

المهم...

تدخلت في كل حاجة حتي في اختيارنا للعفش وألوان الدهانات...
كان أمني بعد الجواز مراتي تتغير بعد ما تبعد عن والدتها...
لكن الموضوع زاد عن حده جدا...

سامحني يا رب..

كنت كل يوم أصحى الصبح مستني يجيلي خبر سعيد، وافتح الجرنان ألاقي صورتها في صفحة الوفيات.

وعند هذه الكلمة تحديدا انفجرت في الضحك...

ضحك بدوره وأكمل حديثه:

- صدقيني أنا مش ظالمها والله ولا بكرها لمجرد الكره...

حاولت أتعامل معاها كإبنها، تزيد فيها وأحس إنها عاوزة تحطني في ضمن قايمة الضحايا..

كنت بحس وأنا قاعد قدامها أوقات كتير إنها هربانه من فيلم عاد لينتقم، وهتشيل القناع وتقوم قايلة...

أنا حسن الهلالي..

وهيطلع في الآخر فيه تار بايت بينها وبين جدي الكبير، وهي جت من الماضي عشان ترجع الحق لأصحابه...

وقعدت أيام كتير منتظر لحظة خلع القناع وبفكر هيكون ردي إيه ساعتها...

عمري ما لقيت سبب منطقي ولا مبرر لنظراتها، غير إني للأسف رفضت الإذعان والتسليم...

ضحكت بشدة وقلت:

- إذعان وتسليم لإيه؟

قال بأسى:

- إنها تتحكم فيّا زي كل اللي حوالها، حتى لو كان كلامها غلط..

وأقدم فروض الولاء والطاعة...

وأسيبها تحقق معايا سكور زي ما حققت مع اللي قبلي، وأنضم للقايمة

وتقول next...

- طب وسارة كان إيه موقفها؟!

- سارة للأسف كانت شخصيتها ضعيفة جدا، وكانت دائما عاوزه تريح نفسها، فتسمع كلام والدتها في أي حاجة حتى لو كانت غير منطقية...

ولما كنت أعمل معاها مشكلة كانت تقوللي إوعى تجيب سيرة ماما لو سمحت..

وكانت دائما تحاول تقنعني إن الموضوع بّر والدين، في حين إني كنت فاهم وبشدة إنه خوف وضعف شخصية..

المهم ربنا رزقنا بـ«يس» ابني...

وبعد ما زوجتي جابت ولد، حماتي توحشت حرفيا

لأن كان ليها حسابات تانية خالص...

جتلها الفرصة الحقيقية إنها تكسرنى وتنتقم..

قعدت تفتعل معايا المشاكل وبالتالي الوضع تأزم بيني وبين سارة جدا..

لحد ما وصلنا للطلاق...

سبت البيت ومشيت عشان الدنيا تهدي، رجعت لقيتهم مغيرين الكالون...

وخذت كل العفش اللي في الشقة

ورفعوا عليا قضية تبديد منقولات...

أنا قعدت فترة حرفيا كنت عامل زي اللي مخبوط على دماغه، مش عارف أتصرف ولا عارف أعمل إيه...

لجأت لطارق صاحبي عشان أشوره، قاللي ماقدامكش غير إنك الأول تحل الموضوع ودي...

وافقت، وبعث طارق عشان يتوسط إن الأمور تهدي، ولو فعلا عاوزين ينهوا الموضوع ننهيه بالمعروف...

لكن للأسف مفيش فايده...

بعثلها رسالة قتلها يا سارة أرجوكي تنازلي عن المحضر، مايصحش تسجيني وأنا أبو إبنك، وأنا هسيبك كدا كل حاجة لأنك حاضنة، وأنا عارف الكلام دا كويس...

ومفيش أي رد...

طارق صاحبي رشّحلي محامي، ودخلت سكة المحاكم طواعية لأنّي كنت هتسجن بسبب القايمة...

وعلى ما جينا شهود إنها هي اللي أخذت العفش هي وأهلها كانت مواويل... حاولت أتواصل مع والدها عشان أشوف ابني، يقوللي روح شوفه بالقانون... وداخل في سنة ماشفتش الولد ومش عارف أعمل إيه بجد. قاطعته بأدب:

- وإنت إزاي لسه بتحبها؟!

تنهد بحرقة وأتبع قائلاً:

- هي بجد بتصعب عليا، أنا شايفها ضحية مش جاني.

حاولت أن أهون عليه فقلت بابتسامة:

- على رأي ماما.. خد الهيلة بنت العاقلة ومتاخذش العاقلة بنت الهيلة.

ضحك بشدة، ثم قال:

- أنا بصراحة صممت أقابلك بس عشان تعرفي إن فيه رجالة فعلا بتتظلم بجد والله...

أنا كنت عاوز أرتاح بجد ماكنتش عاوز أي مشاكل...

كنت بقيم بيت وأسرة عشان اتفرغ لشغلي، وأنا ومراتي نحط إيدينا في إيد بعض...

- أنا فاهمه جدا يا دكتور شادي والله إن زي ما فيه ستات مظلومين فيه رجالة كمان مظلومين، وسبحان الله لما كنت بشوفك واقف مع دسوقي البواب وأنا طالعه ونازله من العمارة كذا مرة، عمري ما تخيلت إن عندك كل المشاكل دي، لأنك شخص بشوش وبتحب الضحك والهزار...

لكن الفكرة اللي عند الناس بسبب إن النسبة الأكثر ستات فعلا متبهدين.

تنهد قائلاً بحزن:

- والله مش أنا بس، ثلاثة من أصدقائي نفس الحوارات باختلاف القصص.

تحدثنا بعدها لساعة، وحكيت له عن معاناة الكثير من سيدات الجمعية، وحاولت إقناعه أن ينضم إلينا...

قال وهو يهم بالانصراف:

- بإذن الله هرد عليكى.

∞ ∞ ∞ ∞ ∞

كلهم؟

آه كلهم!

مشكلة التعميم...

الكلمة دي مابجهاش خالص، كلمة (كلهم بيعملوا كذا)...

(كل) الرجالة مايتعاشروش...

(كل) الستات دماغهم ضاربة....

(كل) واحدة اتطلقت لازم تمشي مشي وحش...

دا بنسميه في الكوتشنج: «التعميم»...

وهو إن أي حد يدي حكم مطلق لمجرد إنه مر بتجربة سيئة أو اتنين أو ثلاثة...

أو حتى كتير...

(كلهم) في مجتمعنا بتتقسم لحاجتين؛

1. (تعميم على مجموعة من الناس)

إن (كل) الستات والرجالة المطلقين أو المتأخرين في الجواز فشلة...

ولو كان فيه خير ماكانش رماه الطير!

السؤال هنا بقى: إنتم شوفتوهم (كلهم)؟

أكيد لآ... يبقى ماينفعش ندي حكم عام ولا نخط كل الناس باختلاف قصصهم وشخصياتهم في سلة واحدة.

2. ومن ضمن التعميم (التعميم على نفسي)

اللي بنشوفه في حياة ناس كتير إنه لما يفشل في حاجه يقول:

أنا طول عمري بختي مايل...

أنا مانجحتش في ولا حاجة وعمري ما هنجح...

ماحدث منهم (كلهم) بيتمالي الخير..

(كلهم) ماحدث بيحبني...

الناس (كلهم) حاطّيني في دماغهم...

الناس (كلهم) بيتكلموا عني وحش.

خلاص بقى مفيش فايده زي ما سعد زغلول قال...

ويستمر في حياته كلها بنفس الكونسبت وينسى تماما: «تفاءلوا بالخير تجدوه».

لازم يا جماعة نفهم إن التعميم المطلق من أكبر أخطاء التفكير، ويكون بسبب عجز معظم الناس على إصدار حكم تفصيلي مبني على رؤية واضحة... فيقوم قايل كلهم ويخلص.. ماتقرفوناش بقى..

طب إيه علاقة اللي فوق دا بموضوعنا؟

علاقته إنه للأسف بسبب (كلهم)...

* فيه ناس بتتخط تحت عنوان ما، بيشمل الجروب كله بغض النظر عن التفاصيل..

* وممكن واحد يدمر حياته لمجرد إنه فشل في موقف في حياته..

فيدي حكم مُطلق إن حياته كلها فاشلة...

طب والحل؟!

الحل الأول:

إن عشان نخلص من موضوع (كلهم) لازم إحنا الأول نتغير في طريقة نظرنا لنفسنا في حياتنا...

الخطوة الأولى:

إن مش معنى إنني وقعت مرة واثنين وعشرة حتى، يبقى أعمم الحكم دا علي نفسي وعلى حياتي...

يعني مثلا:

مش معنى إن واحدة دخلت تجربة واثنين وإن شالله تلاتة وفشلت يبقى معناها هي فاشلة أو (كل) الرجالة وحشين، اللي بستغربه إن أيام الرسول عليه الصلاة والسلام، الصحابة والصحابيات أتجوزوا مرة واثنين وتلاتة وأطلقوا... وماحدثش كان بيقول كلهم ولا كلها ولا كلهن حتى...

ودا فايدته بالنسبة لنا إننا نكمل اليومين على خير ومايجيلناش المرض...

ونحط في دماغنا إن ممكن أنا، أو حد قريب مني، في يوم من الأيام أكون
واحدة من الناس دول.. وساعتها أكيد مش هحب التعميم الظالم دا...

الخطوة الثانية:

لو اتعلمت أعمل الخطوة الأولانية كدا بالتدريج، هتتسع نظرتي في الحياة...
وبالتالي هبطل التعميم على الناس...

وهبطل أقول (كلهم) على مجموعة من الناس لمجرد إنهم تحت عنوان واحد..

ويمكن ألغي الكلمة أصلا من قاموسي...

مطلقين..

مش كلهم مظلومين ولا كلهم ظالمين ولا كلهم فشلة.

متأخرين في الجواز..

مش كلهم معقدين نفسيا ولا كلهم متعمدين دا، ولا كلهم بيتنططوا ومش
عاجبهم حاجة.

الحل الثاني ودا الأسهل:

إحنا هنجري اختبارات علينا كلنا... وتتحط تحت ضغوط فظيعة واختبارات،
وبعد التأكد إن فيه اتنين مننا مايقولوش (كلهم)

نسفرهم للخارج...

نلم الباقيين (كلهم) ونقف (كلنا) في ميدان عام، وحدّ يرمي علينا قنبلة نووية،
بشروط تنزل على راس طنط جولدان مباشرة...

ونرجع التانيين للداخل تاني يتجوزوا ويجيبوا ولاد يربوهم على نضافة...

ويطلع جيل كامل ما عندوش (كلهم)

حاجة هم أقسم بالله..

ما حدش مننا (كلنا) مايقولش (كلهم)...

ممكن طيب سؤال؟!

هما ليه اتطلقوا (كلهم)؟!



الفصل السابع: بداية الحلول العملية في الجمعية

«إن اللذة التي تجعل للحياة قيمة، ليست حيازة المال ولا شرف النسب ولا علو المنصب، وإنما هي أن يكون الإنسان قوة عاملة ذات أثر خالد في العالم».

قاسم أمين

شعرت بإرهاق شديد بعدما انتهيت من إعداد وتجهيز كل شيء لافتتاح الجمعية...

قمنا بدعوة جميع الأعضاء والعضوات ومجلس إدارة الجمعية...

ولم أنس الدكتورة دولت والدة المهندس محمود؛ حتى أنتهز الفرصة لإصلاح ذات بينهما...

وقبيل موعد افتتاح الجمعية بيوم، كنت أشعر بأرق شديد...

ففي الغد أكون أو لا أكون...

دعوت الله أن يوفقني ويحلل عقدة من لساني...

فلا شك أن الانطباعات الأولى تدوم...

وبعد جهود مضنية غفوت.. ورأيت في منامي أنني قابلت قاسم أمين وسألته عن كل ما يجول بخاطري.. كيف استطاع أن يغير مجتمعا بأكمله؟

هل من الممكن أن أغير حتى لا يعاني أبنائي مما عانينا منه لعقود؟

صحوت من نومي وأنا أفكر في هذا الرجل، فهو رائد حركة تحرير المرأة، وكان له دور فعال في تغيير المسار الفكري لمجتمع شديد الانغلاق...

هوجمت حركته في بدايتها، ثم ما لبثت أن حققت نجاحا كبيرا، ولاقى صدى كبيرا جدا في العديد من الدول العربية وليس مصر فقط...

ورغم صعوبة الأمر آنذاك، نجح في غايته...

وفي اليوم التالي...

انتظرت بمكتبي حتى حضر الجميع، ما عدا الباشمهندس محمود الأسعد، الذي جاء متأخرا... وما إن دخل القاعة ولمح والدته، حتى قطب جبينه وجلس في نهايتها...

ورأيت صديقتي الحنون ريهام تجلس في المقدمة، تنظر إليّ بنظرات يملؤها التشجيع، ولسان حالها يقول أنت لها...

بدأت كلامي...

بسم الله الرحمن الرحيم...

بداية، أحب أن أشكركم كلكم على الاهتمام والحضور... ولولا الله ثم أنتم ماكنتش أبدا هنجح في تأسيس الجمعية...

اسمحولي أدخل في الموضوع على طول...

من خلال لقاءاتي معاكم عموما، ومع سيدات الجمعية خصوصا، لاحظت إن فيه سؤال بيشغل بالكم كلكم، ألا وهو...

أنا اتطلقت ليه؟ أو أنا اتحرمت من نعمة الزوج ليه؟

كلكم عارفين إنني مطلقة من سبع سنين تقريبا، والحقيقة إنني من اليوم الأول في الطلاق وأنا بسأل نفسي نفس السؤال...

عدت علي أيام كثير كنت بفكر إنني كنت ست فيري إنترستنج، عملت كل اللي مايتعملش واستحملت اللي مايستحملوش حد، وقاتلت بشرف للنهاية عشان علاقتنا تستمر...

وقعد السؤال دا يؤرقني ثلاث سنين بلياليهم...

كنت بتصل بصاحباتي المقربين، نعمل اجتماع قمة للبحث عن إجابة السؤال اللي حير الملايين...

مها سامي اتطلقت ليه؟!

والحقيقة إنني كنت بتنقل بينهم لأنني كنت بئخ طاقة سلبية مفيش إنسان يقدر يستحملها...

حيث كانت المكالمات في خلفيتها أغاني شجن، وتصاحبها أمطار غزيرة من الدموع التي تسقط على ضفاف نهر النكد، اللي طالع من المعموع الجواني...

وفشل الجميع في إيجاد إجابته للسؤال... ومالقتش بد من إنني أنزل لمعترك الحياة.. وإجابة السؤال والحكمة هعرفها مع الزمن بعدين...

وفي يوم من ذات الأيام رجعت بالزمن لورا، وقررت أسأل نفسي سؤال...

هو أنا اتجوزت ليه؟!

لقيت إن الإجابة زي إجابة كثير منكم...

1. عشان أحب وأتحب.

2. عشان عاوزة السند والأمان.

3. عشان عاوزة أخلف عيال وأربيهم... آه وبعدين يا مها؟ آه ويكبروا..

أيوه عشان إيه؟!

ماتوجعوش دماغى بقى، عشان يكبروا زي ما الناس بتكبر.

4. عشان ألاقى واحد أضحك عليه وأخلص فلوسه.

5. هلاقي واحد يشخلعني ويدلعني ويهينيني.

رحت سألت نفسي سؤال أهم بقى؟!

هو الجواز بالنسبة لي كان وسيلة ولا غاية؟!

لقيت إنه كان غاية.. أنا عاوزة أتجوز زي ما الناس كلها بتتجوز، ونعيش

فرحانين ونلف حوالين الشجرة...

طبعا بعد الأهداف السامية البامية دي كان لازم أتطلق...

** وبالتالي عرفت أول سبب أنا اتطلقت ليه... لأنى ببساطة ماكنتش عارفة

أصلا أنا بتجوز ليه.

لما الأهداف اللي قلتها دي مش أهداف منطقية للجواز، أومال إيه الأهداف

المنطقية من وجهة نظري؟!

الهدف الأسمى اللي اتخلقنا عشانه، وهو إننا نعمر الأرض...

إحنا جينا هنا عشان نسيب بصمة قبل ما نمشي...

بصمة تنفع الناس في دنيتهم... وتنفعنا في الآخرة...

طب والزوج؟!

مش الرسول قال: «لو كنت أمرا أحدا أن يسجد لغير الله لأمرت المرأة أن

تسجد لزوجها»؟...

صح مش معترضة...

طاعة الزوج ووجوده في حياتي من ضمن الطاعات اللي ممكن أدخل بيها

الجنة..

زي لو صليت... لو صمت... لو ساعدت ناس محتاجين..
بس؟!

لأ مش بس، ومتعة من متع الحياة... زي لو خرجت مع صاحباتي..
زي لو سافرت تركيا... أو حد منكم عزمي على العشاء في باريس...
لكن الجواز مش الغاية العليا اللي أنا عاوزة أوصلها..
أتولد أعيش أتجوز أخلف أموت...

إحنا استحاله نكون اتخلقنا عشان كدا...

الجواز هو إنك تلاقي واحد يصاحبك في الرحلة للوصول لهدفك الأسمى، وهو
البصمة اللي عاوزة تسيبها قبل ما تمشي...
والدليل على كدا...

حديث الرسول عليه الصلاة والسلام: «إذا مات ابن آدم انقطع عمله إلا من
ثلاث:

1. صدقة جارية.

2. علم ينتفع به.

3. ولد صالح يدعو له».

في الحديث دا الرسول إدالنا أمثلة لبصمات ممكن نسيبها قبل ما نمشي...
ومن هنا عرفت السبب الأول من أسباب إنني اتطلقت...
وهو إنني أصلا ماكنتش عارفة أنا بتجوز ليه، والجواز كان غاية مش وسيلة...
ودا خلاني فهمت مباشرة:

** السبب الثاني من أسباب أنا اتطلقت ليه...

وهو إنني بما إنني ماكنتش عارفة أنا بتجوز ليه... فماختارتش صح...

السبب الثاني إنني ماختارتش بناء على أسس الشريك المناسب...

الشريك اللي هيساعدني في تنفيذ خطتي لإعمار الأرض...

ولما سألت منكم كثير أسس اختياركم للشريك كانت إيه؟ وإيه الأهداف
المشتركة؟

كانت من ضمن الإجابات:

بنحب إحنا الاتنين دقية البامية باللحمة الضاني.
بنتخانق كل يوم إني آخذ كيس الزبالة وأنا نازل.
بنحب نروح مصيف بلطيم وأحيانا جمصة.. ما تيجي معانا.
بعيد عنك بموت في إني أنكد عليه، هرمونات النكد مبهدلاني، وهو بيحب
يزعقلي، الحوار دا بيغسلنا من جوة.
ربينا الواد محمدي أحسن تربية، عقبال أملتك اتخرج من معهد سنجر وبقي
معاه شهادة سلاح في إيده... احتمال يغز الواد حمو بالسلاح دا.
وبعد ما سمعت الإجابات الجميلة دي لقيت إن للأسف كتير مننا ماكانش عنده
أسس اختيار..
فماعرفناش أبدا نتقابل في نقطة ولا نلاقي أهداف مشتركة، ودا السبب
الثاني من أسباب الطلاق.
** وكان مترتب عليه السبب الثالث، وهو أهم سبب عرفته من خلال رحلتي
بعد الطلاق...
عاوزه تعرفي إيه هو؟!
إنك من المميزين يا علي...
قصدي الأحرار...
معلش الجلالة خدتني...
إنك من المميزين!
لأن ربنا إداكي الفرصة تصحي المسار وترجعي للطريق الصح في الوقت
المناسب، بس اللي يفهم...
وليه كان لازم أتجوز وأتطلق؟!
ليه يجرالي كذا؟!
لأنك عمرك ما هتتعملي إلا لما تجربي...
مين فينا فاكر سورة الكهف، والأحداث اللي حصلت بين سيدنا موسى
والرجل الصالح؟
الأحداث تبدو قدامنا مالهاش أي تفسير وشرح واضح... لكن في باطنها
رحمات كتير جدا...

أما بقى لو بصينا في قصص معظم مشاهير العالم، هنلاقي إنهم اتعرضو
لأزمة شديدة جدا غيرت مسار حياتهم...
ولو ذكرنا منهم أمثلة...

واحد اسمه والاس جونسون، كان بيشتغل نجار في مصنع خشب من وهو
عنده ٢٠ سنة...

الراجل دا كان بيحب شغله جدا، ومتقن فيه بشكل غير عادي...

واستمر في الشغل لمدة عشرين سنة!

وفجأة وبدون مقدمات.. الراجل صاحب الشغل استغنى عنه وطرده من غير
أي سبب...

الراجل بمقاييس النبي آدمين حياته اتمرت.. إزاي هيتدي حياته وهو عنده
أربعين سنة؟

خلاص بعد ما شاب ودوه الكتاب!

مفيش أمل غير إنه يشحت...

الراجل قعد يفكر إيه الإمكانيات اللي حواليه ممكن يستغلها عشان يخرج من
المأزق دا بأي طريقة...

لقى إن عنده ٣ حجات....

الصحة

والعقل

والبيت اللي قاعد فيه

قرر يشغل مخه، وراح راهن البيت اللي كانوا عايشين فيه...

وبالفلوس اللي رهن بيها البيت راح باني بيت بتصميم مختلف..

يعني نقدر نقول اشتغل في مجال المقاولات....

الناس أعجبت جدا بتصميم البيت اللي بناه

وفي فترة قصيرة جدا بنى ٢٠ بيت!

وشوية بشوية بالإصرار والنحت في الصخر... عارفين وصل لإيه؟

الراجل دا بقى صاحب فنادق «هوليداي إن» المنتشرة على مستوى العالم...

الراجل دا لما صاحب الشغل طرده، كان قدامه أربع طرق:
الأول: يفضل باصص تحت رجليه ويفكر بغباء ويتحايل على صاحب الشغل
يرجعه، وكان زمانه عاش ومات وهو نجار، وعاش وهو ما عندوش كرامة.

الثاني: يضع عمره في إنه يسأل نفسه أنا اترفدت ليه؟!
الثالث: إنه يشتري كرامته بس يفضل يبكي على اللبن المسكوب ويحس إن
حياته انتهت، ويخش في سلسلة من الانهيارات والأمراض النفسية، ويضيع
ولاده وأسرته..

الرابع: إنه يفكر برة الصندوق ويفهم الحكمة ويغير مسار تفكيره، ويفتح في
الصخر ويبقى صاحب سلسلة فنادق «هوليداي إن».

كام واحدة فينا حصلها مشكلة... فقدت حاجة هي بتحبها، وفضلت تفكر جوة
الصندوق إن الحل الوحيد في الحاجة دي ومالهش بدائل؟

وكام واحدة فينا حست إن حياتها انتهت، وإنها مش هتقدر لمجرد إن مسار
حياتها اتغير، من غير ما تحاول توسع مخها وتفهم الحكمة، ويمكن يكون اللي
متشال شيء ما يخطرش على بالي؟ أوصل يا مها للي متشال إزاي؟!
بحاجتين..

الرضا

والسعي

ربنا يقول: ﴿الَّذِينَ جَاهَدُوا فِينَا لَنَهْدِيَنَّهُمْ سُبُلَنَا وَإِنَّ اللَّهَ لَمَعَ الْمُحْسِنِينَ﴾
[العنكبوت:]

تعرفي إن كل واحدة فينا جواها بطلة محتاجة تخرج، وعشان تخرج عاوزة
شوية مجهود وإرادة صغيرين خالص..

من ضمن الناس اللي نجحوا بعد أزمة، المؤلفة بتاعة سلسلة قصص «هاري
بوتر»... هناخد الشاهد من قصة حياة الست دي...

الست دي ببساطة اتطلقت تقريبا سنة ١٩٩٥، وكانت عايشة هي وبناتها على
معاش أهبل كده من الدولة...

قبل ما تتطلق بحاجة بسيطة كانت راكبة قطر، ونظرا لأن خيالها واسع
نسجت في دماغها أبطال هاري بوتر، واستوحت الموضوع من محطة القطر
وبدأت تحط أحداث...

اتلتهت في حياتها وماكتبتش القصة اللي جت في بالها، وبعد طلاقها افتكرت حلمها القديم واشتغلت على موهبتها، وبدأت تكتب أول قصة من قصص هاري بوتر...

قدمت الرواية الأولى في ١٣ دار نشر، وقعدت تترفض وماحدش موافق على اللي مكتوب، بالإضافة إلى إنها كاتبة مغمورة ماحدش عارفها، لحد ما دار نشر قبلت بيها، بس اشترطوا عليها شرط ماتكتبش إسمها وتكتب اختصار، ووافقت، ونزلت الرواية، ويوم حفل التوقيع ماحدش أصلاً جه غير الناس بتوع دار النشر اللي كانوا أصلاً موجودين، وصعبت عليهم والتفوا حوالها عشان يشدوا من أزرها...

عام ٢٠٠٤ بقت مليارديرة، وأشهر كاتبة للقصص الخيالية اللي من النوع ده. خدتوا بالكم من حاجة؟

أنا أخذت

الحاجة الأولانية:

ماذا لو الست دي ماكاتتس اتطلقت؟

كان زمانها ست عادية قاعدة في بيتها بتشكر ربنا.

الحاجة الثانية:

الترتيب المنطقي للنجاح في أغلب قصص مشاهير العالم...

1. أزمة شديدة.

2. رحلة البحث عن الذات واكتشاف المواهب.

3. تنمية الموهبة وخلق الهدف والحلم.

4. الإصرار والعزيمة.

5. كوابية شاي بالنعناع وورقة وقلم.

إوعي تقولي خلاص الوقت فات... وإوعي تقولي إن ماعادش عندي طاقة وكبرت...

الرسول عليه الصلاة والسلام حياته الحقيقية بدأت بعد الأربعين...

وماكانش طريقه للدعوة إلى الله مفروش بالورود ولا حاجة...

طيب أتعب نفسي وأنجح ليه؟! وأنجح إزاي؟!

من التساؤلات اللي بتيجي في بالنا لما نكون في قمة الإحباط والنكد من موقف حصل غير مسار حياتي...

بغض النظر عن المعاني الكثيرة للنجاح زي:
أحقق كياني وأثبت نفسي.

أدي اللي راهنوا علي كسرتي في وشهم.

إني أخلق أحلام جديدة وأهداف جديدة.

الشعور بطعم النجاح حلو أوي.

وغيرها وغيرها...

فيه معني مهم أوي حسيت بيه في الطريق وأنا ماشية، المعنى ده أنا ماكنتش حاسباله أوي، لكن اتفاجئت بيه فعلا...

وهو طريقة تعاملات الناس معاكي قبل النجاح وبعده...

كنت بلا حظ نظرات الناس تتراوح ما بين الطبطبة والتصعب ومصمصة الشفايف، وفي بعض الأحيان الخوف منك من الحسد، بلس الكلمات الرائعة زي: ربنا يجعل عوضك في ولادك...

يعني أنا أموت؟

كنت دايمًا بحس إن...

نظرة الناس للإنسان الناجح بتختلف تمامًا، ودا مش وحاشة منهم ولا حاجة، ولكن لأن

الإنسان الناجح ببساطة مش عبء.

الإنسان الناجح دعم.

طاقة إيجابية.

مصدر قوة.

انجحي!

أقسمك بالله هتلاقي كل حد بعد زمان جاي يقرب ويتمنى بس يتكلم معاكي، لأنك بقيتي مبهرة..

والمفاجأة إنك مش هيكون عندك وقت ليهم أصلاً، هتلاقي إن نجاحك غطى على أي حاجة تانية الناس كانت شايفها ناقصة عندك...

ولما تنجحي هتقدري تحققي الدعم المادي لولادك إن شاء الله...
والأهم من دا كله إنك تسيبي بصمتك في إعمار الأرض قبل ما تمشي زي ما
اتفقنا...

وماشية في طريقك لحد ما تقابلي نصك الثاني... ولو ماقابلتيهوش إنتي
ماشية في سكتك، وهي رسالتك في الحياة، تجاه نفسك، ثم تجاه أولادك...
وبكدا يبقى إنتي عرفتي تتجاوزي أغلب المشاكل اللي بتواجه أي ست مننا
من غير راجل، في مجتمع زي مجتمعنا...

طيب أنجح إزاي؟!

1. تستعيني برنا وتتعلقني ببابه.
2. تاخدي القرار إنك هتتخطي الأزمة وتغيري حياتك.
3. يبقى عندك الإرادة إنك تقعي مرة واثنين وعشرة وتقومي تاني.
4. تحطي الخطة والهدف.
5. تبصي على الإمكانيات حواليك اللي هتقدري تستفيدي منها.
6. يبقى عندك الصبر إنك تكلمي المشوار اللي هيكون صعب ومليان تحديات.

طيب إيه الإمكانيات اللي ممكن تكون عندي؟!

الإمكانيات حاجتين...

أولا: الإمكانيات حواليك:

زي إيه؟!

- شغلك.

- ولادك.

- أهلك.

- صحاب مخلصين يدعموكي وبسندوكي وقت الشدة.

- جيران طيبين.

- فلوس كنتي شايلها على جنب.

ثانيا:

إنتي..

لأ مش عاوزة حد من الرّملا يفهمني غلط.. أكيد مش هيكون اقتراحي إنك تنزلي تتشقطي عند شارع جامعة الدول العربية! بصي يا ستي، إنتي دي معناها..

صحتك.

مخك.

شفتي بقى إنتي غنية إزاي؟! هتعملي إيه بقى بإمكاناتك؟ لو عندك شغل قرري إنك تحطي خطة زمنية معينة لهدف، ولما تحققه إجري للي بعده... لو إنتي دكتورة قرري إنك بعد مثلا سبع سنين يبقى عندك أكبر مستشفى في الشرق الأوسط، وماتقوليش إزاي؟ مامعيش فلوس!

هقولك كلمة واحدة، إذا صدقتي العزم.. وجدتي السبيل.

وإيه البصمة اللي هسيبها في الأرض بهدف زي دا؟ إنك تعملي قسم لعلاج غير القادرين بالمجان..

طيب لو مابتحيش شغلك؟!

اعملي كارير شيفت

طب لو ما عنديش شغل أصلا؟!

نقبي عن هواياتك...

ربنا إدى لكل واحد فينا موهبة... دوري عليها واستغليها...

حتى لو كانت كوروشيه...

أكسيسوريز

أي حاجة هاند ميد

رسم

وحطي برضه هدف كبير... إن يبقى عندك براند عالمي...

يا سلام! وإيه الفكرة في البصمة لما يبقى عندي براند عالمي؟!

إنك هتبقى بيزنس وومن عندك ضمير وقلب، هتتشغلي الناس اللي محتاجين فعلا، ويمكن تديهم مراتب أعلى من السوق كمان، لأنك حاسة بظروفهم... وإوعي تقولي ياه دا الموضوع كبير وبعيد أشبه بصعود قمة إيفريست...

هقولك كلمة واحدة...

إنك من خمس سنين أكيد كان عندك حلم... الخمس سنين عدّوا على فكرة وإنتي لسه مكانك... وإوعي إوعي تتخيلي إنك هتسعي وربنا هيخذلك أبدا..
في هذه اللحظة تحديدا صفق كل الحضور، وبعدها مباشرة قالت مدام سالي عبد الواحد:

- الكلام كله رائع يا دكتورة، بس إحنا برضه نفسنا يكون لينا دور وتأثير على المجتمع.. هنعمله إزاي؟!

- لسه كنت جاية في الكلام دا حالا... يوم ما نقرر نغير المجتمع لازم نكون فاهمين القاعدة الإلهية: «إن الله لا يغير ما بقوم حتى يغيروا ما بأنفسهم»، لازم إحنا الأول نتغير ونغير قناعاتنا ونشتغل على الخريطة الذهنية بتاعتنا، ونبتدي نشتغل على الخريطة الذهنية بتاعة الناس المقربين لينا وحوالينا... بس عشان نقدر نكون مقنعين بالنسبة لهم لازم نعمل كل اللي قلته الأول... وبعدها لما نكون مثال مشرف وناجح وقدوة هنقدر نأثر على أهالينا، لأنهم ببساطة هيثقوا في قراراتنا... وكمان نربي ولادنا صح...

نعلم الولد إنه يطلع راجل بمعنى الكلمة، وإن الهدف من زواجه هو وسيلة لإعمار الأرض، واختيار شريكة مناسبة للهدف دا.

ونعلم البنات إن ماينفعش أتمحور حوالين فكرة الزواج بس، وإن الأمر وسيلة وليس غاية...

نعلم الأولاد من وهما صغيرين إننا زوار هنا، ولازم تسبب بصمتك..

قربي منهم واعرفي طموحاتهم الصغيرة، وساعديهم في اختيار أهداف قابلة للتغيير كل فترة... خدي قرار إن واحد منهم هيكون ابن ناجح لأم مطلقة... إنك تكوني أول ست مطلقة أو أرملة إنبها أخذ جايزة نوبل...

أنا بضرب مثال...

سببته هو أو هي يختاروا حياتهم، بس شجعيهم وعلميهم نظرية الهدف الأسمى... والغاية العليا... تعمير الأرض والبصمة...

قالت مدام سالي:

- محتاجين نقرأ أكثر عن ناس قبلنا غيروا المجتمع وأثروا فيه، زي نبوية موسي ورفاعة الطهطاوي وقاسم أمين.

ضحكت مؤيدة لكلامها:

- فعلا مدام سالي... والأحلى لو نعرف نقابلهم.
وفي هذه اللحظة تحديدا قام الباشمهندس محمود الأسعد، وقال بصوت
جهوري:

- أنا ممكن أساعدك تقابليهم يا دكتور.

قلت بسخرية:

- إزاي بقى؟

- عن طريق آلة الزمن بتاعتي اللي اخترعتها.

وعند هذه الجملة تحديدا ساد الهرج والمرج في القاعة، بعدما ذهل الجميع.
حاولت أن أسيطر على الموقف دون جدوى، حتى تقدم محمود وأمسك
الميكروفون، وتحدث في حزن قائلاً:

- من فضلكم اسمعوني...

أنا عملت آلة الزمن دي عشان كنت عاوز أرجع بالزمن أمنع زواج والدي
ووالدتي، بسبب اللي شفته في حياتي...

وبعد هذه الكلمة تحديدا، انهارت الدكتورة دولت في بكاء هستيري.

أكمل محمود حديثه قائلاً:

- وفعلا كنت انتهيت من آخر جزء فيها قبل ما الدكتورة مها تكلمني بيوم واحد،
لما قابلتها لفتت انتباهي إن الأفضل نشتغل لتحسين المستقبل، بدل ما نبكي
طول عمرنا على الماضي... وبعد ما روحت بصيت للآلة اكتشفت إنني مش
عاوز أرجع بالزمن لورا.. لأن ربنا إدالي مميزات كتير جدا مادهاش لناس
تانيين... زي الصحة والذكاء والنجاح، وإني الحمد لله محبوب من كل الناس،
ومؤهلات كتير ربنا عوضني بيها...

ساعتها بس اقتنعت إن الطريق اللي اختاره ربنا كان أسلم طريق بالنسبة
لي... وإني ضيعت وقت طويل وأنا ببص على الماضي... في حين إن الأمل
دايما في المستقبل... واللي ضاع مني غصب عني... هعوضه في ولادي إن
شاء الله.

وخيم الصمت على المكان بعدما سقطت الدكتورة دولت مغشيا عليها.

∞ ∞ ∞ ∞ ∞

- طمنا يا دكتور.. أخبار دكتورة دولت إيه دلوقتي؟

- خير بإذن الله، هي عندها ذبحة صدرية وهتفضل تحت الملاحظة في العناية
المركزة لحد ما نتطمئن عليها.

قلت بحزن:

- ربنا يعدّيها على خير.

كان محمود يجلس شاردا على أحد الكراسي... جلست بجانبه وبدأت حديثي:

- ماتقلقش يا باشمهندس.. إن شاء الله ربنا هيقيومها بالسلامة...

رد بحزن:

- طول عمري حاسس إن وجودها مش فارق من عدمه، لكن لما اتحطيت في
موقف إني ممكن أخسرها، حسيت إني ضغطت عليها زيادة عن اللزوم.

- ماتقلقش.

حاولت أن أخفف من وطأة الموقف، فضحكت قائلة:

- إنت عندك آلة زمن بجد؟

- هتروحي تقابلي مين؟

قلت بحماسة وأنا أغمز بعيني:

- قاسم أمين.. هتيجي معايا؟!

∞ ∞ ∞ ∞ ∞



الفصل الثامن: بين الماضي والحاضر..

«الفشل هو الفرصة التي تتيح لك البدء من جديد ولكن بذكاء أكبر»

هنري فورد

امتلت الجمعية عن آخرها بالأعضاء... وكنت فقدت سيطرتي تماما على الوضع..

قلت بانفعال:

- أرجوكم يا جماعة، من فضلكم عاوزين تتفاهم بأسلوب غير دا...!

بالهدوء نوصل لحل!

قالت هيام بصوت جهوري:

- الحل في إيدك يا دكتورة، سيبينا نغير الماضي من فضلك عشان حياتنا تستقيم.

قلت بعدما حاولت تمالك أعصابي:

- من فضلك يا هيام، لازم أقعد مع كل واحد لوحده اليومين الجايين.. وأوعدكم بعدها هنوصل لأفضل حل إن شاء الله.

وبعد يومين كاملين من النقاش مع أفراد الجمعية...

دخلت مكنتي مسرعة، وقلت وأنا أرتب أوراقى استعدادا لوضعها في حقيبتى:

- من فضلك يا ندى، إنتى وملك هتتواصلوا مع كل أفراد الجمعية، تبلغوهم على جروب الواتس الخاص بالجمعية إن فيه اجتماع عاجل بكرة الساعة عشرة صباحا إن شاء الله.

وفي تمام الساعة العاشرة دخل جميع أعضاء وعضوات الجمعية إلى القاعة..

كان يبدو القلق ظاهرا على الجميع...

بدأت كلامي:

- بسم الله الرحمن الرحيم..

مبدئيا عاوزة أطمئنكم إنى عمري ما هتدخل في اختيار أي حد فيكم للطريقة اللي عاوز يدير بيها حياته...

اليومين اللي فاتوا سمعتكم، وجه الوقت إنكم تسمعوني، وبعدها خدوا وقتكم في التفكير واتخاذ القرار...

الغالب منكم مُصّرّ وبشدة إنه يرجع بالزمن لتغيير الماضي، اعتقادا منه إن دا هيغير الحاضر والمستقبل..

خليني بس أوضحلكم إن دا شعور طبيعي جدا جدا، وأنا حاسة بيكم لأنني مرّيت بنفس الظروف...

اللي لاحظته من خلال كلامي معاكم إن العامل المشترك بيننا بعد التعرض للصدمة، إننا بنمر بأربع مراحل.

1. إنكار الواقع.

ندم وسجن في الماضي.

إساءة استخدام الحاضر.

خوف من المستقبل.

المهم...

خلينا نمسك مرحلة مرحلة...

إنكار الواقع...

لما بنفقد الزوج بتلاقي نفسك في مواجهة مجتمع كامل من الزومبي مشوهي الخرائط الذهنية... اللي إنتي بالمناسبة واحدة منهم...

بيكون الحل الأسلم والأسهل اللي بيوجهك عقلك ليه، إنك تنكري قدام الناس اللي حصل، لأنك مش قادرة تواجهي جولفدان ومثيلاتها..

وبعدين ترفضني تصدقيه مع نفسك، وتبتدي تكدي كدبة وتصدقي انها مجرد سحابة صيف وهتعددي... عقلك مترجم الوضع إنك لبستي في حيطه، وبالتالي رافضه...

فعايشة كل أملك في الحياة إن الميّه ترجع لمجاريها، وندلق على بعض زباله فيها...

وبعدين؟!!

وبعدين مفيش حل، والحيطة اللي لبست فيها سد قدامي... مفيش غير إني أدعيس على الماضي...

2. سجن الماضي..

ماليش حل غير إنني أبص ورايا تاني، أقلب في الدفاتر القديمة إذ ربما ألاقي
أي ثغرة أخرج من الموقف دا... أو أبلع أي حاجة تفقدني الذاكرة..

طب ما نشوف دفاتر جديدة؟ لأ...

عباس الضو قال لأ لأ

بتدخلي بعدها في رحلة البحث عن الثغرات اللي ممكن توديكي لمرحلة جلد
الذات، زي مثلا...

كان بيضريني

وممرمطني

وبخيل

وابن أمه

بس أنا مرة كحيت غصب عني في وشه..

يكونش دا السبب؟!

بس، وجدتها... أنا هرجع وهبطل أكح في وشه...

وهصلح كذا وكذا وكذا...

وناسية حاجة مهمة قوي، إن ربنا قال في القرآن: «إن يريدنا إصلاحا يوفق
الله بينهما»...

يريدا، يعني الطرفين والعيلتين وكله... يعني تكون رغبة مشتركة..

بمعنى، ممكن يكون طرف عنده رغبة حقيقية للإصلاح لكن الطرف الثاني
ما عندوش نهائيا..

الطرف الثاني عاوز يبقي الوضع على ما هو عليه، وإنت أو إنتي ظبط نفسك
عليه، ماتوجعوش دماغنا...

وماله.. هرجع وأستحمل الوضع اللي ما هو عليه دا.. حلوا!

بالمناسبة، الوضع اللي ما هو عليه دا وإنتي جواه ماستحميلتهوش
واتطلقتي... أو طلقت...

أصل ما كنتش متخيلة الحياة من غير زوج صعبة كدا!

هستحمل وأعيش وخلص...

طيب يا جميلة، روجي ضيعي عمرك الجاي في الدخول في حلقة مفرغة من هرجع وهصلحه، تقومي ماتستحمليش، تقومي تطلقي، تقومي تقولي هرجع وأصلحه...

ولو صلحته... ودا مستحيل...

طب وهتعملي إيه في اللي حواليه؟!

بالمناسبة، هو حواليه منظومة متكاملة من الخرايط الذهنية، والده ووالدته وخالته وجده وتينة وأسرة البرنامج..

من الآخر يا بنتي...

لو عملتي اللي عليكي أثناء فترة الزواج من وجهة نظرك ونظر الحكماء، واللي حواليك قالولك إن الجوازة فاشلة...

يبقى هقولك مفاجأة، إن حياتك من غيره أسهل بكثير...

وبالمناسبة مش معنى إنها جوازة مش ناجحة إنك غلط أو هو غلط، ممكن جدا تكوني لون وهو لون...

هو أحمر شفتشي...

وإنتي إسود ومهيب...

ممكن تكوني overqualified.. إمكانياتك كثير عليه، فيه فرق سرعات بينكم...

هو من category مختلف أحسن أو أوحش...

المفاجأة إنك طالما وصلتي للطلاق يبقى إنسي إنك تستحملي أو هو يتغير...

أي والنعمة...

إلا في حالة واحدة، تكوني فعلا غلطانة غلط حقيقي مايتخلفش عليه اتنين، ساعتها ارجعي وصلحي واشتري بيتك فعلا...

طيب ومشاعري وأحاسيسي، مرة وهو بيضربني بالمفك في عيني قاللي يا بيبي...

الذكريات هتقتلني...

في الحالة دي لازم تغيري خريطتك الذهنية تجاه الذكريات...

مش الهدف منها أفكرها وأحزن...

بالعكس أفرح إن فيه لحظات سعيدة أنا عشتها في حياتي كفلانة...
شيليه هو من دماغك وخدي القرار إنك تنسيه وتكسري كل حاجة متعلقة
بیه ...

لو كنتي بتمشي في شارع وإنتي متجوزاه، إمشي فيه مع جروب من أصحاب
بتحبهم، واخلي ذكري جديدة..

لو كان مانعك من معرفة صديقة معينة، ارجعي كلميها وتواصلي معاها...

لو منعك عن الفيس بوك ارجعي افتحيه...

لو كان مانعك من زيارة قرابك روحيلهم كلهم...

كل التصرفات دي هتدي إشارة لعقلك اللاواعي إن الشخص دا انكسر من
جوايا وانتهى فعلا...

اعملي كل طموحاتك اللي كانت متأجلة، واخلي ذكريات جديدة...
وبعدھا؟!!

عيب عليكى الجزء الثاني...

أقولك أنا؟!!

ياہ.. يا ريت اللي جرى ما كان... يا ريتني ما كنت اتجوزته ولا شفت وشه...
وفي الحالة دي أحب أقولك أنا من موقعي هذا، وفي هذا الكتاب، أحب أشكر
طليقي من كل قلبي هو ووالدته بجد...

لولا الله ثم إتم ماكنتش اتعلمت

ماكنتش فهمت

ماكنتش بقيت

كان زمانى واقفة قدام الفرن بعمل صينية المكرونة بالبشاميل...
والهدف من كلامي إنك لازم تتشندلي عشان تتغيري، لازم تتخبطي في
نافوخك عشان تفهمي إنك ماشية في طريق غلط.

نتنقل للمرحلة اللي بعدها...

3. إساءة استخدام الحاضر:

مرحلة الحاضر اللي للأسف لما بنفكرها بنستغلها غلط تماما...

في المرحلة دي بنحس إن خلاص الأبواب اتقفلت كلها و game over
بتكوني سلمتي إنه فعلا فيه مشكلة حصلت وبتتصدمي صدمة عمرك..
ويجيلك فورا السؤال اللي عشانه عملنا الكتاب...

هو أنا ضعت ولا إيه؟!

في المرحلة دي بتبتدي تدوري وراه.. يا ترى بردان ولا حران؟ زعلان ولا
فكسان؟

جلبي جايد نار يا سنوسي..

هو عايش عادي كدا؟!

وتبتدي تدوري على أخباره بطرق مختلفة، عشان تتأكدي إنه مشندل على
وشه... اعتقادا منك إن دا هيبرد نارك..

وتبتدي تسألني اللي حواليني...

يا ترى حاسس اللي أنا حاساه؟ لا بقولكم إيه ما هو لازم يحس!

بالذوق بالعافية يحس..

دا أنا أروح فيكم في داهية، كتفوه وحسسوه...

يا نعيش عيشة فل يا نموت إحنا الكل...

طب معلش ممكن بس لحظة!

عاوزة أسالك سؤال يطرح بلح...

هو لما يحس وإنتي ما زلتي حاسة.. إنتي كدا استفدتي إيه؟ على رأي عمو
مرتضى منصور...

ما هو إنتي هتكوني لسة حاسة وزعلانة، هيفرق إيه هو زعلان وحاسس ولا لأ؟
مش فاهمة...

عشان أنتقم...

ماشي اعتبريه حس.. ها؟ إزي الحال؟!

آه تصدقي لسة حاسة ومتضايقة!

عندي حل أسهل بكثير، ما بدل ما يحس وإنتي تحسي ونحس كلنا،

ما بلاش تحسي من الأول أسهل.. وغيري إحساسك بتغيير خربطتك الذهنية
تجاه إحساسك دا...

كنت مرة بعمل كوتشنج سيشن مع بنوتة زي السكر، وبعدين حكلي إن هي
اتطلقت من سنتين، وكانت بتتألم جدا، وقعدت تدور على أخبار طليقها لحد ما
اتأكدت إن هو كمان متضايق ومخنوق...

بتقوللي المفاجأة إنني بعد سنتين من التدوير، ولما وصلت لإنني اتأكدت إنه هو
كمان متضايق، ماستفدتش أي حاجة غير لمدة ساعة واحدة، وبعدها فقت
على الحقيقة المرة، إنني ما زلت زي ما انا، وما زلت محلك سر، ووضعه لم
يقدم ولم يؤخر في إحساسي ولا وضعي أي شيء...

ومن هنا خليني أقولك حاجة..

خدي بالك.. أي إحساس أو مشاعر عندك ما هي إلا مهارة إنتي طورتيها
وبقيتي محترفة فيها،

يعني مثلا الشعور بالفشل أصبح عندك مهارة.. إنك تجمعني كل معاني الفشل
قدام عينيك من ساعة ما كنتي صغيرة، وتبتدي تقتنعي إنك فاشلة، في حين
إن مواطن النجاح أكثر بكثير،

وكمان الشعور بجلد الذات ما هو إلا إنك بتجمعني كل المعاني والأفكار اللي
ليها علاقة بتصرفات إنتي غلطتي فيها، وتبتدي تقتنعي إنك ما بتعمليش حاجة
صح، في حين إن المواقف اللي أحسنتي فيها التصرف أكثر بكثير...

وأهم واحد الشعور بالنكد والحزن.. وبالتالي إنتي تقدري تتحكمي في إنك
توقفي إحساسك بالألم، بس لو أخذتي القرار واشتغلتي على نفسك...

المهم نكمل...

وإنتي في مرحلة الحاضر، تبتدي عشان تريحني قلبك تدوريله على
سيناريوهات انتقام..

ووالدتك تقول وهي بتدعي: إلهي لا يكسب ولا يربح.. يَنْشَكُّ في معاميعه
البعيد..

طب معلش لما ينشك حقا هيرجع إزاي وإنتي لسه مكانك بالمناسبة؟
مفيش أي جديد غير إنه جاله دبوس في معاميعه!

خلاص بلاش ينشك...

يموت محروق

يسقط عليه نيزك
أمه هتموت مشلولة
هيحلبوه مع جاموسة هبلة
هحرمه من العيال...
وبعدين أيام عمرك اللي بتروح هدر دي نظامها إيه؟!
- الإجابة.. بسم الله الرحمن الرحيم.. (وإنتي بتميلي على الميكروفون
ومبتسمة ببلاهة)
كنت مستنية أنتقم
- آه عشان إيه؟
- عشان هو وحش وظلمني.
- طب حلو.. هو وحش وربنا خلصك منه.
- بس خسرت كثير والمجتمع مش هيقلني.
- عشان المجتمع عبارة عن ناس عاشت وماتت وهما شايفين اللي قبلهم
بيعملوا حاجة، فقلدوهم وعملو زيهم.. خليكى إنتي أول نموذج يكسر
الموروث.
- ما عنديش طاقة.
- معلش العربية المصدية لو بديتي تشغيلها هيبقى صعب لو اشتغلتي عليها
هتجري، أو عدك.
- وأتعب ليه؟ إديني فرصة أرجع أعدل الماضي.
- عاوزه تغيري الماضي؟! غيري الحاضر.. لو علمتم الغيب لاخترتم الواقع.
- إنتي مابتفهميش؟! بقولك الواقع مش عاجبني.
- خلاص غيره.. غيري نفسك.
- إزاي؟!
- غيري خريطتك الذهنية.. إنك مش قدام حيطه سد، وإن فقدان الزوج مش
نهاية العالم ولا الجواز هو الهدف الأسمى...
أجيبك دليل؟

من كام سنة كنت هموت على عربية لونها سيلفر.. قايمة نايمة بحلم وأنا
بفحط بيها في الشوارع.. إوعى..

وبعدين؟

ولا حاجة.. جبتها وزهقت منها...

عارفين المثال دا زي إيه؟

زي الناس اللي بتتجوز وربنا يخلي حياتهم تمام وزى الفل.. عارفين يحسوا
بإيه؟

بيحسوا بملل.. وتلاقيها بتقول كل شوية: أنا مش لاقية نفسي، أنا زهقت من
عيشتي.

وإحنا بنتخيل إنهم خايفين من الحسد أو بيأفورا أو ما بيحمدوش ربنا...

أضربك مثال جميل جدا...

الممثلين الأجانب كتير منهم بيجروا يجروا ويبقى عندهم الشهرة والفلوس
ومش ناقصهم حاجة حرفيا، ونلاقيهم فجأة انتحروا...

لأنهم لما بيحققوا كل اللي تخيلوه غاية، ما بيلاقوش برضه السعادة
وبيزهقوا... فييفقدوا رغبتهم في الحياة...

ومن أمثلتهم روبن ويليامز...

أما جيم كاري، الممثل الأمريكي الكوميدي المشهور، قال مقولة العالم كله
تعجب ليها..

قال إيه بقى؟!

قال:

I hope every body could get rich and famous and will have
everything they have ever dreamed of ...so they will know that it is
not the answer...

ترجمة كلامه:

بيقول أنا بتمني كل واحد يبقى مشهور وغني ويحقق كل حاجة حلم بيها،
عشان في الآخر هيعرفوا إن مش دي الإجابة...

لأن guess what ..

الهدف اللي سعى له مش هو دا الغاية العليا... زي بالظبط إحنا كدا لما
بنسعى للجواز والزوج وهو برضه مش الغاية العليا...

أومال إيه الغاية العليا؟!

قلتلكم قبل كدا نسيب بصمتنا على الأرض...

خليني معاكي إنك أخذتي الفرصة ترجعي واحدة ماتجوزتش...

هديكي اختيارين...

مطلقة أو أرملة أو متأخرة في الجواز، بس ست ناجحة ومبهرة بمعنى
الكلمة...

بنت لم يسبق لها الزواج بس عادية...

مين هيلفت الانتباه أكثر؟!

كام واحدة من صاحباتك حكتهك إن جوزها انبهر بزميلته في الشغل ودايما
يقول واو..

مش هي حلوة وقمراية وتمام ومتجوزة أهى، وهو اللي اختارها واتجوزها،
وهي ماسبقهاش الجواز...

بس ببص على زميلته القوية المبهرة مهما كان وضعها الاجتماعي...

لأن الست القوية جذابة.. اللي بتجمع بين قمة قوة الشخصية وقمة الضعف
الأنثوي أمام من يستحق...

أديكي مثال؟

السيدة خديجة رضي الله عنها كانت متزوجة مرتين قبل النبي محمد.. وكان
منبهر بيها...

ورغم إن فرق السن كبير..

ورغم إنها مش بكر.. إلا أنه عاش ومات مبهور بيها وماتجوزش عليها

وقال: والله ما أبدلني الله خيرا منها...

لأنها ببساطة... ست... ناجحة ومبهرة.

عاوزه تغيري الماضي، اشتغلي على خريطتك الذهنية إنك فعلا ماخسرتيش..

وقرري تسلكي طريق التميز...

- بس أنا فاقدة ثقتي في نفسي..

- عارفة ليه؟! -

لأنك مكسلة ومابتعمليش اللي عليكي، وعارفة من جواكي إيه اللي لازم
يتعمل ومابتعمليهوش.. بتدوري على الأسهل..

وبعدين لحظة...

إنتم عارفين أصلا يعني إيه كلمة مطلقة؟

دي فخر وربنا، دي معناها إنك انطلقتي، كنتي محبوسة واتفك سجنك، دا
المفروض تزغرطي...

4. طيب والمستقبل؟!

لأ دا سواد السواد بقى...

هو هيتجوز ويعيش حياته، وإنتي ماحدث هيرضى بيكي لأنك مطلقة..

ومش هتعرفي تبندي مع حد ثاني لأنك مش هتلاقي، ولو لقيتي إنتي
اتعقدتي...

أقولك الأنقح؟

ولادك هيروحوله بعد ما تتعبي فيهم وتربيهم...

والواد الصغير ناوي يحط السيخ المحمي في صرصور وذنك، وهتموتي لوحدك
في الشقة ماحدث هيدري بيكي...

أقولك من الآخر؟ روعي موتي خميس وجمعة وتعالى...

وحطي على نفسك صبارة ولازم تدخل بالنتر..

النتر المناسب للموقف دا أغنية أيها الراقدون تحت التراب هههههههه

تعالى هنا بس أما أقولك...

راجعي الكلام السلبي اللي فوق دا وبصيله بجد من بعيد... بالله عليك
حاساه منطقي؟!

- آه عادي ويحصل على فكرة...

- آه حصل كل قد إيه؟ وحصل كله كدا مع بعض يعني؟!

وبعدين معلش ثواني...

والدي ربنا يبارك في عمره دايمًا يقوللي: يا بنتي ربي ولادك بإخلاص، وتأكدي
إن الطفل استحالة ينسى اللي رسم معاه تاريخ حياته...

- معلش فيه عيال راحوا لأبوهم...
- حلو.. بركة يا جامع... من الأول كدا إوعي تخليهم الغاية العليا...
وإوعي كلام الناس زي «ربنا يجعل عوضك في ولادك» يآثر فيكي...
ويكأنهم عاوزين يخلّوك محور جديد على مزاجهم...
لأ معلش مفيش أي محور في حياتي غير الله ثم هدفي الأسمى...
وولادي تربيتي ليهم طاعة هعملها على أكمل وجه.. وهحب أشوفهم أحسن
ناس...

من غير ما أعمل حاجة غصب عني ولا أظلمهم.. وسبق وشرحتلكم النقطة
دي في مشكلة الأولاد...

أما موضوع إنه هيتجوز أو بيتجوز... معلش لحظة هضربلكم مثال...
هنفترض إنك اشتريتي فستان.. روحتي البيت جيتي تلبسيه لقيتته ضيق، أو
مخلي شكلك وحش قوي..

كل ما تلبسيه إنتي مش مرتاحة والناس بتعيب عليك...
قررتي إنك تستغني عنه.. تديه لحد محتاج أو بنت خالتك أو أيا من كان...
ولقيتها لابساه وشكله حلو عليها...

أو شكله وحش...

هيفرق معاكي؟!

- معلش جوزي مش زي الفستان!

- أنا بحاول أقربك الصورة عشان تفهمي إنه حاجة غير مناسبة ليكي، حتى لو
كانت مناسبة لغيرك أو لأ، لكن اللي يهمني إنها ماتناسبكيش...

الناس اللي بتنهار يوم جواز طليقها...

بتعيطي ليه بجد؟

لو كان ظلمك يبقى عادي يعني مش قصتي، واحد ظلمني وراح يظلم واحدة
تانية.

- لأ معلش ما هو دمر حياتي وراح شاف حياته.

- مبدئيا لازم تفهمي إنه لو ظلمك فعلا يبقى استحالة ربنا هيسيبه..

ثانيا مين قالك إنه شاف حياته؟ خلينا نفترض إنه شاف، ما تشوفي إنتي
كمان... مش فاهماكي يعني.

- لأ معلش ما أنا ما حدش هيرضى بيا.

- ارحميني، إذا كان إنتي مش راضية بنفسك، عاوزة حد يرضى بيها إزاي
وإنتي بالوضع دا؟! هنلف نلف ونرجع لنفس النقطة

الحل طريق واحد... إنك تنجحي

فلما تنجحي وترضى عن نفسك هتلاقي كل مشاكلك اتحلت...

قاطعتني مدام نجلاء منصور قائلة:

- نفهم من كدا إنك مش هتسمحيلنا نرجع بالزمن إلا عشان نستفيد من
الأخطاء بس ونستعملها لتحسين الحاضر؟

قلت:

- مش بالظبط يا مدام نجلاء... أنا بس عاوزاكم تفهموا إن...

قاطعتنا هيام فجأة وقالت بعصية:

- أنا مش مقتنعة.. من فضلك يا دكتورة سيبيني أرجع أغير الماضي، ليه مش
عاوزه تديني الفرصة؟

نظرت إليها مباشرة نظرة ذات مغزى، وقلت بعدما اتجهت نحوها:

- براحتك يا مدام هيام...

وأدرت نظري إليهم جميعا:

- حد حابب يروح مع مدام هيام؟

سكت الجميع وكأن على رؤوسهم الطير...

قلت بابتسامة يملؤها الغموض:

- واضح إنك ماسمعتيش الكلام اللي قلته كويس.. لكن ما علينا... هسمحلك
تعملي اللي إنتي عاوزاه... وهنستنى نشوف النتيجة... أتمنى نشوف هيام
جديدة...

قالت بصوت طفولي:

- أنا بشكرك بجد.

نظرت إليهم قائلة:

- حد يا جماعة عنده رأي تاني؟!
قوبل سؤالي بالصمت من الجميع...

قلت:

- تمام يبقى هنفذ اللي قلناه....
وبعد رحلة مدام هيام، هنقرر هنعمل زيها ولا أكمل كلامي..
اتفضلوا.

oo oo oo oo oo

خبطت على مكتبي بعصية وقلت وأنا أنظر لندي:

- مش ممكن، مش عاوزين يتغيروا، أنا تعبت يا ندى بجد.

قالت ندى في محاولة منها أن تهدئ من غضبي:

- معلش، اهدي يا دكتورة مها، بإذن الله كل حاجة هتبقى تمام...

- اطليلي محمود بسرعة من فضلك.

- صباح الخير يا محمود.. طمني إيه أخبار دكتورة دولت؟

-

- ياه، الحمد لله خرجت واتصالحتم؟ فرحتني والله.

-

طيب أرجوك عاوزاك في موضوع مهم جدا... لازم تعدي عليا في الجمعية
النهارده... هستناك الساعة ٦ مساء كدا.

جاء محمود، وبعد أن تحدثنا وحكيت له كل ما حدث...

قال وهو مقطب لجبينه...

- نبتدي إزاي؟

سألته:

- آلة الزمن فين؟!!

- في شقتي في مصر الجديدة...

- طب يزعجك لو ابتدينا؟!!

قال بسرعة:

- إطلاقاً يا دكتورة.

- طيب تمام، هحدد معاك معاد وهنبتي بمدام هيام زي ما فهّمتك.

- مفيش مانع.

وبعدها...

حضنتني هيام بقوة ثم قالت:

- مش عاوزاكي تكوني زعلانة مني...

- أبدا يا هيام، أنا يهمني تكوني سعيدة...

قالت:

- مش هنساكي طول عمري.

ابتسمت بخبث:

- أنا متاكدة إنك مش هتنسيني...

لم تفهم معنى ابتسامتي.

دخلت الآله وأغلقنا الباب، وأخذ محمود يضغط على مجموعة من الأزرار...

وفجأة...

اختفت هيام..

والتفت إليّ محمود قائلاً:

- تمت العملية بنجاح يا دكتورة...

ابتسمت وأنا أقول:

- إلى لقاء قريب يا هيام.

∞ ∞ ∞ ∞ ∞

طرقت مدام نجلاء باب المكتب طرقات خفيفة...

قلت:

- اتفضل.

دخلت وقالت وهي تحاول ألا تضع عينيها في عيني:

- وبعدين يا دكتورة مها، هيام مارجعتش بقالها أسبوع...
أنا قلقانه عليها... والناس في الجمعية بدأوا يتكلموا.
قلت وأنا أنظر للأوراق أمامي:

- هترجع يا نجلاء.

قالت بدهشة:

- أنا مستغربة ثقتك دي.

دخلت ملك إلى غرفة المكتب دون استئذان وقالت بأنفاس متلاحقة:

- دكتورة مها، مدام هيام برة..

جحظت عينا نجلاء.. أشرت إليها أن تفسح الطريق، وخطوت بثقة نحو الخارج.
حينما رأيتها دار في رأسي الحوار التالي:

- يا لهوي شكلها عامل زي سلطان في مسرحية العيال كبرت، لما كان راجع
ولابس واحدة ست وبيقول مش دا منزل رمضان السكري...

نظرت إليها وأنا أحاول أن أكتم ضحكاتي:

- إزي الحال يا هيام؟

انخرطت في بكاء شديد...

نظرت إلى نجلاء التي كانت تقف بذهول لا تحرك ساكنا وقلت:

- من فضلك يا مدام نجلاء، نظمينا اجتماع عاجل بكرة.

هزت رأسها دون أن تنطق بكلمة واحدة.

وفي اليوم التالي...

وقفت هيام إلى جواربي، وحرص كل أفراد الجمعية على الحضور، والبعض
أحضر أقاربه من غير المنضمين لمشاهدة هذا الحدث التاريخي...

بدأت كلامي:

- أنا ماسمعتش هيام، وقلت تحكيلنا اللي حصل كلنا مع بعض...

تنهدت هيام في حزن ثم قالت:

- أنا قررت لما أرجع بالزمن إني ماتجوزش ابن عمتي اللي دمر حياتي...

ولكن لقيت نفسي بختاره ثاني لأنني بحبه، وقلته امضيلى على ضمانات
عشان أأمن مستقبلي...

وفعلا مضالي، ولما قرر يسافر هددته إني هقدم الورق اللي معايا للنيابة
وهمنعه...

نجلاء باهتمام:

- وبعدين.

هيام بحزن:

- ولا حاجة، هو معايا دلوقت بس سايبني وقاعد على القهوة طول النهار
ومابشوفوش، واكتشفت إنه متجوز من ورايا أخت صاحبه الأجنبي في السر.

ربت على كتفها بحنان وقلت:

- من فضلك اقعدي يا هيام.

ووجهت كلامي للحاضرين:

- اسمحولي قبل ما أكمل كلامي اللي كنت هقوله المرة اللي فاتت، أعلق
على اللي حصل لهيام...

هي ببساطة راحت تغير الماضي بس ماعرفتش، عارفين ليه؟

لأن اختياراتها ماتغيرتش...

ليه؟

عشان شخصيتها وخريطتها الذهنية وأولياتها ماتغيرتش...

وكل اللي حصل إن ممكن تكون أحداث اتغيرت لكن النتيجة واحدة...

الماضي لازم يكون موجود وزى ما هو بالضبط.. لأن المشكلة مش في
الماضي، المشكلة فيكي إنتي وفي خريطتك الذهنية اللي لازم تتغير..

عشان اختياراتك تتغير..

وشخصيتك تتغير..

وأولوياتك تتغير..

تقوم الدنيا تتغير، ودا تفسير الآيه اللي كل شوية أقولها «إن الله لا يغير ما
يقوم حتى يغيروا ما بأنفسهم».

والله ثم والله، لو غيرتي الماضي ألف مرة وإنتي لسه بنفس التفكير
هتوصلي لنفس النتيجة، ألبرت أينشتاين يقول:

قمة الغباء أن تكرر نفس الشيء وتتبع نفس الخطوات وتنتظر نتائج مختلفة.
قالت نجلاء فجأة:

- خلاص غير شخصياتنا وبعدين نرجع نغير الماضي.

- للأسف ماينفعش يا نجلاء، إنتي عاوزة تعكسي أحداث ودا عمره ما
يحصل... يوم ما تقرري تتغيري دا هيكون عشان إنتي فهمتي بعد
ما اتعلمتي، وكان لازم يحصل الماضي عشان إنتي تغيري الحاضر...

تأكدي دايمًا إن كل قرار غلط أخذته في الماضي، هو بداية لقرار صح
هتأخديه في المستقبل...

عشان نلخص الكلام اللي قلناه:

سر الخروج من الأزمة إنك تشتغلي بكل طاقتك في الحاضر...

تبصي وراكي بس عشان تستفيدي من أخطائك.. عادي نغلط وتتعلم ونغلط
ونتعلم..

ربنا خلقنا عشان كدا...

وبالتالي لما هننظبط حاضرننا ونستفيد من ماضينا، أوعدك إنك هتلاقي مستقبل
مشرق إن شاء الله... عاوزاكم تعرفوا حاجة مهمة...

في سباق الحياة.... عشان تحسي بالإنجاز لازم تحطي لحياتك هدف محدد
وواضح.. وإنتي بتجري ناحية هدفك إوعي تعملي حاجتين.

تبصي وراكي...

إلا في حالة واحدة بس، إنك تتعلمي من اللي فات، وتفتكري إن كل حاجة
وحشة عديتي بيها كان ليها الفضل في كل حاجة حلوة وصلتها، أو هتوصليلها
بعدين...

تبصي جنبك تشوفي اللي حواليك وصلوا فين..

(زي طليقك وغيره) دايمًا خليك في نفسك

لو عملتي الحاجتين دول هتتعبلي

وعمرك ما هتوصلي

مثال هيام يا جماعة مثال حي لكل واحدة مصممة تبص وراها، ومفكرة الحل في الماضي، وتقعده تحكي في المحكي وتهري في المهري..

واحدة مصممة ترجع لتجربة فاشلة مرة واثنين وثلاثة...

أو واحدة مصممة تمشي بنفس التكنيك وطريقة التفكير اللي كانت ماشية بيه والدنيا باظت...

اللي حابب يركب آلة الزمن يستفيد من أخطاؤه، يبلغ مدام نجلاء وندي عشان نسجل الأسماء ونحدد المواعيد...

شكرا...

قالت وهي تطالع الأوراق التي في يديها بتركيز:

- خلاص كدا تمام يا دكتور مها، كل الأعضاء تقريبا سجلوا أسماءهم معايا، وفي انتظار تحديد المواعيد...

قلت:

- هايل يا ندي.. ابعتي لكل اللي سجلوا أسماءهم على الواتس وقوليلهم إن فيه اجتماع بكرة ولازم يحضروه...

- الساعة كام؟

- خليه الساعة ١٢ الظهر كدا.. أنا مش هطول في الاجتماع لكن عاوزة أوضحلهم شوية أمور عشان رحلتهم تكون بفايدة...

∞ ∞ ∞ ∞ ∞

بعد أن أبدى الجميع حماسهم للرحلة بدأت كلامي...

قبل أي شيء أحب أحييكم على اتخاذ قرار إنكم تسافروا الماضي عشان تحددوا الأخطاء، ودا الحقيقة مؤشر كويس جدا، لأنه اعتراف ضمني إنكم مقتنعين إن لازم يكون فيه أخطاء من طرفكم...

ودا أكدلي إنكم بدأتم تمسكوا أول الخيط في رغبتكم في تحسين الحاضر وفهمتموا إنه ماينفعش الصعابيات.. مش بتجيب نتيجة..

الحل إنك تتحملي جزء من مسؤولية اللي حصل، وتشتغلي على نفسك عشان عملي نسخة جديدة منك يكون عندها حاضر ومستقبل مختلفين عن الماضي..

اسمحولي أوصيكم شوية وصايا تحطوها في بالكم وإنتم في رحلتكم، عشان تقدرُوا توصلوا لحلول...

أولاً:

لازم كل فرد فيكم ينوي قبل الرحلة إنه يكون صريح مع نفسه..
مايكونش عنده أي مكابرة لأن دا مش من مصلحتنا..
كل غلطة عملتها واعترفتي فعلا بيها هتخليكي تخطي خطوة لقدام ناحية
النسخة الجديدة منك..

ثانياً:

لما تعيدوا كل المواقف تاني أرجوكم ماتعيشوهاش بنفس الطريقة، وإلا
الرحلة مش هيكون ليها أي لازمة.

قالت مدام سالي عبد الواحد:

- يا ريت توضحي أكثر يا دكتورة.

- اللي أقصده إنك هتعيشي المواقف كأنك بتتفرجي على نفسك من خلال
شاشة سينما.. وبالتالي هيكون حكمك على كل المواقف بمنتهى الحيادية.

هفهمكم أكثر من خلال المثال الجاي دا:

لما بتحصل مشكلة بين اتنين في الشارع، والناس كلها تسمع صوت الزعيق
ويطلعوا يبصوا على الموقف من البلكونة..

ساعتها بيكون فيه طرفين المشكلة..

والشخص اللي بيتفرج من بعيد..

الاتنين اللي جوة المشكلة دايمًا كل واحد فيهم بيحكم من الوضع بتاعه،
وانحيازهم لموقفه، والزاوية اللي شايف منها وجهة نظره..

الشخص اللي بيتفرج بيكون ما عندوش أي مشاعر ولا تحيز لأي طرف،
وبالتالي بيكون قادر على فهم الموقف بشكل أعمق، خاصة لو مالوش علاقة
بالطرفين...

أرجوكم اتفرجي على الماضي كأنه فيلم إنتي مش البطلة بتاعته.. حيدي
مشاعرك تمامًا...

لما بنشوف فيلم ونتعلق بالبطل لازم بنبني أحكام من خلال زاوية البطل،
اعتبري إنك بتتفرجي على واحدة تانية إنتي ماتعرفيهاش واحكمي عليها...

قالت مدام مروة (إحدى عضوات الجمعية):

- إحنا المفروض نرجع من أول أنهي مرحلة؟ من وأنا طفلة مثلاً؟

قلت:

- سؤال ممتاز يا مدام مروة.. إحنا هنوصل عند الوقت اللي من بدايته أصبح عندي القدرة إني آخذ قرارات تخص حياتي، بداية مثلا من موقف دخول الكلية...

قالت مدام هاجر:

- بس أنا حتى الوقت دا ماكنتش عارفة آخذ قرار، فيه حاجات كتير أهلي غصبوني عليها...

سألتها:

- ودلوقتي دا اتغير؟!

- للأسف لأ... لسه بيتحكموا في حاجات كتير!

- ممتاز.. يعني دا وضع غلط وما زال قائم وما تغيروش.. وبالمناسبة مش دا الطبيعي، المفروض والطبيعي إنك بتقدري تاخدي قرارات وعندك القناعات الكافية اللي تخليكي تقدري تقنعي بيها اللي حواليك.. كون إنك ماعرفتيش عملي ده، وبالتالي معرفتيش تديري حياتك بالشكل المناسب ليكي (بعد آخذ مشورتهم فقط مش أوامرهم) يبقى هنا حصل غلط هتخطيه في سلة الغلطات، ولما ترجعي هندور إيه الأسباب اللي أدت لكدا ونعالجها إن شاء الله.

- ماشي، بس الوقت اللي حضرتك بتقولي عليه دا إحنا كنا صغيرين أوي؛ مش عارفين ناخذ قرار أو نفرضه على اللي حوالينا...

قلت بابتسامة:

- صغيرة من وجهة نظرك ولا من وجهة نظرهم؟ معلى بتفرق.. لأن الصغير والكبير مش بالسن، بنشوف كتير ناس كبيرة جدا ودماغهم صغيرة جدا...

يبقى مفيش حاجة اسمها صغير وكبير، فيه حاجة اسمها حد اشتغل على نفسه وحد لاء...

كون إنك كنتي فعلا مش شايفة نفسك أهل لاتخاذ قرار، فدا يا إما انعدام ثقة وكان لازم تصلحي قناعاتك تجاه نفسك، يا إما إنتي فعلا مش أهل لدا، وبرضه غلط، لازم تشتغلي على نفسك ولازم تصلحها.. كون إنك سبتي اللي حواليك يديروا حياتك في قرارات مصيرية إدارة كاملة، وتعملي حاجات تخالف قناعاتك اللي مع الدين يبقى دا غلط، وهتخطيه في سلة الغلطات.

ثم التفتُّ إلى الحاضرين...

- اسمحولي هكمل الوصايا:

ثالثا:

إوعي وإنتي بتشوفي أخطائك تستخدمى نظرية الشماغات (إلقاء اللوم)

زي مثلا:

هما السبب

هما اللي قالولي

هما اللي جبروني

الظروف كانت أقوى مني

وشوية تشغلي مهرجان أصحاب مريضة.. وعقول عبيطة، وناس كثير بتهيص
في الزبطة.. ناس مش سالكة.. مالهمش مَلْكة...

اطلعي من دور العيلة كامل دا... من الآخرالنظرية دي مابتأكلش عيش
خالص.. وهيعملوها شوية ناس في الآخرة لما هيقولوا يا رب كنا بنطيع
ساداتنا... وبرضه هيخشوا النار... معلش أصلها مش مبررات.. إوعي تخشي
في دور ليه يا زمن ماسبتناش أبريا..

رابعا:

إوعي ترجعيلي من الرحلة وإنتي بتبكي على اللبن المسكوب، وتقولي كلمات
زي:

يا ريت

لو

ماتقوليش كدا...

هترجعي وإنتي بتقولي مش هكرر غلطتي تاني إن شاء الله، أخذت القرار..

خامسا:

إوعي ترجعي وإنتي بتجلدي ذاتك وتحملها فوق طاقتها..

إحنا ربنا خلقنا نغلط ونتعلم ونغلط تاني ونتوب...

لو بنبص على غلطاتنا عشان نجلد ذاتنا ونكره نفسنا يبقى إيه لازمتها؟

إحنا راجعين عشان نحب نفسنا أكثر ونحس قد إيه اتعلمنا وفهمنا...
بتمنى التوفيق ليكم جميعا.. كل واحدة لما هترجع من الرحلة هتجيب معاها
سلة الغلطات...

من فضلك يا ندى صوّرلنا الورقة دي عشان هنديهاهم قبل رحلتهم
للماضي...

** الورقة التي أعطتها لها للعضوات قبل رحلتهم إلى الماضي **

حتى تنجح رحلتك إلى الماضي رجاء قومي بتنفيذ التعليمات التالية:

1. الصراحة مع النفس.
 2. حيدي مشاعرك في أثناء مراجعة المواقف، واحكمي بعين المراقب وليس بعين أي من أطراف المشكلة.
 3. إياك واستخدام نظرية الشماعات (إلقاء اللوم على الآخرين وتحميلهم سبب جميع الأخطاء).
 4. لا تعودي من رحلتك بكلمتين ألا وهما لو... ويا ليت... أو ما شابههما.
 5. لا تجلدي ذاتك أو تحملي نفسك فوق طاقتها.
- كانت أول من ستقوم برحلتها إلى الماضي.. مدام نجلاء
وقفت أنا ومدام نجلاء أمام آلة الزمن في شقة الباشمهندس محمود...
وجّه كلامه لنجلاء قائلا:

- حضرتك هتبليغيني بالوقت اللي عاوزة ترجعي عنده، وهتندمجي في الأحداث
لحد يومنا الحالي... أو يا إما هتختاري زمن محدد هنقف عنده وترجعي
مباشرة بعدها لزماننا الحالي..

طبعا تتابع الأحداث هيكون سريع، لكن إنتي مش هتحسي بدا.

نظرت إليّ نجلاء بقلق:

- مش هتيجي معايا؟

- ماينفعش يا نوجا، دي خصوصياتك وإنتي اللي لازم تحكمي وتفكري،
ماينفعش أنا اللي أحكم، ولما ترجعي احكيلنا اللي عاوزة تحكيه...

- تمام يا باشمهندس محمود... أنا عاوزة أرجع للوقت اللي كنت بختار فيه
طليقي.. وهرجع للحاضر تاني.. يكفيني الموقف دا.

أشار نحو الآلة:

- اتفضلي... الكلام دا يوم إيه سنة كام؟

وبعدما أجابته نجلاء دخلت الآلة، وضغط على الأزرار، وأغلق الباب، واختفت
نجلاء...

وجدت نجلاء نفسها في شقة والديها، كانت والدتها جالسه تبكي بجوارها، أما
والدها فكان يسير في الغرفة بتوتر ذهابا وإيابا، ويبدو عليه الانفعال...

- أنا مش مرتاحة للشباب دا نهائيا يا نجلاء يا بنتي، عيوبه واضحة أوي، زي
البخل، وتصرفاته وانفعالاته مش مريحاني للجواز دي.. أرجوكي اسمعي
كلامي وامشي ورا إحساس قلب الأم اللي مايخيش...

- يا ماما أرجوكي أنا وعزت متفاهمين وبنحب بعض، وهو قاللي إن نرفزته
وعصبيته دي بس بسبب التوتر اللي قبل الجواز، وبعدين يا ماما الحركات
اللي إنتي مفسراها بخل أنا مش شايفها كدا خالص، هو إكمنه بس مطحون
عشان توضيبات الجواز... وبعدين كل حاجة هتتغير بعد الجواز، هو وعدني
بكدا...

قالت والدة نجلاء بدهشة:

- إنتي شايفة إنه يسيبني أدفع تمن العصير اللي شربناه وإحنا في الخروج،
وأدفع كمان تذكرة دخول النادي اللي دخلناه كل دا مش بخل؟! وبعدين مش
قادرة أفهم إزاي متخيلة إنه هيتغير!

- ماما لو سمحتي.. أنا مقتنعة باللي بعمله ومنيش صغيرة، ولازم أخذ فرصتي
عشان أختار.

- أنا عاوزة أقولك كلمة تحطياها حلقة في ودنك... مفيش حد بيتغير، بالعكس
هو بيظهر دلوقتي أحلى ما عنده، واضربي في عشرة بعد كدا، الطبع بيغلب
التطبع يا نجلاء.. وبعد الجواز العيوب الحقيقية بتبتدي تظهر...

- اسكتي يا نادية، مفيش فايده من الكلام مع بنتك.. إحنا عملنا اللي علينا
ونصحناها وهي حرة.

∞ ∞ ∞ ∞ ∞

وجدت نجلاء تقف أمامي في شقة محمود وهي تبكي، وحكت لنا تفصيلا كل
ما حدث وأردفت قائلة:

- أنا خلاص عرفت أنا غلطت في إيه...

.....

كانت التالية مدام هاجر، وبعدها استمعت إلى التعليمات اختارت أن تعود إلى الموقف الذي يسبق طلاقها مباشرة...

- الحقيني يا ماما.. هشام ضربني علقه موت ورماني برة الشقة.. وأنا دلوقتي عند جارتني وفاء بكلمك من تليفونها.

- حسبي الله ونعم الوكيل فيه، أنا هطلب أحمد أخوكي ومسافة السكة هنكون عندك...

ثم...

- عيب عليك يا هشام، مايصحش كدا يا ابني.. ترضى حد يعمل كدا في أختك؟

- أختي متربية، بنتكم قليلة الأدب يا طنط.

- مش عيب لما تكلم واحدة قد والدتك بالطريقة دي.

قال أحمد أخو هاجر بانفعال:

- أقسم بالله لآخذ أختي وأنزل أعمل فيك محضر أوديك في ستين داهية... أنا همسك أعصابي من إني أديك علقه عشان هاخذ حقي بالقانون.

نظر إليه هشام بتحد، وقال وهو يشير باتجاه هاجر:

- خدها شوفها هترضى كدا تروح معاك؟ بس تعتبر نفسها طالق.

قالت والدة هاجر بانكسار:

- ومين بس يا ابني اللي جاب سيرة الطلاق؟!

وفي هذه اللحظة انفعال أحمد موجهها كلامه لهاجر:

- إنتي هتقومي تروحي القسم، ولا أسيبك وأمشي ومش هتشوفي وشي ثاني؟

لم تجب وأطرقت رأسها، وقالت وهي تبكي:

- أنا خايفة من الطلاق.

∞ ∞ ∞ ∞ ∞

وجدت هاجر تقف أمامي، وبعدها حكيت تفصيلاً كل ما حدث أخذت تردد:

- الحمد لله الذي لا يحمده على مكروهه سواه.

وجاء دور مدام رشا، التي استمعت الي التعليمات بدقة، واختارت الموقف بعد ولادة ابنها أسر بثلاث سنوات...

- وآخرتها يا رشا! أنا كل ما بزورك كل فترة بتخّصّ عليكِ، إنتي استحالته تكوني صاحبتني اللي أعرفها، إنتي اتحولتي لواحدة تانية كئيبة.. فين أيام الجامعة ورشا اللي كانت زي الفراشة!

- هعمل إيه يا آيات؟! أنا اتديست وخلصت آسر، ولازم يتربى وسط أبوه وأمه.
ثم قالت بمنتهى الحزن:

- واللي إنتي ماتعرفيهوش إنني حامل.

- بتهزري! يا رشا حرام عليكِ، إيه بس اللي خلاكي تحملي وإنتي في الظروف دي؟! يا بنتي ما إحنا كلنا عارفين إن جوازتك فاشلة، وكدا كدا هتتلقني.. إنتي وجوزك مفيش بينكم اتفاق في أي حاجة.

- أنا قلت لما هجيب الطفل الثاني هيعقل، وبعدين أنا الطلاق مش مطروح في بالي أصلا.

- أنا بجد مستغرباكي بعد كل اللي بيحصل معاكي دا، والطلاق مش مطروح.

- أنا هكمل عشان ولادي...

- لأ يا رشا، إنتي مش صريحة مع نفسك، إنتي هتكملي عشان إنتي عاوزه تكلمي.

وبعدها مباشرة..

قال آسر:

- ماما أنا دلقت فيه في أرض...

قالت رشا بانفعال شديد لا يتناسب مع الموقف:

- حرام عليك بقى!

ثم ضربت الولد بشدة...

انفعلت آيات وأخذت حقيبتها، وقالت وهي تهتم بالانصراف

- شوفيلي حجة تانية غير إنك مكلمة عشان ولادك، لأنك محملة نفسيا بشكل غير طبيعي، لدرجة إنك مش قادرة تحتوي إنك اللي عنده ٣ سنين... راجعي حساباتك يا رشا... سلام.

∞ ∞ ∞ ∞ ∞

عادت رشا من رحلة الماضي، وحكت كل ما حدث مثلما فعلت هاجر، ومن قبلها نجلاء.

أما مدام نيفين، فاختارت فترة ما بعد زواجها بعشر سنوات... وبالتحديد يوم طلاقها.

- آه يا ماما أنا سايقة أهو العربية ورايحة أجيب لينة ومروان من التمرين، وبعدها هنروح البيت نتغدى، وبعدين هوديهم الدروس بتاعتهم ونرجع نذاكر وننام..

- حرام عليكى يا نيفين، أنا مابشوفكيش يا بنتي وخايقة عليكى من الضغط دا..

قالت بعصية:

- هعمل إيه يعني يا ماما قوليلي يعني.. من فضلك يا ماما مع السلامة.. أنا عرفت مصيبة وعفاريت الدنيا بتنطط في وشي.

- إنتي بقيتي عصبية كدا على طول... مصيبة إيه يا بنتي كفى الله الشر..

- مش قادرة ولا عاوزه اتكلم.. سيبيني يا ماما أرجوكي.

- ربنا يهديك الحال يا بنتي... مع السلامة.

وبعد عودة زوجها عمرو من العمل...

- مالك يا حبيبتى مكشرة كدا ليه...

قالت بانفعال شديد جدا:

- طبعا هو إنت دريان بيه ولا حاسس بأي حاجة! حرام عليك يا شيخ ارحمني يرحمك ربنا.

- وطي صوتك يا نيفين وخلي أسلوبنا في الحوار حضاري أكثر من كدا.

- لأ هعلي وهعلي، لأنى قرفت منك ومن عيالك ومن ضغطك عليّ.. وفي الآخر أكتشف إنك متجوز عليا.

- هنتكلم وقت تاني لأنى راجع من الشغل تعبان، وطالما عرفتني حوار جوازي لازم أوضحك الصورة، وإنتي مش هتستوعبي ولا كلمة وإنتي بالانفعال دا.

- يا برودك يا شيخ، لا هنتكلم وقت تاني ولا تالت، أنا زهقت وقرفت من كتر الضغط والههم اللي أنا فيه، وفي الآخر تطلع شايف حياتك وبتتجوز.. كنت بفضيلك الطريق عشان تشوف حالك.

- وهو حد كان ضغط عليكى وطلب منك تعملي؟!!

- لا والله يعني، دي جزاتي؟ طلعت في الآخر غلطانة؟ بس لازم تفهم إنك انت اللي مابتحسش.

- إلزمي حدودك يا نيفين.

- مش هلزم وطلقني يا عمرو.

- إنتي طالق..

∞ ∞ ∞ ∞ ∞

توالى رحلات العضوات الواحدة تلو الأخرى.

وبعد أسبوعين...

قلت وأنا أتحدث بهاتفى المحمول:

- الحمد لله يا ريهام، العضوات رجعوا من رحلة السفر للماضي، وقعدت معاهم كلهم، والنهارده معاد الاجتماع.. لازم تيجي...

- هحاول يا مها، بس للأسف الدنيا ملخبطة عندي ومشغولة أوي اليومين دول.

- عموما شوفي يمكن تقدرى تيجي.

وفي الجمعية...

أدرت نظري بين كل الحاضرين.. شعرت أن رائحة الأمل تفوح في المكان، فالجميع يشعرون بالارتياح إلى حد كبير..

- شايفاكم مبسوطين ما شاء الله!

قالت مدام نرمين:

- الحمد لله، تقدرى تقولي حطينا إيدينا على الجرح...

- اسمحولي أبتدي...

لاحظت بعد ما قعدت معاكم كلكم، إن الأسباب الرئيسية أو الغلطات اللي عملناها خلطنا وقعنا في مشاكل كانت:

التمحور

حوالين فكرة معينة أو أشخاص أو حتى هدف...

اللي هو أنا بربط حياتي كلها بالحاجة دي...

بوهب عمري وأعصابي وتفكيرى...

بربط لدرجة بتوصل لحد العمى، بتخليني مش شايفة ولا سامعة أي حد حواليا...

وايه الغلط في دا؟

إنه من غير زعل درب من دروب الغباء ...

لو قلنا مثلا إن واحدة صاحبك ممحورة حياتها حوالين إنها عاوزة تسافر باريس...

وعمالة ليل نهار تعيط عشان هتموت وتروح السفرية دي..

مش هتحسي إنها حاجة غريبة جدا، ما تعيش حياتها عادي يعني لحد ما ربنا يكرمها وتسافر!

أهو لو ضربنا مثال بحوار الجواز، وقلتلكم إنه متعة من متع الحياة، وليس المتعة الوحيدة، وإنتي بتوقفي حياتك عليه، فدا كدا غلط...

قالت مدام نوال:

- الجواز سكن يا دكتورة.

- حلو، وعادي المال والبنون زينة الحياة الدنيا، متع الدنيا كثير، لكن الفكرة إن المحور اللي اتحط في دماغك أيا كان لازم يتغير.

لأنك من وجهة نظري بتكوني قاعدة قائمة نايمة بتدوري وبتلغي في فلك المحور ده، وهو العمود الأساسي في حياتك، اللي لو اتهدم تتهدم حياتك كلها.. لو اختل أو اتحرك من مكانه تبقي هتتجنني ومش شايفة أي حاجة تانية غيره، وفعلا تفكيرك يتشل ويقف وتبقي مش قادرة تتصرفي...

الحاجة الوحيدة اللي لازم تكون محور حياتك هي علاقتك بربنا سبحانه وتعالى، ثم الغاية العليا...

فيما عدا ذلك.. إنسي..

أيا كان الاهتمام بتاعك ماتخليهوش محور، خليه مجرد عامود..

عشان لو وقع هتلاقي عندك ١٠٠ عامود تاني.. إنما المحور الرئيسي لو وقع، كله بيقع... التمحور حوالين شيء أيا كان، يشبه إلى حد كبير من وجهة نظري شعور الأسر...

لو جينا نضرب أمثله...

تعلق الأم بولادها

تعلق الزوجة بزوجها
تعلق الشخص بشغله
تعلق الإنسان بالفلوس
أي تعلق من أي نوع.

سوء الاختيار

سواء اختيار أشخاص... أو غيره...

ودا ناتج لأنك ما عندكيش الخبرة الكافية لاتخاذ القرار.

قالت مدام سالي:

- بس إنتي قلتيلنا المرة اللي فاتت لازم ندير قرارتنا.

- مضبوط قلت، بس ماينفعش أكون عميا وأسوق تربلا بمقطورة..

وماينفعش برضه أسيب غيري يسوقها... يبقي أتعلم وآخذ خبرة الأول
وأشتغل على نفسي دايمًا... عشان أكسب ثقة اللي حواليا، وأعرف أهدل
حياتي صح.

1. سوء إدارة الأمور

من الآخر يعني إنك ما بتعرفيش تحسبها صح... فبالتالي بتخسري أو بتخلي
اللي حواليك ي خسروا.

2. الوقوف عند المشاكل

إني اتحطيت في موقف إني لازم أسوق المقطورة.

وأنا ما بعرفش.. ولو غيري ساقها هيروح طريق غير طريقي اللي أنا عاوزاه،
ومش عارفة أخذ قرار إني أتعلم.. أقوم أقف أعيط جنبها!

المفروض أنزل منها وأتعلم السواعة، وأغلط مرة واتنين وتلاتة، وبعدين هتعلم
تماما... إنما إحنا نلاقي في لحظات معينة دماغنا بتجيب وتتشل، وما عندناش
إستراتيجية التفكير برة الصندوق، وبننغمس في التفكير في المصيبة وإني
أنكد على نفسي...

ما عرفش ليه لاحظت إن فيه قطاع كثير من الستات، مش الكل طبعًا، بس
كثير مننا عندنا حته الأفورة في النكد...

لا مش بس كذا ده، فن الاستمتاع بالنكد والانغماس فيه، ويصل الأمر أحيانا
لمرحلة الاستمتاع المطلق بدور الضحية...

وتيجي الناس تقولك تعالي نشوف حل... أبدا سيونني!

هنا بيحضرني موقف محمد هنيدي في فيلم فول الصين العظيم.. كانوا راكبين عربية فيها قنبلة والباب مقفول عليهم، محمد هنيدي قاعد يندب ويقول هنموت منفجرين، ولما إلبنت الصينية نطت من العربية وجريت، لقيته قاعد في العربية.. رجعتله بتقوله: مستني إيه يا موهبي، قالها: أما تنفجر.

ده بالظبط اللي بحسه مع أي واحدة عندها مشكلة... قاعدة مستنية القنبلة تنفجر... بدل ما تشوف حل تزيح بيه القنبلة، أو تجري بعيد عنها أو تفكر هعمل إيه لو انفجرت.

...shift

اتعلمي عملي شيفت لأفكارك في الوقت المناسب...

بمعنى لما يحصلك مشكلة أو طوبة كبيرة تتحط في طريق حياتك، ماتقعديش قدامها وتربعي وتعيطي وتبصي وتعيطي... وتفكري إن الطوبة قطعت طريقك..

غيرت مسارك..

الطوبة وقفت في طريق سعادتي..

الطوبة منعنتني من الوصول للحلم اللي كنت ناوية أوصله آخر الطريق...

بصي يا حبيبتني، طالما ربنا قضى إن الطوبة دي تقع الوقت دا، يبقى تأكدي إنك لو كنتي كملتي في الطريق اللي كنتي ماشية فيه، كنتي هتقعي في بلاعة، أه والله زمبؤولك كدا... طيب يبقى إيه الحل؟

الحل في الشيفت أو التحول، تحويل مسار فكريك أول ما تلاقي الطوبة فوراً، اعلمي الآتي...

1. فكري بسرعة وماتضيعيش وقت كثير.

2. بصي حواليك، شوفي الطرق الثانية، واختاري أسلم طريق يوصلك.

3. خدي قرار حاسم إنك تنسي الطوبة، ولما تفتكرها اتبسطي إنها وقعت في الوقت المناسب، ومسيرك والله في يوم تعرفي هي وقعت له، صدقيني، وعن تجربة...

إجري يلا.... مفيش وقت!

4. عدم اتخاذ القرار الصّح في الوقت الصّح.. وعمل التغيير المناسب في الوقت المناسب...

بحس إن اللّي بيصنع حياة الإنسان، بعد إرادة ربنا طبعاً، هو اتخاذ القرار... وربنا إدانا العقل وإدانا الاختيار، عشان كل واحد ياخذ القرار اللّي هو عاوزه، حتى فيما يخص عبادته لربنا...

السعادة قرار...

الحزن قرار...

الخوف قرار...

النجاح قرار...

الفشل قرار...

الأخلاق قرار...

قلة الذوق قرار...

وما إلى ذلك.

يبقى لازم كل يوم الصبح نراجع القرارات اللّي أخذناها، ونشوف إيه منها قابل للتعديل.. وإيه القرارات اللّي ناوين ناخذها.. وإن كانت صح ولا غلط.. وإيه القرارات اللّي ممكن تغير مسار.. والقرارات اللّي ممكن تعدل مسار.. والقرارات اللّي لازم تحسم.. والقرارات اللّي ممكن نأجلها...

إوعي تعيشي حياة «هليهيّة» من غير ما تكوني فيها صانعة قرار، ومش بس كذا، تكوني قادرة على تنفيذه، وقبل ما تاخديه تفكري فيه كويس، وتحسبي أبعاده، والأهم من دا كله لو فكرتي قبل ما تاخدي قرارا كويس جدا.. ماترجعيش فيه...

أما بقى بمناسبة التغيير...

من فترة كنت بقلب في جوجل، لقيت خبر قديم عن شركة نوكيا، وإنها اتباعت لميكروسوفت.. الحقيقة أنا عارفة الخبر من زمان، بس بحثت على الإنترنت عن الأسباب اللّي خلت شركة زي نوكيا تفشل، رغم إن من حداثر إتناشر سنة كلنا كنا ماسكين تليفونات نوكيا... وافتكرت إنهم كانوا بيعتمدوا على إن التليفون كل ما صغر أكثر، كنا إحنا بننهر قوي إن حاجة صغيرة وفيها كل الإمكانيات دي..

المهم لما بحثت لقيت إن نوكيا اتعرض عليهم فكرة الشاشات الكبيرة، والتليفونات اللي إحنا بنمسك زيها دلوقتي، لكن المشروع ده اترفض عندهم، وقبلت بيه شركة سامسونج، وده لأنهم في نوكيا تخيلوا إن إحنا هنستمر في الانبهار بالتليفون الصغير، ولكن الحقيقة إحنا انبهرنا خلاص...

يلايه اللي بعده؟

وبالتالي لما الشركة رفضت التغيير انهارت في السوق، لأنها مالحقتش بتغيير في الوقت المناسب، وقدامها سنين على ما تلحق باقي المنافسين في السوق، وممكن بالمناسبة تلحق بس هتاخذ وقت ومجهود مضاعف شوية... وعشان كده لازم دايمًا كلنا نعمل لنفسنا updating للأحسن...

لازم لما نقع في مشكلة أو مانحسناش التصرف في موقف، بتغيير...

بنلاقي ناس عايشين بقالهم سنين بنفس العقلية، وبالتالي بيفضلوا محللك سر، مفيش أي تغيير لا في سلوكياتهم ولا على صعيد حياتهم الخاصة أو العملية...

طول ما إحنا ماشيين في الحياة، لازم على طول نضبط طريقة التفكير ونغير الأولويات ونخلي المعاني بتاعتنا إيجابية ناحية أي مشكلة أو أي موقف نتعرض له.. ماتخليش المعاني السلبية تسيطر عليك وتضيعي أيام من عمرك بلا هدى، وماتخليش أي موقف يعدي عليك اعتبارًا من غير ما تخرجي منه بفوائد.

مالا حظتوش حاجة؟!

كل الحاجات الغلط تقريبا بتأدي لبعض... يبقى عشان نلخص اللي فات كله، خليني أحطله عنوان طريف اسمه:

إستراتيجيات الفشل!

عنوان غريب، مش صح؟!

العنوان دا فيه كل الغلطات اللي إحنا عملناها في الماضي، معاها شوية تصرفات لو عملناها كلها مع بعض هنفشل لا محالة..

ودا اللي خلاني سميته إستراتيجيات الفشل...

أيون، حتى الفشل له إستراتيجيات لو عملتها أوعدك هتفشلي...

1. إنك تمشي بنفس الأسلوب في الحياة لفترات طويلة وإنتي مش ملاحظة إنك بتتقدمي، بل بالعكس بتتأخري.

2. إنك تكرر نفس التصرفات وتعالج الأمور بنفس الطريقة، وتتوقعي نتائج مختلفة.

3. إنك لما تقعي في مشكلة، بدل ما تدوري على الحلول تقعي تعطي على المشكلة أيام وشهور وسنين.

4. إنك ماتطوريش من نفسك وتعدي دايمًا من خططك ونظرتك للحياة، بما يتناسب مع تغير الدنيا حواليك.

5. إنك ماتختاريش الناس اللي حواليك صح.

6. إنك تحطي كل تركيزك وحياتك في حاجة واحدة بس، وتتمحوري حوالها، وتغضي الطرف عن كل حاجة تانية في الحياة.

7. إنك ماتشغليش مخك وتفكيرك، وتبقي بس متلقّي، وتسيئي إدارة الأمور.

8. إن وقتك يبقى رخيص عندك، وماتستغليش كل دقيقة فيه في حاجة مفيدة.

9. إن مايكونش عندك أي أهداف وعايشة كذا وخلص زي ما تيجي تيجي.

10. إنك تكوني بتخططي وكل حاجة، بس بتخططي غلط أو ماتنفذيش.

11. إنك ماتحطيش خطة زمنية لكل حاجة في حياتك.

12. إنك ماتقدريش عملي shift في الوقت المناسب لقراراتك.

13. إن مايكونش عندك إرادة.

أتمنى أول حاجة تعملوها تاخذوا القرار إنكم تتخلصوا من الخوف...

زي الخوف من التغيير

الخوف من اللي جاي

الخوف من المغامرة

الخوف من المجهول

الخوف من اتخاذ قرار

لما النبي آدم بيخاف بيضيع على نفسه حاجات حلوة كثير، ممكن فعلا تكون مستنياه... ماينفعلش أبداً أقبل بوضع مش عاجبني لمجرد الخوف... أو أشتغل شغلانة أنا تعبان فيها لمجرد الخوف من المجهول.. أو أجبر نفسي إني أعيش مع بني آدمين لا يوافقوا طريقتي في التفكير عشان أنا خايفة من التغيير...

لما نلاقي الدنيا قفلت لازم مانخافش، ولازم نغير الطريق... بس الأول نستخير ربنا سبحانه وتعالى ونتوكل عليه.

العمر أقصر من تضييعه في الخوف.

بالمناسبة...

أنا عندي ليكو مفاجأة... أنا بإذن الله هسافر للماضي مع الباشمهندس محمود الأسعد، عشان أقابل قاسم أمين... عشان أسأله عمل إيه عشان يغير فكر المجتمع ونستفيد منه...

قام الجميع بالتصفيق فرحا لهذا الخبر.

قلت:

- بس فيه حاجات اسمحولي هطلبها منكم على ما أرجع...

لو أخذتم القرار إنكم تتغيروا، أرجوكم اعملولي خطة ممنهجة للي ناويين تحققوه خلال الخمس سنين الجايين.

هنسافر مرة ثانية بس للمستقبل، عشان نشوف كل واحدة هتبقى فين.

إوعوا تكذبوا عليّ وتقولولي أخذنا القرار إننا نتغير.. لأن المستقبل وسفرنا له هيكشف كل واحد كانت من جواه نية حقيقية إنه يتغير ويحقق أهدافه ولا لأ!

قالت مدام هاجر باكية:

- مش قادرة يا دكتور.. أنا عملت كل اللي بتقولي عليه وبرضه مفيش فائدة، دماغي شغالة في اتجاه واحد إنني عاوزة أتجوز...

- هوني على نفسك يا هاجر، التغيير مش زرار هندوس عليه، أنا قتللكو كفاية دلوقتي ناخذ القرار... استحالة خربطتك الذهنية وقناعاتك اللي اتبنت في سنين هنغيرها بين يوم وليلة.. عقلك زي الكمبيوتر لما بتدخليله معلومات جديدة، الأول بيرفضها وبعدين يعمل scan عشان يتعرف عليها، وبعدين يعملها save

كل ما تجيلك فكرة إنك مش متجوزة أو الناس تعمل «مسم» ربنا يعوض عليك.. إدي فورا إشارة لمخك «لأ» عباس الضو قال لأ، واطردي الفكرة دي وقولي لنفسك:

هما عاوزين محوروني وأنا مش هتمحور

هما عاوزين محوروني وأنا مش هتمحور

بالذمة هتقدّري نفسك إزاي وإنتي ضاربك السلك، وواقعة من فوق السطوح،
وقاعدة ليل نهار تعيطي وتغني؟!
طفيت الشمع... طفيت الشمع...

ودا هيجرّك للنقطة اللي بعدها، وهي نقطة المجتمع..
لما استرديت جزء من ثقتي في نفسي بإني بدأت أسعى وأشتغل على إني
أغير أسلوب تفكيرِي.

ولما بدأت أتصرف بشكل مضبوط، وأخذت خطوات فعلية ناحية الخروج من
الأزمة، وصلت لمرحلة إني بقول: أنا مطلقة... حد له شوق في حاجة؟!
وجتلي فترة فكرت أطيع كارنيه أحطه وسام على صدري...
«مطلقة وأفتخر»

وكان هاين عليّ أقف في البلكونة أقول: يا أم نيازي صحي نيازي وقوليله إن
أنا مطلقة.. ودا لأنني ببساطة بدأت أنجح وعملت حاجة غير المعتاد، وهي إن
أي مطلقة لازم تعيش عالية وحزينة ورزينة..

أنا كسرت القاعدة، ودا كان كفيل إني أسترد جزء كبير من ثقتي في نفسي..
وأدب إيدي في عين أتخن تخين في المجتمع..

ودا كان مخالف لإحساسي في البداية بإني فاشلة ولازم أستخبي...

لأنني من جوايا عارفة أنني ما بعملش أي حاجة غير إني قاعدة بقرا كتاب حياتي
يا عين، وساعتها لما كانت البوابة بتقوللي «مطلجة» كانت بتلمسني، لأنني
عارفة إني لسه ماوقفتش على رجلي، هتقوليلي: وهو أنا المفروض أقوم
أجري ثاني يوم طلاقي؟ دا على حسب قدراتك طبعا..

لكن أرجوكي ماتضيّعيش وقت طويل..

أعملي زفت ديليت، مش شيفت ديليت، لأ زفت ديليت بسرعة، عشان
الساعة اللي بتخلص ما بترجعش ثاني...

وعدّلي فوراً أفكارك إن الطلاق خير مش حاجة وحشة ولا نهاية العالم، لكن
دا بداية لمرحلة جديدة من عمري.

وجدت على وجوههم علامات الرضا والارتياح...

ثم قالت مدام نجلاء:

- هتسافري إمتى يا دكتور عشان تقابلي قاسم أمين؟

قلت بحماسة:

- الأسبوع الجاي إن شاء الله...

هتجهز أنا والباشمهندس محمود بس شوية حاجات... عاوزة أرجع ألاقىكم
عملتم اللي طلبته منكم أرجوكم..

بالتوفيق إن شاء الله.

بدأت أنا ومحمود القيام بتجهيزات السفر لمقابلة قاسم أمين...

توجهنا إلى خان الخليلي، واشترينا بعض الملابس...

وجلسنا لأيام نقرأ في كتب التاريخ لمعرفة تفاصيل أكثر عن هذا الرجل
وعصره..

وفي اليوم المحدد...

ارتديت الحبرة واليشمك (ملابس النساء في ذلك الوقت)

وارتدى محمود بدلة من الطراز القديم، ولم ينس وضع الطربوش...

وقف محمود أمام الآلة ونظر إليها بتركيز ثم ضغط على مجموعة من الأزرار،
ودخلنا الآلة بعدها مباشرة، وأغلق الباب...

أغمضت عيني من فرط الخوف والقلق...

سمعت صوت محمود وهو يقول ضاحكا:

- خلاص وصلنا.

وجدت قدمي تتحسان ببطء شوارع القاهرة المعز، التي كانت تلمع كالمرآة...

كانت عيناى منبهرتان لما أراه من هذه المعالم...

سارت بجوارنا عربة غربية الشكل، بداخلها مجموعة من الرجال يرتدون
الطرايش الحمراء.

سألت محمود:

- إيه العربية دي؟

قال ضاحكا:

- دي عربية السوارس.. تقدرى تقولي وسيلة نقل عام.

كنت لا أستطيع أن أتحكم في انفعالاتي من فرط الانبهار...

المباني بديعة وأنيقة

وواجهات المحلات التجارية متميزة

شعرت برائحة عبق الماضي في كل مكان...

أفقت من شرودي على صوت محمود وهو يشير إلى أحد سائقي الحنطور
قائلاً:

لو سمحت يا حضرت.. عاوزين نوصل سرايا قاسم بيه أمين في حي الحلمية.

قال الرجل:

- اتفضل يا أفندي.

نزلنا مباشرة أمام السراي.. وتوجهنا نحو الباب...

تقدم البواب نحونا مستفهما من خلف الباب الحديدي، ثم قال بتشكك:

- يلزم خدمة يا أفندي؟

قال محمود بتلعثم:

- عاوز أقابل قاسم بيه أمين.

قال الرجل وهو يقوم بفتح الباب الحديدي:

- اتفضلوا.

مشى الرجل أمامنا، ودق باب السراي، فردت الخادمة من الداخل:

- مين؟

قال الرجل:

- بلغي قاسم بيه إن فيه ضيوف عاوزينه.

فتحت الخادمة الباب...

قال محمود وهو مبتسم، في محاولة منه لأن يخفي انفعالاته:

- سعيدة.

- سعيدة مبارك.. أبلغ قاسم بيه مين عاوزه يا أفندي؟

- قوليله محمود أفندي.

أشارت إلى الداخل نحو غرفة من الغرف:

- اتفضلوا في أوضة المسافرين.

وبعدها بدقائق دخل قاسم أمين.. ألقى التحية وجلس على أحد الكراسي.
فوجئ بعدما قمت بخلع الحبرة واليشمك، حين رأني مرتدية ملابس عصرنا
الحالي...

قال وقد ظهرت على وجهه علامات الذهول والقلق:

- إنتم مين؟

اقترب منه محمود وحاول أن يتحدث بهدوء:

- قاسم بيه، الموضوع ممكن يكون صعب التصديق لكنه حقيقة.. إحنا جايين
لحضرتك من المستقبل...

ارتفع حاجباه من الدهشة وحاول أن يتمالك أعصابه...

تدخلت فوراً في الحوار وحكيت له مختصر ما حدث...

بعدها استمع إلى كلامي بمنتهى الإنصات انبسطت أساريره، وقال بعدما
اعتدل في جلسته:

- أفهم من كدا يا هانم إنك قائدة إحدى الحركات النسوية؟!

قلت وأنا مبتسمة:

- تقريبا.

ضحك قائلاً:

- أنا سعيد برؤياكي جداً، وسبب سعادتي إني شفت النموذج المتطور دا من
المرأة.

ثم أردف قائلاً:

- في كل الأحوال أهلاً بيكم.. إيه الخدمة اللي ممكن أقدمها لكم؟

قلت وأنا انظر لعينه مباشرة:

- تقوللي قدرت تأثر على مجتمع كامل وتغير تفكيره إزاي؟!

بص يا قاسم بيه إحنا مشينا خطوات كثير جداً، لكن للأسف لسه في مجتمعنا
باقي شوية جاهلية في نظرة المجتمع للمرأة، إلى جانب نظرة المرأة أصلاً
لنفسها.

قال باهتمام بعد أن قطب جبينه:

- وضحني أكثر يا هانم.

حكيت له كل ما يدور بزماننا..

وبعدما أنصت لكل كلامي هز رأسه باستغراب:

- شيء مؤسف إن كل شيء اتيغير، ورغم كذا لسه في زمانكم درجة من درجات الرق.

قلت بتعجب:

- الرق؟!!

- الحرية معناها أن يكون الشخص قادراً على اتخاذ القرار، وقادراً على التحكم في حياته... ومن درجات الرق يا هانم هو الرق الفكري..

وهو أن تعيش المرأة أسيرة فكرة معينة لا تريد تغييرها..

ورغم ما وصلت إليه، فما زال المجتمع يكيل بمكيالين في نظريته للرجل ونظريته للمرأة.. إذ يحكمون على المرأة دون الرجل تبعاً لوضعها الاجتماعي، سواءً كان زوجةً أو أرملةً أو مطلقةً أو بلا زوج..

دا معناها يا هانم إن لسه فيه قيود في العقول...

سكت برهة ثم قال:

- أي عادات أو تقاليد وراها اعتقاد مخطئ بأن المرأة أقل من الرجل لازم تتغير فوراً...

- تفتكر فيه أمل؟

- لازم نحيا دايم بالأمل.. والدليل هو إنك بتبتيلى إن أوضاع كثير اتغيرت.. في زماننا يا هانم وضع المرأة مايسررش... جاهلة بكل جوانب الحياة، والوضع يشمل من أول بنات العائلات ولحد بنات الفلاحين الأجرية... مفيش بنت ليها كلمة على نفسها.

ثم شرح وضع المرأة في زمانه، بداية من حرمانها حق التعليم والميراث، ومنعها من الجلوس على نفس مائدة الطعام مع الرجل.

ثم أكمل حديثه قائلاً:

- وبالرغم من سوء الوضع، إلا أنه الحمد لله هيتغير في زمانكم زي ما حكيتيلي...

العادات هي جمع كلمة عادة، وهي ما تعودنا عليه..

أما التقاليد فهي جمع تقليد، وهو قيام أحدهم بعمل شيء فقلده الآخرون...
وبالتالي فهي ليست ثوابت على الإطلاق
- فعلا مفيش أي ثوابت غير الدين.. بس أرجوك وضحلي أكثر، أكسر العادات
والتقاليد الغلط إزاي؟! وأغير فكر البنات إزاي؟!
- أولا أن يقررر أحدهم كسر العادة، وبالتالي خلق تقليد جديد يتبعه غيره من
الناس..

ولكن لازم يكون مُرادَه رغبة مخلصه في تغيير حقيقي، لأن كراهية
ما يحدث فقط موقفٌ سلبيُّ.. ولازم يعرف إنه هيتقابل بالرفض في البداية..
يصبر ويواصل العمل في ظل التحديات المختلفة... وأهمها إن المجتمعات
جُبلت على حب المعتاد.. وتربية الشعوب محتاجة وقت...
فقط ضعوا البذرة الصحيحة... ولازم تعملوا وفق خطة ممنهجة...
قلت بحماسة:

- إيه الخطة يا قاسم بيه؟
- لاحظت من كلامك يا هانم، إن العامل المشترك بين بنات عصرك وبنات
عصري إنهم فعلاً ضحية.. مش ذنبهم إنهم اتربوا على كذا..
وبالتالي لازم نحرك المياه الراكدة في عقولهم، ومن ثم عقول من حولهم...
في زماننا مثلا المرأة عاوزه زوجها طول اليوم يجلس بجانبها يلاعبها ويغازلها،
ودا في نظري رجل فارغ.. كتبت عن المشكلة دي في كتاب أسباب ونتائج..
أعتقد دا بسبب إن مفيش أي حاجة بتعملها غير البيت..

انفجر محمود في الضحك، ثم قال:
- بحطة إيدك يا قاسم بيه، لسه بيقولوا الاهتمام ما بيتطلبش.

قال الرجل بتعجب:

- مش فاهم مُرادك من الكلام!

ابتسم محمود:

- لا لا سييك.

تنهدت وقلت بحزن:

- والمشكلة إن فيه منهم مبسوطين، وبيقولوا كل الناس بيفكروا كذا.

- ما همّ للأسف ترسخت في عقولهم أفكار معينة تغييرها مش هيكون بالأمر السهل...

وعشان كذا الخطة يا هانم هتنقسم إلى مرحلتين:

خطة عاجلة لتغيير الحاضر

وخطة طويلة المدى لتوجيه المستقبل توجيه صحيح...

هنبدي بالخطة قصيرة المدى، ودي العبء فيها هيكون أكثر على أصحاب العمل الإصلاحي...

بعد ما يكسر أحدهم العادات والتقاليد يبدأوا في نشر أفكارهم... ومن بعدها توجيه إرادة نساء زمانك إلى تحسين أوضاعهم...

قلت في سري: «نغير الخرائط الذهنية».

أكمل كلامه قائلاً:

- وعشان توصلوا لدا يا هانم هتشتغلوا على مجموعة محاور...

لازم يكون فيه نماذج ناجحة يتم الاستناد إليها، حتى يقتنع الآخرون بأن التغيير يتلوه النجاح.

اعملوا صالون أسبوعي لمناقشة خطة الإصلاح مع المهتمين بما يوافق زمانكم.

تواصلوا مع الجورنالجية وأرباب القلم والمثقفين والشعراء، وحتى المغنواثيه، وكل ما يوافق زمانكم، للوصول لطوائف مختلفة من الناس.

(يقصد دور الإعلام)

أما الدور الأهم فهو دور رجال الدين.. يجب أن يسدوا الفجوة بين كيف عامل الدين المرأة وكيف نعاملها نحن...

إذ يجب التشديد على أن العيب كلَّ العيب في عقول الناس وتمسكهم بالموروث دون تفكير، وليس عيباً في الدين.

أنا مثلاً ساندي معلمي وأستاذي الشيخ محمد عبده لتوصيل فكرتي، وتأكيد أن لها مرجعية دينية...

أما الخطة طويلة المدى فهي التربية.. يجب العمل على تربية امرأة جديدة بفكر جديد..

امرأة ليست ضد نفسها ولا ضد بني جنسها من النساء...

امرأة تثق بقدراتها وتعترف بكونها الأم والابنة والأخت...
ويمكن في المرحلة دي تتواصلوا مع نظارة المعارف، لمساعدتكم بأي شكل...

ومن ثم..

فإن ذلك سيسهم بدوره في خلق رجل مصري جديد ومجتمع جديد بفكر مختلف... يتم فيه الاعتراف بحقوق المرأة النظرية، وتطبيقها من الناحية العملية...

- أنا مش عارفة أشكر إزاي!

قال بابتسامة عريضة:

- لا أبدا، أنا ممنون جدا إنكم زرتوني وأتحتولي الفرصة العظيمة دي.

شيء أخير..

ممكن تتعرضوا للهجوم من أصحاب المصالح في استمرار الوضع على ما هو عليه، وربما يتم فهم دعوتكم بشكل خاطئ.. وإنك بتشجعي على الطلاق أو بتشجعي البنات على العزوف عن الزواج..

احرصي يا هانم كل الحرص على تأكيد وجهة نظرك في أنك تَسَعِينَ لتحقيق حياة أفضل لنساء عصرِك قبل وأثناء الزواج وحتى بعد الطلاق... وأن نهضة المرأة تعقبها مباشرة نهضة الأمة... أرجو إنك تقري كتبي..

أسباب ونتائج

وتحرير المرأة

والمرأة الجديدة..

ممكن تستنبطي منها أفكار توافق زمانك...

قال محمود وهو ينظر لساعته:

- دكتورة مها.. قدامنا دقيقتين.

قاطعنا قاسم أمين ذاهلا:

- إنتي طيبة يا هانم؟

ثم نظر لمحمود قائلا:

- وإنت إيه وظيفتك يا محمود... أقولك بيه ولا باشا؟!

قال محمود ضاحكا:

- لغوا البهوية والباشوية يا قاسم بيه...

وهنا بدأت صورته في التلاشي.. قال وهو يلوح بيده:

- بالتوفيق يا هانم.

وجدت نفسي أقف في شقة محمود في مصر الجديدة، والذي ألقى بجسده
على أقرب كرسي، وقال وهو يتنهد بقوة:

- الموضوع كبير يا مها هانم.

oo oo oo oo oo



الفصل التاسع: أهلا بمستقبل مشرق

«إذا أردت أن تعيش حياة سعيدة فاربطها بهدف وليس بأشخاص ولا أشياء»

ألبرت أينشتاين

- حمدالله على السلامة يا دكتور مها.

- الله يسلمك يا نجلاء.. عاملين إيه؟ معلش الأسبوع اللي فات كله ماكنتش باجي عشان حوار قاسم أمين، طمني عملتوا إيه وأنا مش موجودة، وإيه الأخبار؟

قالت وهي مبتسمة:

- قوليلي إنتي إيه الأخبار سبع ولا ضبع؟ عرفتني توصلي لكل اللي كنتي عاوزة توصليله؟!

قلت بسعادة:

- آه الحمد لله مبسوفة جدا.

- احكي لي طيب بسرعة إيه اللي حصل؟!

- لا، إنتي بسرعة تكتبي علي صفحة الفيس بوست بإن فيه اجتماع بكرة الساعة عشرة الصبح، عشان أحكيلكم كلكم.

- ماشي تمام.. بالمناسبة فيه واحدة اسمها مدام فريدة الحسيني اتصلت كذا مرة، عاوزة تقابلك في أقرب فرصة.. أديها ميعاد النهارده؟!

- آه ماشي، نشوف عاوزاني في إيه.. خليها تيجي الساعة أربعة العصر كدا.

- اتفقنا...

وفي تمام الساعة الرابعة عصرا...

- أهلا أهلا يا مدام فريدة، آسفة لو اتأخرت عليك في تحديد موعد، كنت مشغولة جدا الأسبوع اللي فات...

قالت وهي تصافحني:

- إطلاقا.. المهم إننا اتقابلنا.

قلت وأنا أشير للكرسي أمام المكتب:

- إتفضل.

- أنا سمعت عنك وعن الجمعية اللي عملتوها، بجد شيء مشرف جدا، أنا هحكلك حكايتي...

وبدأت في سرد حكايتها...

كنت أستمع إليها بذهول، فكم هي امرأة قوية استطاعت أن تتجاز أزمة الطلاق بشكل لا يصدق عقل...

كيف استطاعت أن تتجاوز كل هذه المشكلات؟!

كيف استطاعت أن تتخذ كل هذه القرارات؟ وكيف استطاعت تنفيذها؟

هي حقا النموذج الناجح الذي كنت أبحث عنه...

أفقت من شرودي على صوتها وهي تقول:

- أنا الحمد لله دلوقتي سيدة أعمال ناجحة جدا.. وعندي كذا فرع للشركة بتاعتي على مستوى القاهرة...

وأملني بإذن الله يكون عندي فروع في الوطن العربي كله.

ثم أردفت قائلة:

- مش هكدب عليك.. أنا سامعة عنكم من زمان جدا، بس خفت ليكون زي أغلب تجمعات المطلقات..

بيثوا الطاقة السلبية وبيجتروا الأحزان، من غير ما يتقدموا خطوات أو يعملوا إنجازات حقيقية.

قلت وأنا أضحك:

- نظام نكدني تجدني وحزن الحزن.

ضحكت بدورها، ثم قالت:

- أنا مستعدة أساعد معاكم بأي طريقة إننا تنجح أكثر، ونساهم في نشر فكرتك، أنا الحمد لله عندي علاقات كتير...

- تمام جدا يا مدام فريدة.. أنا بس مبدئيا هطلب منك طلب، إحنا بكرة عندنا اجتماع في الجمعية أتمنى تنورينا وتحكي لكل قصتك.

قالت بحماسة:

- ما عنديش أي مانع.

بعض العضوات كن يجلسن في زهول، بعدما رأين مدام فريدة الحسيني تقف بجانبني، وبخاصة بعدما قلت الجملة التالية:

- هعرفكم بمدام فريدة الحسيني... دلوقتي هنسمع قصة امرأة لا تقبل الضعف والهزيمة.. نموذج قد يكون نادر جدا، ولكن أنا متأكدة، بالعزم والإرادة هيكون دا النموذج السائد، والوضع الطبيعي لأي واحدة ست بتتحط في أزمة. رحبوا بمدام فريدة الحسيني، صاحبة مجموعة شركات «مارينا ديزاين».

قالت مدام سالي عبد الواحد:

- مش ممكن! حضرتك بجد صاحبة الشركة الناجحة دي؟ أنا عمري ما كنت أتخيل إن شركة بالنجاح دا صاحبها واحدة ست، وبالظروف دي كمان! قالت هاجر:

- لأ أنا عارفة طبعا مدام فريدة، وشفتها في الإعلام كثير، بس ماكنتش أتخيل إنها في نفس ظروفنا...

ابتسمت مدام فريدة ثم قالت:

- اسمحولي أحكيلكم قصتي...

أعرفكم بنفسي الأول، أنا فريدة الحسيني.. اتجوزت وأنا عندي عشرين سنة بإنسان يختلف عني جذريا في كل شيء...

اتجوزت صغيرة وأنا ما عنديش أي خبرة في الحياة نهائيا، ونظرا للتربية الفاشلة بتاعة إن الحياة فقط راجل، مع تربيتي المنغلقة، كنت حاسة إن الزواج هو الحل.

الخلاصة.. اتجوزت ودخلت في دايرة مغلقة لمدة سبع سنين من الإهانات والمرمطة والخوف من الطلاق، بسبب المجتمع..

للأسف توالى الأحداث من سيئ إلى أسوأ...

لحد ما في يوم بعد ما اتضربت ضرب مُبرِّح، لقيت في نفسي قوة لم أعهد لها من قبل...

أخذت شنطة هدومي وولادي... ونزلت الشارع ورحت لبيت بابا، ولأول مرة بمنتهى الإصرار قلت لبابا: طلقني من الراجل دا!

وسط زهول من أهلي كلهم.. ويوم الطلاق خرجت قدام المأذون بخطى ثابتة، وقلت بمنتهى القوة لتلقي: طلقني!

عينه جحظت حرفيا، وما كان منه غير إنه رمى اليمين ومشى من بيتنا، بعد ما اتفق معنا على إنه هيدفع نفقة شهرية لأولادي ألف جنيه...

ما أخذتش منه لا شقة ولا عفش ولا أي شيء إلا مؤخر ٥ آلاف جنيه، رماهم على تراييزة الصالون بمنتهى الإهانة وهو ماشي، رغم إن مؤخري كان أكثر من كذا بكثير..

ساعتها بصيت لولادي وشهدت ربنا إن يا ربي ليس في الإمكان أكثر مما كان، إنت يا رب استحالة تضيعنا...

دخل عليّ خالي أوضتي.. قاللي إنتي زعلانة؟

قلتله لأ...

قاللي لا إنتي زعلانة...

قرب مني وحصني جامد وخط إيده على كتفي، وقاللي وهو بيشاور بإيده على الفراغ... أنا شايفك بعد خمس سنين من النهارده فريدة الحسيني أشهر بيزنس وومن في مصر... حد له شأن كبير جدا... وهفكرك.

ضحكت وأنا عيني كلها دموع، وفي قلبي شيء واحد...

إن الله لن يضيعني..

عشان ماطولش عليكم، بعد سنين من الكفاح والسهر والمذاكرة..

وقبل كل شيء توفيق ربنا.. النهارده أنا سيدة أعمال ناجحة...

والحمد لله أصبح لي صيت في الإعلام، وعندى أهداف كثير عاوزة أحققها.

صفق الجميع بحرارة...

ثم نهضت مدام شاهيناز، وقالت بإعجاب:

- ياه يا مدام فريدة، يا ريتني أبقى قوية زيك!

ابتسمت مدام فريدة، وأردفت قائلة:

- ياه، يا ريتني أبقى قوية زيك... الجملة دي بسمعها كثير..

أنا هحكيلكم عن حاجات كنت قفلت عليها الصندوق، وقررت إنى مش هحكياها مهما حصل... لكن قررت أحكيها، لعل واحدة منكم حكايتي تديها دفعة للباقي من عمرها...

خلونا الأول نعرف الإمكانيات اللي كانت عندي بعد الطلاق...

طبعا أنا كنت خريجة كلية التجارة، والحمد لله كان جايلي شغل بمرتب محترم أثناء فترة جوازي، لأن تقديري كان عالي... حلو؟

لأ مش حلو... لأن طليقي كان رافض تماما فكرة الشغل، عشان كان غرضه يقصص ريشي، ومايقاش عندي ولا مخرج أو أي نقطة قوة...

ومش هنسى طول حياتي صوت صديق والدي اللي اتصدم لما بلغته إنني رفضت الوظيفة...

ساعتها قاللي: متأكدة يا بنتي؟

وأنا اللي جاي عليّ: آه متأكدة... جوزي عاوز كدا.

**** وراح الشغل ****

طبعا بسبب الهم اللي كنت فيه والضغط النفسي، جالي التهاب مزمن في المفاصل بسبب سوء حالي النفسية، وكل ما كنت أروح لدكتور كان يقوللي دا نفسيا... وهو ماكانش بيقوللي غير يا عيانة يا مريضة... لدرجة يوم طلاقي اتريق وقال لبابا هبقى أبعثها فلوس العلاج..

لأني من كتر التعب كنت بمشي أتعكز زي العواجيز!

*** وراحت الصحة ***

حكيتلكم إنه طلقني وماخذتش منه لا شقة ولا عفش ولا أي حاجة، ورجعت بيت أهلي بولادي بخفي حنين.

**** وراحت الفلوس ****

قالت مدام هاجر:

- يبقى أكيد بعد الطلاق أهلك ساعدوكي يا مدام فريدة...

ردت قائلة:

- أقسم بالله العلي العظيم أهلي لم يساعدوني في شيء، إلا إنهم وفرولي مكان أعيش فيه أنا وولادي، ورغم ارتفاع مستواهم المادي جدا جدا، كرامتي كانت تأبى إنني آخذ منهم شلن..

أومال مين سندني؟

السند بس هو الله... أقسم بالله ربنا وبس... بعد طلاقي رفعت إيدي للسما ورحت قايلة توكالي عليك يا رب، إنت السند وماليش غيرك... بدأت أدور على شغل ثاني يوم طلاقي..

اشتغلتي إيه يا فريدة؟!

ورقة وقلم واكتبي ورايا يا ست الكل:

مدرسة في مدارس لغات

عملت جروب على الفيس بوك لبيع البيجامات

مدربة سواقة

مدرسة عربي في مركز تعليم لغير الناطقين باللغة العربية

سكرتيرة في مركز طبي في التجمع الأول

مدرسة في حضانات.

قالت مدام سالي باستغراب:

- وكان عندك صحة؟

ردت فريدة:

- آه، تصدقي خفيت خالص وعملت التحاليل لقيت إني بقيت زي الفل!

قالت مدام نوال بانهار:

- طب وأهلك كانوا عارفين كدا؟

- لأ ماكانوش يعرفوا كل الشغلانات، لأن فيه منهم كنت بشتغله بالتوازي مع بعض، بس كنت مفهماهم إني بشتغل وبقبض كويس عشان مش عاوزة مساعدة، آخر شغلانة كانت المركز الطبي، واتضايقت من موقف عمله صاحب المركز، جه على كرامتي... سبت الشغل وأخذت مرتب نص شهر... وطبعاً ماكفانيش لآخر الشهر، جيت في يوم أقسم بربي في علاه ماكانش في بيتي إلا الميّه بس...

والدتي كلمتني ساعتها لقت صوتي متغير، قعدت تسألني «مالك؟» واتهربت منها... ماكنتش قايلة لحد إني سبت الشغل... قعدت أدور على أي فلوس في البيت زي المجنونة، ولو حتى فضيئة.. للأسف مالقتش.

ببص على ولادي لقيتهم ناموا، دخلت اتوضيت ولبست إسدالي واطرميت ساجدة على الأرض...

قعدت أعيط وأقول يا رب... ونمت بالإسدال من كتر العياط...

وصحيت من النوم على صوت جرس الباب جارتني مطلقاً فطار معتبر، وبتقولي: عازماكي.

ماكانتش تعرف ظروفى بالمناسبة، كنت بقول جوزى مسافر...
ومن بعدها بدأ الفتح المبين... اتصلت على صديقتى المقربة، وقالتلى لقيتلك
وظيفة محاسبة فى شركة الأستاذ صلاح حمزاوى للملابس الجاهزة.
رحت اشتغلت هناك وتعلمت كل حاجة... وبعد فترة قصيرة بقيت أكفأ
موظفة عنده... ودعمت خبرتى بدراسة الإدارة والماركتنج وغيرها..
ومن شغلى بقيت أدخل جمعيات، وبفضل توجيه وتشجيع أستاذى صلاح
حمزاوى... فتحت مكتب صغير فى وسط البلد، وكنت بعرض فيه منتجات
شركة الأستاذ صلاح...

وبعد فترة المكتب بقى ليه زباينه... وشوية وعملت شغل خاص بيّ واستغلّيت
موهبتى فى تصميم الملابس، وعملت ماركتى الخاصة «مارينا ديزاين»،
وأدينى واقفة قدامكم أهو الحمد لله...
خرجت من مشكلتى وأنا:

وآثقه فى نفسى

عرفت فى نفسى مواطن قوة ماكانتش أعرفها
شفت وتعلمت وعرفت ناس بحبهم وبحبونى
لقيت نفسى

علاقتى برينا بقت أفضل كثير، وتعلمت إزاي أخلى الوصل دايم بينى وبينه.
صفق كل من فى القاعة تصفيقا حارا، اختلط مع دموعهم التى كانت لا تقل
حرارة عن تصفيقهم...

قلت وأنا أنظر إليهم بعينين دامعتين...

مدام فريدة مثال واضح ومتجسد لكل الكلام اللى قلناه فى الجمعية خلال
الفترة اللى فاتت... هي مثال حى للإرادة والإصرار واستخدام الإمكانيات
المتاحة لأقصى الحدود... مع السعى والتوكل على الله وعدم التواكل على
الآخرين...

قالت نجلاء:

- إحنا الفضول مخلصنا هنموت ونعرف إيه اللى حصل فى رحلتك لقاسم
أمين...

حكيت لهم تفاصيل مقابلي مع قاسم أمين، وصفق الجميع تصفيقا حارا،
وتفاوتت انطباعاتهم ما بين دموع الفرح وابتسامات الأمل...

شعرت كأن القاعة تمتلئ عن آخرها بطاقات إيجابية تكفي لنهضة أمة
بأكملها... شعرت أنهم جميعا يرددن الخروج مما وقعن فيه، ولكن كن تائهات،
وما كان ينقصهن فقط الإرشاد والتوجيه الصحيح.

ثم أردفت قائلة:

- كنت طلبت منكم قبل ما أسافر مع الباشمهندس محمود إنكم تحضروا
خططكم للمستقبل.. يا ترى حد عمل حاجة منها؟!

قالت مدام أمنية:

- لا والله مش كلنا يا دكتورة.. بس بعد ما سمعنا قصة مدام فريدة اتشجعنا
جدا.

قلت:

- ممتاز، اسمحولي بس هقولكم على شوية أسس وإنتي بتخططي
للمستقبل... زي ما سبق واتفقنا، إنتي هتلمي الإمكانيات اللي حواليكلي كلها..
كلها بمعنى كلها.

وهتعملوا التالي..

أولا: اختيار الهدف:

لازم تكون اختياراتك نابعة من جواكي لأحلام وأهداف إنتي عاوزة تحقيقها...
إوعي تعيشي حياة عاوزينها ناس تانيين.. الحياة أقصر من إنك تعيشيها زي ما
الناس عاوزة، مش زي ما إنتي عاوزة..

يعني لو واحدة منكم دكتورة أو أيا كان ومش حابة المجال دا، خلي عندك
الجرأة إنك تعملي كارير شفت، وتعملي الحاجة اللي بتحبيها...

ممكن مثلا مايكونش حالا، لكن تبتي تجهزي لحلمك وإنتي شغالة على
المحورين، بتجيبني فلوس من شغلك، وبتسعي لوضع أعمدة حلمك..

لو بتحبي التفصيل ابتي هاتي مَكَّة واصقلي موهبتك بالدراسة.

قالت مدام ناريمان:

- مش صعبة إنني أبقى مثلا الدكتورة التريزية؟

قلت لها:

- ماتحسبهاش كدا.. لو إنتي فعلا حابّة اللي هتعمليه اعمليه..
لو حابّة شغلك ومجالك ماشي.. وبعدين إحنا قلنا بقى مش دايمًا نظرة الناس
في المجتمع صح.. كل واحد بيحكم وفق تربيته وأفكاره..
خلي بس هدفك إنك هتعملي شركة كبيرة للملابس...
مشوار الألف ميل بيتدي بخطوة...
هما هيشوفوكي دلوقت الترزية...
إنتي شايفة نفسك بعد خمس سنين عندك شركة كبيرة..
ثانيا: الاستفادة من أخطاء الماضي وحل مشاكل الحاضر:
بصوا بقى من الآخر كدا.. وإنتي بتخططي للمستقبل حطي في اعتبارك إنك
هتستفيدي من أخطاء الماضي.. وهتغلبي على كل مشكلات الحاضر...
هتعملي بس اللي إنتي مقتنعة بيه، طالما في نطاق الدين...
والمجتمع آخر حاجة تحطيتها في بالك.. عاوزين يا جماعة نفعل مبدأ...
ربك قبل الناس، والحرام قبل العيب... اعملي اللي إنتي مؤمنة بيه... وثقي
إنك هتنجح فييه.
ثالثا: التخطيط الجيد:

وإنتي بتخططي للمستقبل لازم تمسكي العصاية من النص... بمعنى
ماتحطيش هدف صعب جدا وتحطيله خطة زمنية قصيرة، فلما مايتحققش
تتعقدي.. وماتحطيش هدف أهبل جدا وتحطيله خطة زمنية طويلة، تقومي
تضيعي وقتك وتلاقي إن إنجازك كان قليل فتتعقدي... فائدة الخطة الزمنية
إن الوقت مايسرحش منك... تقدرُوا تقولوا زي الجدول اللي كنا بنعمله
لنفسنا أيام الامتحانات... لازم تختاري هدف أكبر من إمكانياتك شوية بس
مش كثير، تحطيله خطة زمنية مناسبة.

تستعيني بالله وتصدقي النية

تاخدي القرار

تنطلقى ناحيته.

قالت مدام رضوى:

- وليه أحط هدف أكبر من إمكانياتي شوية؟

قلت:

- دي قاعدة اتعلمتها من زمان من مُدّرّسيني، كانوا دايمًا يقولونا لو حطيت هدف تذاكر وحدتين هتذاكر وحدة، إنما لو حطيت هدف تذاكر وحدة هتذاكر أربع صفحات، وبعدين إوعي تستقلي بنفسك، كل واحد فينا ربنا إداله ملكات وإمكانيات... شغلي بس دماغك واستغليها... وحطي في اعتبارك دايمًا إن مخازن ربنا واسعة.

وماتسمعيش لحد بيحكم على الموقف وفق قناعاته ونظرته للأمور، اللي أكيد مختلفة تمامًا عنك، إنه يحبطك...

رابعًا: تجميع الأدوات اللازمة لتحقيق الهدف:

خدي بالك وإنتي بتحطي الهدف لازم تجمعلي قدامك كل الأدوات اللي هتستخدمها لتحقيق الهدف دا... ولو لقيتي أداة من الأدوات مش موجودة هتبتدي تشتغلي عليها الأول عشان تبقى أدواتك كاملة...

هضربلكم مثال:

لو عندك كل الأدوات ما عدا الفلوس... هتفكري الأول هتزوذي دخلك إزاي.. أو ممكن هتعملي جمعية مع مين.. هتبيعي ذهب شايلاه على جنب.. أيا كان... لو عندك كل الأدوات ما عدا الدراسة... شوفي هتدرسي إزاي وهتوفري فلوس الدراسة إزاي... نقدر نقول الأدوات وتجميعها هي الخطوات اللي بتأخذها لتحقيق الهدف..

اكتبي في الورقة الأدوات، وكل ما هو متوفر هتحطي جنبه علامة صح، واللي مش متوفر هتخططي توفريه إزاي، وفي أسرع وقت.

خامسًا: الصبر والإرادة:

أهم حاجة لازم تحطياها في دماغك.. وإنتي ماشية في طريقك للنجاح حطي في اعتبارك إن النجاح مش بس بيتقاس بحجم الحاجات اللي عملتها.. بيتقاس كمان بتأثيرها الإيجابي على الآخرين...

لازم ماتهدريش طاقتك، وتنظمي وقتك صح، وتكوني ماسكة كل الخيوط عشان على قد ما تقدري ماتقصرريش في حاجة في سبيل حاجات تانية...

يعني ماتقصرريش في حق أهلك وولادك وغيره... لازم ماتفقدريش الأمل ويكون عندك الصبر.. والإرادة... لأنك أكيد هتقعي وتقومي وهكذا...

طريق الكفاح والنجاح مش مفروش بالورود...

وإحنا في طريقنا لأحلامنا، أوقات كتير الصبر بيملّ منا مش إحنا اللي بنملّ منه... أوقات كتير بنحس إننا مش قادرين نستحمل أكثر من كذا... وفي

لحظة ممكن نقرر إننا ننهار ونستسلم... بس ثواني! قبل ما تنهاري اسألني
نفسك سؤال مهم جدا:

هو أنا استحملت الفترة اللي فاتت دي كلها ليه؟

والوقت اللي ضاع وأنا بعافر عشان أوصل ودلوقتي بفكر أنهار، ضاع كدا
هباء؟!

إوعي تنهاري بعد ما بدأت مشوارك، وممكن يكون بس ناقصك كام خطوة...

عافري هتوصلي... حلمك يستاهل... وقبل ما تعملي الخطوات دي كلها،
أرجوكي إعملي حلم نفسك فيه عشان تحبيه... حبوا أحلامكم عشان تعرفوا
تحققوها... أنا عارفة إنكم تعبانين ومش قادرين...

بس هنا بييجي دور الإرادة... ماتنسوش في الرحلة تاخدوا معاكم سلة فيها
أخطاء الماضي.. ومشكلات الحاضر...

أخطاء الماضي مش هنكررها تاني.. ومشكلات الحاضر، عشان نفكر في
السكة هنتغلب عليها إزاي..

وفي النهاية...

هستناكم تعملوا اللي قتلكم عليه، وتبتدوا تسجلوا الأسماء مع ندى ومدام
نجلاء، وبعدها هنرتب المواعيد... والمفاجأة إني هاجي مع كل واحدة فيكم
في رحلتها.. عشان أشوف مدى التطور اللي وصلنا له..

وبعد ما نخلص كلنا الرحلات، هبتدي أرتب للخطة اللي رسمهالي قاسم
أمين... بالتوفيق ليكم جميعا.

انتهى الاجتماع الذي شعرت أنه كان أفضل اجتماعات الجمعية على الإطلاق.

∞ ∞ ∞ ∞ ∞

قلت وأنا أنظر لساعتي:

- ياه.. الوقت اتأخر جدا يا ندى، إنتم بلغتهم بمواعيد سفر كل واحدة فيهم؟!

قالت ندى:

- آه يا دكتور.

- تمام.. هبتدي مع مين؟!

- أول واحدة مدام ناريمان.

إيه هي أخطاء الماضي؟

.....

.....

.....

.....

.....

.....

.....

.....

.....

.....

إيه هي مشكلات الحاضر؟

.....

.....

.....

.....

.....

.....

.....

.....

.....

.....

إيه أدواتك عشان الرحلة؟

.....

.....

.....

.....

.....

.....

.....

.....

.....

.....

قبل الرحلة... أخذتي قرار التغيير فعلا؟!

.....
.....
.....
.....
.....
.....
.....
.....
.....

∞ ∞ ∞ ∞ ∞

- ها إيه الأخبار؟ مليتي الورقة يا ناريمان؟

- آه تمام يا دكتور، بصي فيها كدا.

أخذت منها الورقة وقرأت ما فيها...

* إنتي فين النهارده؟

أنا في سجن بسبب حساسيتي الزايدة من كل اللي حواليا بعد الطلاق،
وترجمة كل موقف منهم بشكل غلط، مع شوية سوء ظن وتعميم.

* بعد خمس سنين شايفة نفسك فين؟ (هدفك)

شايفة نفسي بنيت جسور ود مع كل اللي حواليا، وعلاقتي اتحسننت بيهم
بشكل كبير... وشايفة نفسي كوتش للمطلقات، وأي حد اتخط في أزمة
أساعده يقدر يخرج منها ويفكر بشكل صحيح.

* إيه أخطاء الماضي؟

التمحور حوالين فكرة إن الزواج هو الحل، اللي أدى بعد ما خسرتة إلى إنني
فقدت سيطرتي على إدارة الأمور، وكمان وقفت قدام المشكلة وقت طويل
خلى تفكيري اتشل، واتعطلت وقت طويل.

* إيه مشكلات الحاضر؟

عدم توفر الفلوس بشكل كافي.

* إيه أدواتك عشان الرحلة؟

هشتغل عشان أزود دخلي.

هشغل مخي

عملت خطة زمنية وكمان حطيت خطة ممنهجة
هتحدى بالصبر والإرادة

* قبل الرحلة أخذتني فعلا قرار التغيير؟!

آه إن شاء الله، وعندى عزم ونية صادقة إنى أتغير.
ابتسمت بعد أن قرأت الورقة وحصنتها بقوة...
وقلت بعينين دامعتين:

- إن شاء الله هتحققي كل اللي نفسك فيه...

أدرت نظري باتجاه محمود قائلة:

- مستعد يا باشمهندس محمود؟!

قال بثقة:

- أنا جاهز... بس فيه ملحوظة عاوز أقولكم عليها...

إنتي يا دكتورة مها مش هتشاركها في أحداث، إنتي هتراقبي من بعيد، وهي
لاإراديا هتنغمس في أحداث المستقبل، اللي من خلالها إنتي هتفهمي هي
وصلت فين.

قلنا:

- تمام يا باشمهندس.

دخلنا آلة الزمن، وأغلق محمود الآلة، وبعدها بثوان وجدت نفسي أقف في
أحد الأحياء الراقية... مدام ناريمان تحاول أن تركن سيارة صغيرة تقودها
باحتراف... أغلقت باب السيارة بثقة وتوجهت نحو إحدى البنايات.. عبرت
الشارع بسرعة...

وجدتها تدخل هذه البناية بعد أن ألفت التحية على البواب...

أسرعت في خطواتي وتوجهت نحو البواب:

- مش دي مدام ناريمان؟ هي ساكنة هنا؟

قال البواب:

- لع يا مودام، هي صاحبة مكتب اللي بيحولوا عليه الكوتشي باين.

حاولت أن أكنم ضحكاتي، ودخلت البناية، وجدت أن الأسانسير توقف عند
الدور الرابع..

صعدت الدور الرابع بعدها مباشرة، وجدت ناريمان تدخل مكتبا ليس فارها، ولكنه يجمع ما بين الرقي والبساطة... كان الباب زجاجيا فرأيتها وهي تلقي التحية على السكرتيرة... ودخلت إحدى الغرف وأغلقت الباب...

دخلت المكتب بعدها مباشرة وقلت للسكرتيرة:

- من فضلك عاوزه معاد مع مدام ناريمان...

قالت بعد أن نظرت لورقة أمامها:

- للأسف اليوم النهارده مشحون جدا.. ممكن تستريحى ثواني هراجع مدام ناريمان.

دخلت إلى الغرفة التي تجلس فيها ناريمان وتركت الباب مفتوحا... سمعت ناريمان وهي تتحدث إلى شخص ما في الهاتف...

- أيوه يا حبيبتى...

إهدي بس كل شيء هيتحل

أرجوكي أنا ما بقدرش أشوفك زعلانة...

أختي حبيبتى اللي ماستغناش عنها ما حبش أبدا أشوفها كدا.. كل حاجة هتتحل...

هخلص شغلي وأتصل بيكي نتقابل، هعزمك على حاجة برة...

بعدها مباشرة وجدت سيدة تدخل إلى المكتب، وما إن رأتها السكرتيرة من الداخل حتى خرجت فورا وقالت:

- حضرتك أستاذة هدى؟ معاكى معاد دلوقتي.. اتفضلي يا فندم.

دخلت هدى إلى المكتب ولم تغلق السكرتيرة الباب...

جلست لأراقب الحديث...

وجهت كلامها لناريمان قائلة:

- ماتزعليش مني، أنا سمعت عنك كتير وعن قدرتك في حل المشاكل، بس سمعت برضه إنك مطلقة، إزاي شغاله في مجال زي دا؟

بعد كلمة مطلقة التي وجهتها السيدة لناريمان توقعت أن يسوء الوضع، نظرا لحساسيتها المفرطة..

ولكن فوجئت بأن ناريمان ابتسمت بثقة، ووجدتها تقول بعضا من كلمات رددناها في الجمعية..

قالت:

- النبي آدم مش بيتقيم صغير ولا كبير، ولا ينفع يتقيم من خلال وضعه الاجتماعي.. إنما يتقيم من خلال تأثيره الإيجابي على الآخرين، ومن خلال قناعاته.

نظرت إليها السيدة بإعجاب.

قالت ناريمان بصوت عال:

- شيماء أرجوكي اقفلي الباب، أنا نبهتك كذا مرة للموضوع دا وبرضه بتنسي. وفجأة...

وجدت نفسي أنا وناريمان نقف في شقة محمود في مصر الجديدة...

انخرطت ناريمان في بكاء شديد وهي تكرر:

- لو صدقت العزم لوجدت السبيل

لو صدقت العزم لوجدت السبيل

مش عارفة أشكرك إزاي يا دكتورة مها!

قلت وأنا أبكي بدموع الفرح:

- ماتشكرنيش أنا يا ناريمان.. اشكري ربنا وبعدين اشكري نفسك لأنك أخذتي القرار..

برافو عليكى..

انطلقى يا ناريمان.

∞ ∞ ∞ ∞ ∞

جاءت مدام نجلاء قبل موعدها بساعة.. كانت مثل الفراشة تماما.. وقالت وهي في قمة الحماسة: - أنا مستعدة جدا للرحلة.

قدمت لها الورقة، وقلت:

- اقربها وجاوبى على الأسئلة بتركيز.

أعطتني الورقة التي كان محتواها:

* إنتي فين النهارده؟

أنا مترجمة صغيرة ساكنة في حنة أقل من طموحي... وزني زايد جدا عن زمان.

* بعد خمس سنين شايفة نفسك فين (الهدف)؟

شايفة نفسي صاحبة معهد للغات في القاهرة... هساعد كل المحتاجين لأنني حاسة بيهم أوي.. ههتم بصحتي ومظهري أكثر من كذا بكثير.

* إيه أخطاء الماضي؟

التمحور حولين فكرة الزواج، وحيبي لعزت اللي خلى كل حاجة اتهدت لما فقدتها، ودا خلاني فقدت ثقتي في نفسي واتصرفت بشكل غلط، وماستغلتيش كل الإمكانيات اللي عندي صح، وقعدت أقول «يا ريت» و«لو» كثير..

وماعملتش شيفت لتفكيرى في الوقت المناسب..

وكان كل تفكيرى مستتية الحل إن طليقي يصرف علينا، ومافكرتش برة الصندوق...

* إيه مشكلات الحاضر؟

عدم توفر دخل مادي مناسب.

* أدواتك عشان الرحلة؟

مخى

هشتغل ليل نهار عشان أزود دخلى

هاخد كورسات أطور من نفسي لأقصى درجة، سواء أونلاين أو في الجامعة الأمريكية.

* هل أخذتي فعلا قرار التغيير؟!

آه إن شاء الله، وكلي عزم إنى أحقق أحلامي.

ربُّ على كتفيها بحنان، وقلت:

- إحنا جاهزين يا باشمهندس محمود.

قال لنا محمود نفس التعليمات التي قالها مع ناريمان...

دخلنا الآلة... وبعدها بلحظات وجدت نفسي في مكان مزدحم جدا.. كان يبدو مثل سنتر تعليمي لكنه كبير ومتعدد الأدوار...

دخلت نجلاء التي كانت تبدو أصغر من سنها بكثير؛ كانت ترتدي فستانا غاية في الأناقة، لدرجة أنني للوهلة الأولى ظننت أنها امرأة أخرى.

قالت بابتسامة واثقة:

- من فضلكم يا جماعة، عاوزين شوية هدوء، وفضلا التزموا بالتعليمات المكتوبة هناك.

وأشارت نحو لافتة.

قالت إحدى السيدات:

- إحنا خايفين مانلحقش، حضرتك عارفة إن الموضوع بالحجز، وسمعة المكان هنا مخليانا متمسكين ندي لولادنا الكورسات هنا.

قالت نجلاء:

- متقلقوش يا جماعة، السنة دي استعنا بمدربين أجانب من برة عشان نكتر عدد الفصول...

اقتربت منها إحدى السيدات التي كان يبدو عليها ضيق الحال، وقالت بصوت أقرب للوشوشة:

- أنا جياالك في موضوع مش عارفة ابتديه إزاي.. أنا أرملة وولادي نفسهم يتعلموا هنا...

قاطعتها نجلاء في الكلام، وقالت فورا:

- من غير أي كلام، اعتبري ولادك معانا..

ثم نادى بصوت عال:

- أستاذ حسن، من فضلك سجل أسماء ولاد المدام فورا وتعالالي المكتب.

أخذت السيدة تبكي وهي تردد:

- ربنا يكرمك، ويفتحها عليك، ويوفقك...

قالت نجلاء وهي تنظر إليها بحنان:

- أنا تحت أمرك أي وقت يا حبيبتى، ولو احتجتني مني أي حاجة أي وقت أرجوكي ماترددش،

وفجأة وجدت نفسي أقف مع نجلاء في شقة محمود، حيث ألقت بجسدها على أحد الكراسي بذهول..

وأخذت تكرر:

- الحمد لله..

الحمد لله...

∞ ∞ ∞ ∞ ∞

وجاء دور مدام هاجر...

نظرت إليها بعد أن جلست وقتاً طويلاً لتملاً الورقة، وقلت:

- لو مش مستعدة نأجلها.

- بالعكس، أنا بس خيفة.

قلت وأنا أغمز بعيني:

- أنا واثقة إنك قدها.

قالت وهي تعطيني الورقة:

طب بصي كدا...

كان الورقة محتواها:

* إنتي فين النهارده؟

أنا في سجن تحكيمات أهلي المنطقية وغير المنطقية، وعايشة بتنفس خوف وانعدام ثقة في نفسي...

* شايفة نفسك فين بعد خمس سنين؟ (الهدف)

شايفة نفسي صاحبة قرار.. محط ثقة للآخرين، بقدر أدافع عن وجهة نظري وأقنع الآخرين بيها.. وأبطل خوف...

ناوية أشتغل بشهادة المحاماة اللي ركنتها في البيت وما عملتش بيها أي حاجة.

* إيه أخطاء الماضي؟

التمحور حوالين فكرة الزواج، واتخاذ قرارات غلط كثير، خلت اللي حواليا فقدوا ثقتهم فيا، وأنا كمان فقدت ثقتي في نفسي، وما عملتش أي شيفت أو تغيير في الوقت المناسب، ووقفت قدام المشكلة أبكي على اللبن المسكوب..

وكنت دايمًا برمي اللوم على الآخرين، وما فكرتش مرة في القصور اللي عندي.

* إيه مشكلات الحاضر؟

أتحرق من الخوف، لأنني زهقت.

* إيه أدواتك عشان الرحلة؟

هشتغل على نفسي، وهتدرب في مكتب حمامة

الإرادة والإصرار

هبيع عربيتي عشان أجيب فلوس أحضر بيها ماجستير.

* هل أخذتي فعلا قرار التغيير؟

أخذت القرار ونييتي صادقة والله، بس ناقص أبتدي أنفذ.

قلت بابتسامة عريضة:

- هتتفذي وأنا واثقة في قدراتك إن شاء الله.

وبعد أن قال لنا محمود التعليمات دخلنا الآله، وبعدها بثوان وجدت نفسي
أجلس في قاعة محكمة.

كانت هاجر ترتدي ثوب الحمامة، وتقف في المقدمة بثقة.

قال القاضي:

- حكمت المحكمة حضوريا ببراءة المتهم محمد السيد جابر.. رفعت الجلسة.

وتوالت الزغاريد من القاعة.. وأخذت سيدة كبيرة في السن، يبدو أنها والدة
المتهم، تقول بصوت جهوري:

- ربنا يعمر بيتك يا أستاذة هاجر.. ربنا يجعلك دائما نصيرة للمظلومين يا رب.

وجدت شابا يقترب من هاجر بعينين دامعتين، وضمها إلى صدره بقوة..

أسرعت الخطى نحوهما لأسمع الحديث...

وجدته يقول:

- أنا فخور بيكي قوي يا هاجر، عمري ما كنت أتخيل إنك هتتغيري التغيير دا
كله.

قالت وهي تنظر لعينييه:

- بشكرك يا أحمد يا أخويا على دعمك لي طول الفترة اللي فاتت.

وتقدم رجل كبير في السن يبدو أنه صاحب المكتب الذي تعمل به هاجر، إذ
قال:

- بقالك سنة حرفيا مابتخسريش قضية، واللي يميزك الأمانة والضمير، ومابتدافعيش إلا عن المظلومين بجد، ثقتي فيكي بقت بلا حدود.. عندي ليكي مفاجأة.. أنا مهاجر خلاص أمريكا، هقعده عند ابني وهسييلك المكتب تماما.. لازم تعدي عليّ النهارده نتفق على المسائل المادية.

وفجأة وجدنا أننا في شقة محمود، حيث دخلت هاجر في نوبة من الضحك الهستيري المختلط بدموع الفرح.

∞ ∞ ∞ ∞ ∞

وجاء دور مدام سالي عبد الواحد...

التي ملأت الورقة كالتالي...

* إنتي فين النهارده؟

أنا أم مهملة في ولادي بسبب انشغالي بمشاكلي، بعاني من سلبية رهيبة في التعامل مع الكل.

* شايفة نفسك فين بعد خمس سنين؟

شايفة نفسي عندي دار أيتام، بساعد الأولاد المحرومين من والدهم ووالدتهم، لأنني أكثر حد هيحس بالأمهم.

شايفة نفسي بتحرك وفق قناعاتي، بغض النظر عن المجتمع، طالما ماتعديتش إطار الدين.

* إيه أخطاء الماضي؟

قصور التفكير والوقوف قدام المشكلة من غير البحث عن حل.

* إيه مشكلات الحاضر؟

قيود المجتمع اللي قررت أكسرها، لأنني اللي ساهمت في إنني أتقيد بيها.

* إيه أدوات الرحلة؟

دماغي

الفلوس اللي سابهاالي جوزي ربنا يرحمه

ولادي اللي نويت إنهم يشاركوني وأشاركهم حياتهم.

* هل أخذتي فعلا قرار التغيير؟

آه أخذته، وعندي طاقة غير عادية لتنفيذه.

قلت بعد سماع تعليمات محمود لسالي:

- توكلنا على الله.

وبعدها بثوان وجدت أني في مكان واسع مليء بالأطفال، يبدو كما لو كان احتفالا بعيد ميلاد أحدهم..

كان يتوسط الغرفة طفل صغير لا يتجاوز عمره الست سنوات، تغمره السعادة، والجميع حوله يغنون أغاني أعياد الميلاد... وجدت سالي تنحني لتطفئ الشمع مع الصغير، وصفق جميع الحاضرين...

وأشارت سالي نحو إحدى السيدات قائلة:

- قطعي التورته بسرعة.

وتوجه رجل وسيم نحو سالي، وأمسك يديها وقال وهو ينظر إلى عينيها مباشرة (يبدو أنه زميلها في الشغل اللي سبق وحكت لي عنه):

- أنا فخور بيكي جدا يا حبيبتي.. أداك المتميز وحنيتك على الأطفال خلت سمعة دار الأيتام بتاعتك في كل حته، ماتنسيش النهارده هنتفل بعيد جوازنا.

قالت:

- عندي هدف إن كلهم يكونوا أفراد صالحين يفيدوا المجتمع.

ثم ضحكت قائلة:

- مش ناسية طبعاً، ومحضراك مفاجأة كمان.

تقدم مراهق وقال موجه حديثه للرجل:

- هتوديني الدرس النهارده يا أونكل علي؟

- طبعاً يا حبيبي، مش اتفقنا نبقى أصحاب، وأي طلب عاوز تطلبه قوللي على طول!

قالت سالي:

- أختك فين؟ لازم نقعد نتكلم شوية زي كل يوم.

قالت والدة سالي:

- هناك بتلعب مع باقي الأطفال.. ربنا يسعدك يا بنتي ويوفقك دائماً يارب.

وفجأة عدنا إلى شقة محمود، وما إن وصلنا حتى ظلت سالي واقفة في مكانها لخمس دقائق كاملة دون أن تنطق بكلمة واحدة؛ غير مصدقة لما

رأيناها.

∞ ∞ ∞ ∞ ∞

وجاء دور هيام...

كان يبدو عليها الارتباك، وكانت تتصبب عرقا، وزاد ارتباكها بعدما ناولتها الورقة.

سألتها:

- فيه حاجة يا هيام؟ تحبي تأجلي؟!

قالت بتسرع:

- لا لا مش هأجل، كل اللي سافروا مبسوطين جدا، وبدأوا يخططوا للمستقبل، لازم أبتدي أنا كمان...

قلت:

- طيب خلاص إملي الورقة وهاتيهاالي.

جلست لساعة كاملة وبعدها ناولتني الورقة:

* إنتي فين النهارده؟

أنا إنسانة فاشلة محطمة نفسيا، وماعنديش أمل في الحياة.

* شايفة نفسك فين بعد خمس سنين؟ (الهدف)

شايفة نفسي عندي أسرة ناجحة.

* إيه أخطاء الماضي؟

غلطتي إني وثقت في الناس بسرعة، واخترت غلط.

* إيه مشكلات الحاضر؟

كل الظروف ضدي، مش عارفه أعمل إيه.

* هل أخذتي فعلا قرار التغيير؟

آه.. أخذته..

نظرت للورقة في ذهول وقلت:

- إنتي راضية عن اللي كتبتيه دا؟

قالت:

- دي قناعاتي، وإنتي اتفقتي معنا مانكدبش.

فتحت فمي من هول الصدمة، وما لبثت أن قلت بحزن:

- حاضر يا هيام.. من فضلك يلا يا محمود.

دخلنا الآلة، وبعدها بثوان وجدت أنني أجلس في أحد الكازينوهات على النيل، وهيام تجلس في الطاولة المقابلة بالجهة الأخرى، كانت تنظر لساعتها بتوتر، وما هي إلا دقائق حتى جاء رجل في أوائل الأربعينات، وقد ارتسمت على وجهه علامات الغضب، اقترب من طاولة هيام وسحب كرسيها وجلس وقال وهو ينظر إليها شزرا:

- عاوزة إيه؟

قالت بخنوع:

- إنت مبتردش عليّ ليه؟ مش المفروض كنت تقابل ماما، وأخذت مني الفلوس اللي هتجيب بها الشبكة وتأجر بيها الشقة عشان ماما توافق؟

قال بغضب:

- أنا مش عاوز أكمل.

قالت بذهول:

- يعني إيه؟ إنت بتهزر؟! بعد ما سامحتك وعرفت إنك كنت بتكذب عليّ وقتلي مطلق وطلعت متجوز ومعاك بنات؟ وقلت ماشي عشان بحبك.. وإديتك الفلوس عشان قتلتي مامعايش.

قال بعد أن قام من مكانه:

- آسف.. موضوعنا انتهى.

وضعت رأسها على الطاولة وانهارت في بكاء شديد... وبعدها بلحظات وجدت نفسي وإياها في شقة محمود...

كانت تقف تنظر إلى الأرض لا تستطيع أن تضع عينيها في عيني..

هزرت رأسي في أسى وقلت:

- لا تعليق... مفيش فايده فيكي...

ناوية الماضي والحاضر والمستقبل يكونوا كوبي بيست من بعض...

إنتي للأسف مش قادرة تفهمي ولا عاوزة تفهمي..

لأنك ماشية بقلبك بس..

الإنسان اللي بيمشي بعقله بس بيدوس على الناس، والناس بتكرهه، واللي بيمشي بقلبه بس بيكون غبي والناس بتدوس عليه، الإنسان اللي بيمشي بنفس الدماغ لسنين طويلة هيعيش ويموت مكانه..

هيام.. ماتجيش الجمعية تاني لحد ما تراجع حساباتك..

مع السلامة يا هيام.

انصرفت دون أن تنطق بكلمة واحدة...

ونظرت لمحمود الذي لم يحرك ساكنا من فرط الذهول.

تعليقي:

ممك ما يكونش عندنا آلة زمن حقيقية، لكن آلة الزمن بتاعتنا ممكن تبقى في دماغنا..

ربنا إدالنا كمبيوتر جبار، منحة ربانية ما بنستعملش للأسف إلا جزء ضئيل جدا منه...

ممك ترجعي بالزمن لورا وتعرفي غلطاتك..

وممكن تسرحي بخيالك لقدام وتحلمي أحلام تحبها وتصديقها، هتلاقي نفسك حقيقتها..

العامل المشترك بيننا وبينهم إننا هنستعمل نفس طريقة التفكير...

في نظرنا للماضي وأحلامنا في المستقبل...

جاوبي على الخمس أسئلة وخطيهم في ورقة في درج عندك..

وكل سنة شوفي حقتي كام هدف..

أو حتى أنجزتي كام حاجة للوصول لتحقيق أول هدف...

وكل حاجة هتوصليلها اعلمي عليها صح، هتحسي بالإنجاز، وإن حياتك بقالها طعم ومعنى...

هيام الوحيدة اللي لا عرفت تستفيد من ماضيها، ولا اشتغلت على حاضرها، ولا أسست لمستقبلها...

تفتكروا هتتغير؟!



الفصل العاشر: مشوار تغيير المجتمع دائما يبدأ بخطوة

«الجميع يفكر في تغيير العالم.. لكن لا أحد يفكر في تغيير نفسه».

ليو تولستوي

«جه في مرة وقال هسيك معلش أنا اخترت البعاد

كان فاكربي خلاص هسلم ما يضغط ع الزناد

هي طلقة ولا أكثر ورزقي على رب العباد

كان عاوزني أطب ساكتة أو أعيش عيشة سواد

أصلي محتاجة لجنابه لأ وهحتاس بالولاد

ولا يمكن هضيع بدونه بسّ انا اخترت العناد

أقسمت لأجري في طريقي وأروي جرحي بالاجتهاد

بعد فترة جه ببسال مستني يشوفني في حداد

سهرانة أعد في نجومه عيني باظت من السهاد

اتفاجئ لما قالوله اسكت فرح عينها زاد»

صفق الجميع بحرارة، بعد أن ألقنت مدام نشوى قصيدتها الرائعة.

قلت:

- برافو عليك يا نشوى.. شاعرة الجمعية المتميزة...

مبسوطة إننا بدأنا لقاء النهارده بالشعر الرائع اللي قالته مدام نشوى دا...

قالت نشوى في خجل:

- شكرا يا دكتورة.

قلت:

- اسمحولي أبتدي في سبب اجتماعنا النهارده...

مدام نجلاء:

- إحنا بس عاوزين نسأل هيام فين؟ بنكلمها موبايلها مقفول، واختفت تماما!

- إدوها فرصة تقعد مع نفسها تراجع حساباتها...

نرجع لموضوعنا...

دلوقتي بعد ما رحلاتنا كلنا للمستقبل إدتنا الأمل والطاقة الإيجابية الكافية،
عاوزين نبتدي فوراً ومن دلوقتي نشتغل على ٣ محاور...

المحور الأول: هنشتغل على نفسنا عشان يبقى فيه مننا نماذج ناجحة.

المحور الثاني: هننشر فكرتنا في المجتمع كله.

المحور الثالث: هقوله في الآخر..

يعني من الآخر، هنفذ كلام قاسم أمين...

أرجوكم يا جماعة اللي له أي اتصالات بأي حد في الإعلام يوصلنا له فوراً،
عشان نعرض أفكارنا، وأنا كمان هعمل اتصالاتي... اللي تعرف حد يوصلنا
بمشيخة الأزهر والأوقاف يا ريت بأقصى سرعة...

قالت مدام عبير:

- أنا خالي إمام وخطيب مسجد مشهور، ممكن يساعدنا؟

- طبعا.. أرجوكم رتبلي معاه ميعاد في أقرب وقت، وماتنسبش طبعا تديله
فكرة عننا، ولو يحب يشرفنا يا ريت عشان يقتنع بفكرتنا على أرض الواقع...

فيه حاجة مهمة جدا عاوزة أفتحكم فيها... بما إننا كلنا عرفنا هواياتنا ومواضع
قوتنا عاوزين نساعد بعض..

يعني مثلا مدام ولاء طبخة بريمو وماهرة في الحلو والحادق، شيف درجة
أولى، هنسوّقلها ونشتري منها..

مدام هدير فنانة في الكوروشيه، هنعمل معاه نفس الكلام...

عاوزين نعمل مجتمع صغير خاص بينا..

نبيع ونشتري من بعض، لحد ما فكرتنا تطلع برة الباب دا... (وأشرت نحو باب
الجمعية).

صفق الجميع بحرارة، فلقد حازت الفكرة على إعجابهم.

قلت:

- يلا بسرعة ما عندناش وقت نضيعه، كل واحدة تنطلق... عاوزين نشد إيد
بعض... نشجع بعض.. اللي يقع نقومه وهو يساعدنا إننا نقومه...

فيه حاجة مهمة جدا جدا عاوزين نبتدي نشتغل عليها...

عارفين إيه هي؟

هز الجميع روؤسهم باستفهام.

قلت:

- المحور الثالث، أهم محور عشان فكرتنا تفضل عايشة...

ولادنا يا جماعة...

يوم الجمعة والسبت من كل أسبوع هنختار يوم نعمله للتربية..

واليوم الثاني هنعمله للترفيه..

هيساعدنا في الموضوع دا الباشمهندس محمود الأسعد..

واتصلت بالدكتورة نهى الطنب، دكتورة نفسية، هتيجي يوم التربية تدينا

مجموعة كورسات مكونة من مجموعة مستويات..

نشتغل بيهم على النواحي الدينية والإنسانية والأخلاقية للأطفال..

ونزرع فيهم الأفكار الجديدة اللي كان نفسنا إنها تنزرع فينا...

وبكدا نبقى حطينا بذرة التغيير طويل المدى..

اللي لازم نهتم بيها ونروبيها...

يلا على بركة الله.

∞ ∞ ∞ ∞ ∞

- إزيك يا رانيا.

- أهلا يا هانم، لسة فاكرة تتصلي بيّ دلوقتي من ساعة ما كلمتيني من كام

شهر!

- معلش يا بنتي هحكيلك أهو.. مش أنا قلتلك إني عملت جمعية نسائية؟

- آه مشغولة وعاملالي فيها الولية في قلب الجمعية..

ضحكت:

- إنتي بتجيبني الكلام دا منين؟!

- المهم، الكلام في التليفون مش هينفع، إحنا بقالنا خمسين سنة بنرتب معاد

عشان نتقابل...

- مش هنتقابل قبل يوم القيامة بقي.
- ما انتي بتقلشي إنتي كمان أهو... ماشي يا ستي حددي ميعاد.
- بصي، هتجيلي الجمعية إن شاء الله الأسبوع الجاي ضروري، عشان محتجالك في موضوع مهم جدا...
- وهو كذلك.
- معلش يا رانيا اقفلي، فيه رقم غريب جاي ويتنح.
- طب يلا سلام.
- قلت بعدما أنهيت مكالمتي مع رانيا:
- ألو.
- معايا الدكتورة مها سامي؟
- اتفضل يا فندم.
- معاكي يا بنتي الشيخ عبد الواحد التميمي، خال مدام عبير، هي قالتلي إنك طلبتي تكلميني.
- أهلا وسهلا، أنا بعذر لو كنت سببت لحضرتك أي قلق.
- إطلاقا يا بنتي.. عبير حكتلي عنك، وأنا تحمست لأفكاركم جدا، وعاوز أعرف أقدر أساعد بايه...
- تنهد بحرقه وأردف قائلا:
- مش هخبي عليك، اللي حصل لعبير تسبب في جرح غائر لصدورنا..
- أولا مكالمة حضرتك شرف كبير، لكن هيزيدنا شرف لو حضرتك نورتنا في الجمعية الأسبوع الجاي.
- وماله يا بنتي... حددي الميعاد وبلغني عبير... في رعاية الله.
- ربنا يكرم حضرتك.. مع السلامة.
- أغلقت الهاتف وجلست أفكر في كل من حولي.. حاولت مراجعة كل علاقاتي.. لعلّي أتذكر أي شخص يساعدي في الوصول للإعلام.
- وتذكرت ريهام صديقتي، التي أخبرتني ذات مرة أن زوجها تربطه علاقة صداقة مع سيناريست مشهور...

شردت بذهني.. كيف يعوض الله الإنسان الذي تم وضعه في اختبار بالكثير، ولكنه لا يرى إلا ما ينقصه فقط...

فصداقتي بريهام ومشاعرها المخلصة نحوي، مع حرصها على دفعي للأمام دون انتظار أي مقابل، هي بالتأكيد من منن الله التي تستحق الشكر..

اتصلت بريهام وطلبت منها أن تخبر زوجها برغبتني في التواصل مع ذلك السيناريست المشهور، فوعدتني أن تحضر لي الرقم في أقرب وقت ممكن...

وبعدها...

- ألو.. أستاذ مدحت الفضل؟

- أيوه.. مين؟

- أنا مها سامي من طرف الباشمهندس إيهاب.

- أهلا أهلا بيكي.. الحقيقة إيهاب حكالي عنك، وأنا أعجبت جدا بالفكرة المجنونة اللي عملتها.

- ينفع تساعدني نعملها مسلسل أو فيلم؟

بعدها انفجر في الضحك:

- وش كذا؟ وماله! بس الأول أقتنع بيها.

- بص يا أستاذ مدحت... مش شرط نعملها زي ما هي، لكن أنا عاوزة أشيل من دماغ الناس إن الست المطلقة أو الأرملة أو اللي من غير زوج منحرفة... فاشلة... متدمرة نفسيا... حقودة!

- بس ماتنسيش يا مها إن الفن ينقل الواقع.

- وساعات بيخلق الواقع.

- ماشي.. خليني أفكر، بس هقولك حاجة...

قاطعته بأدب:

- أرجوك يا أستاذ مدحت قبل ما تاخذ قرار، ممكن الأول تنورني في الجمعية بتاعتي الأسبوع الجاي؟

قال دون تردد:

- ما عنديش أي مانع.

- أنا بشكر حضرتك جدا جدا بجد.. انتظر مني مكالمة خلال اليومين الجايين.

∞ ∞ ∞ ∞ ∞

في بداية اجتماعنا أحب أشكر ضيوفنا الكرام على تشریفهم لنا...

الشيخ عبد الواحد التميمي

الأستاذ مدحت الفضل

الصحفيه رانيا سعد الدين

امتلات القاعة بالتصفيق الحار...

قلت:

- زي ما إتم عارفين إحنا عزمناهم في الجمعية عشان نبتدي نطلع فكرتنا للنور، يا ريت لو كل واحدة من العضوات الكريمات تعرفنا بنفسها.

وغمزت بعيني...

قامت الواحدة منهن تلو الأخرى تحكي حكايتها باختصار، قبل وبعد الانضمام للجمعية، وتتحدث عن هواياتها وأحلامها وأهدافها المستقبلية...

وكيف بدأت خطة التغيير...

كنت أنظر إليهن بعينين دامعتين، كالأم التي ترى نجاح بناتها...

فكلامهن كان واثقا وأداؤهن كان مشرفا...

نظرت إلى ضيوفي، كان الانبهار يبدو واضحا في أعين ثلاثتهم...

وبعد انتهاء جميع العضوات من الإدلاء بدلو أفكارهن الجديدة...

نظرت إلى ضيوفي قائلة:

- إيه رأيكم؟!

وقف الشيخ عبد الواحد وبدأ في التصفيق بحرارة، وأعقبه مدحت الفضل ورانيا سعد الدين... ومن بعدها كانت تضج القاعة بتصفيق حار، ليعلن كسر أولى حلقات القيد الذي تقيدنا به لسنوات... إنه قيد الوصمة...

وصمة العار غير المبررة التي تلاحق كل من هي بلا زوج، لتضعها مرغمة في إطار لا يليق بها.

قالت رانيا وهي تمسح دموعها بتأثر:

- نساعدكم إزاي يا مها؟

قلت وأنا انظر لثلاثتهم:

- تساعدونا إن فكرتنا توصل لكل الناس...

تساعدنا يا أستاذ مدحت إننا نبطل نحصر المطلقة والأرملة في أدوار الانحراف والفساد الأخلاقي والفشل..

سلطوا الضوء على النماذج الناجحة، ونبطل نتخيل إن الطلاق نهاية العالم... تساعدنا إننا نوصل لأهالينا وكل الناس إن الحب والارتباط إحدى متع الحياة، مش المتعة الوحيدة ولا المحور الأساسي، تساعدنا إننا نخلق فكر جديد لراجل جنتل قبل الجواز وأثناؤه وبعد الطلاق، راجل عارف معنى الرجولة الحقيقية... راجل مش يلعب على عواطف البنات...

راجل عارف يوازن بين علاقته بأهله وعلاقته بمراته، ابعدونا عن جو الحموات الفاتنات، وانقلولنا نماذج كويسة لحموات بيخافوا من ربنا في مراتات ولادهم قبل وبعد الطلاق، وبنات بيحترموا حمواتهم...

سلطولنا الضوء على نماذج ناجحة عملوا طلاق ناجح نتفرج عليها، وتوجه فكر الناس للاتجاه الصحيح...

تساعدنا يا شيخ عبد الواحد نرجع للدين.. عرفنا اللي بيحصل معانا، ونظرة المجتمع للمطلقات والأرامل وإشعارهم بالدونية دا من الدين؟

أكل حقوقهم بالباطل دا من الدين؟

النظرة للست بشكل عام، وتقييمها من خلال الشكل الاجتماعي دا من الدين؟

تقييد حريتها ومنعها من الدخول في تجربة جواز تانية دا من الدين؟

إن الطلاق يبقى فزاعة يخلي ستات تخاف منه، لدرجة إنها ممكن تهرب بالانتحار، أو الاستمرار في علاقة بتتجرع فيها كل اليوم الإهانات النفسية والجسدية دا من الدين؟

ضياح الأولاد بسبب استهتار الأب أو الأم أو الاتنين وعندهم مع بعض دا من الدين؟

وإن يبقي قدامها خيارين كلاهما مر، يا علاقة فاشلة يا مجتمع ظالم، دا من الدين؟!

تصرفات قطاع كبير من الرجال مع الستات دا من الدين؟

إن الست تشيل شيلة مش بتاعتها، عشان تصرف على ولادها بدون أي مشاركة من والدهم دا من الدين؟

هز الشيخ عبد الواحد رأسه في أسف، ثم قال:

- لا والله يا بنتي.

نظرت لرانيا وأمسكت يديها..

- وإنتي يا رانيا.. الصحافة نبض المجتمع..

عرفي الناس إن نسب الطلاق زادت.. عرفيهم إننا محتاجين نعمل توعية للشباب والبنات قبل الجواز.. عرفيهم إننا مش هنتقدم إلا لو الأسر اتبنت على أساس سليم.. عرفيهم بينا وبالجمعية بتاعتنا، وإن اللي عاوز ينجح بعد مشكلة بينجح... انقلي أفكارنا لكل الأمهات المعيلة عشان يقفوا على رجليهم..

اتكلمي يا رانيا عن التجربة الماليزية، وإزاي قدروا يقللوا نسب الطلاق بشكل رهيب في فترة قليلة، واعملي حملات صحفية بتنادي إننا لازم نطبق التجربة دي في مصر، والزواج مايتّمش إلا بعد ما الطرفين ياخدوا الرخصة، لأن مش من المنطقي إن يبقى راجل معتوه رب أسرة، أو حتى ست عديمة المسؤولية أو ماتعرفش حاجة عن الجواز...

انقلي صوتنا عشان القانون يتغير.. القانون اللي بيحكم بنفقة ٢٠٠ جنيه للطفل في ظل الظروف دي...

قالت مدام نرمين:

- اسمحيلي يا دكتورة أحكي حاجة بمناسبة القانون...

- اتفضلي طبعاً.

- اتحكلمي بـ ٢٠ جنيه بدل فرش وغطا... أنا عمّالة أضحك من ساعتها... آخذ حكم بـ ٢٠ جنيه؟ طيب دي ماتجيش كيس مخدة، دا تمن البطانية بقي ألف جنيه دلوقتي، ولما اتطلقت هو أخذ الفرش وكل حاجة... أنا خايفة أروح أخذها أصرف الـ ٢٠ جنيه مواصلات... ولو رحنت وماصرفت الـ ٢٠ جنيه كلها، الباقي أشتري بيه بطانية ولا باكو مناديل للبرد؟!

قالت مدام شاهيناز ضاحكة:

- احمدي رينا، أنا اتحكلمي بخمسة جنيه.

وهنا انفجر كل الحضور في الضحك.

ودارت بين الضيوف وعضوات الجمعية العديد من النقاشات...

وفي هذه الأثناء دخلت هيام القاعة وجلست في نهايتها..
قلت وأنا مبتسمة:

- نورتينا مرة ثانية يا هيام..

أدار كل من كانوا بالقاعة رؤوسهم في دهول... قلت لأسيطر على الموقف:

- خلاص إحنا كدا اتفقنا مع ضيوفنا الكرام.

رد الشيخ عبد الواحد:

- أنا باذن الله هبذل كل ما في وسعي.

فقال مدحت الفضل:

- وأنا كمان إن شاء الله.

قالت رانيا:

- أنا من غير ما أتكلم هتشوفي باذن الله أنا هعمل إيه.

∞ ∞ ∞ ∞ ∞

وجدت أحدهم يطرق طرقات خفيفة على باب مكتبي...

توقعت على الفور من الطارق...

قلت:

- اتفضل.

دخلت عليّ المكتب، ولكن كانت هذه المرة غير المرات السابقات... العينان
تنبعث منهما طاقة إيجابية ونور جعلني أهب واقفة.

خطوت مسرعة نحوها... واحتضنتها بقوة...

أخذت تبكي بشدة:

- أنا آسفة أوي يا دكتور مها... تعبتك معايا وأخذت وقت على ما فهمت.

قلت وأنا أبكي:

- أنا عمري ما زعلت منك، أنا دايمًا كنت زعلانة عليك... وكنت متأكدة إنك
لازم هتفهمي هتعرفي هتوصلني يا هيام...

قالت وهي تمسح دموعها:

- ممكن عملي اجتماع ضروري بكرة، عشان فيه كلام كثير قوي عاوزة أقولهم...

قلت من دون تردد:

- طبعاً.

ثم ناديت على ندى بصوت عال:

- ندى...

جاءت إلى المكتب مسرعة...

قلت:

- نظمي اجتماع عاجل بكرة، بلغهم على صفحة الجمعية وجروب الواتس، وأكّدي عليهم كلهم الحضور...

قالت وهي تنظر لهيام بشرود:

- حاضر يا دكتور.

∞ ∞ ∞ ∞ ∞

وفي الاجتماع...

- خرجت من عند دكتور مها بعد رحلتي للمستقبل، وأنا حرفياً حاسة إن الدنيا سودا في عيني... لا عارفة أظبط ماضي ولا حاضر ولا مستقبل..

وقفت في الشارع وبصيت للسما وقلت دلني السبيل يا رب...

لأول مرة كنت أحس إن المشكلة والخناقة مش بيني وبين حد، المشكلة بيني وبين نفسي... لأول مرة كنت أحس إن مشكلتي الحقيقية إن نفسي اللي بتمشيني مش أنا اللي بمشي نفسي... وفي اللحظة دي أخذت القرار...

قرار التغيير...

روح البيت لقيت جوزي بيجهز شنطة هدومه، أول ما شافني جه ناحيتي ولسه هيمد إيداه عشان يضربني.. وبنتي بدأت تصرخ، قتلته أرجوك كفاية، أنا عرفت غلطتي ومش ههين نفسي تاني... أنا عارفة إنت عاوز إيه... ثانياً واحدة... رح جبتله الوصلات اللي كان ماضيها وكنت مخياها منه... وروحت مدياها له وقلته: طلقني.

أخذ الورق زي المجنون وقاللي بسرعة البرق: إنتي طالق.

لأول مرة كنت أحس أنني مش خايقة منه ولا من الطلاق، فتحت باب الشقة وقتله بثقة: أعتقد مالكش حاجة هنا.

مشي فوراً وخذ معاه الخوف والضعف اللي كنت عايشة فيه... خدت مريم في حضني ورميت نفسي على السرير.. لأول مرة كنت أحس بحب مريم، قعدت تتطبب عليّ بإيديها الصغيرة.. حسيت ساعتها أنني عمري ما دقت حزن مريم قبل كدا، رغم أنني كنت بحضنها كتير..

سرحت وافكرت كل اللي حصل وقد إيه كنت غبية...

طلعت ورقة وكتبت فيها الأسئلة اللي كانت مديهاني الدكتورة مها قبل الرحلة... عملت زي اللي عرف الإجابة بعد ما خرج من الامتحان...

*شايقة نفسك فين النهارده؟

شايقة نفسي إنسانة ما عندهاش مخ، وعاجبها الوضع ومش عاوزة أو خايقة تغيره...

إنسانة محتاجة الارتباط احتياج مرضي.. خلاني مش شايقة أي حاجة تانية

ما عنديش سلام نفسي

ولا عارفه أسلم لأقدار الله

ولا عارفة أستغل المنح والمواهب اللي ربنا إداها لي

* شايقة نفسك فين بعد خمس سنين؟ (الهدف)

شايقة نفسي اتحررت وأصبح عندي استغناء..

مش بتسول مشاعر من أي حد

بالعكس هيكون عندي طاقة حب هديها للناس اللي تستاهل..

شايقة نفسي سلمت لأقدار ربنا ورضيت، فحياتي بقت حلوة لأنني قررت أحليها بطريقتي...

شايقة نفسي رسامة عندي معرض كبير للوحاتي في إسكندرية...

ساعتها لما هكون قوية مش هرضى لنفسي بأي جواز ولا أي وضع..

لأنني هكون واثقة في نفسي وفي قدراتي..

مرة كنت بتكلم مع دكتورة مها وقالتلي: «ينفع أستاذ دكتور في الجامعة يرضى يشتغل شيال؟ مع احترامنا لكل المهن؟ أكيد هو هيبقي حاسس إن قدراته لازم يستغلها صح ويحطها في المكان المناسب»..

وبالتالي أنا ساعتها هفكر بنفس الأسلوب...

* إيه أخطاء الماضي؟

يووووه.. إنتم عارفين.

* إيه مشكلات الحاضر؟

فكري المغلوط اللي بيتحكم في إدارتي للأمور.

* إيه أدوات الرحلة؟

الإرادة والصبر

الرضا بالمقسوم

التخطيط الصح

طاقة حبي لمريم وحبها ليّا.

* هل أخذتي فعلا قرار التغيير؟

الحمد لله أخذته، وبلا رجعة إن شاء الله...

ثم التفتت إليّ وقالت:

- أنا جاهزة يا دكتور مها لرحلة المستقبل.

هب الجميع من على كراسيهم وتوجهوا نحوها في فرح ليشدوا من أزرها..

كانت تعليقاتهم المختلطة بدموعهم:

- برافو يا هيام!

- إنتي قدها!

- كنت عارفة والله إن دا هيجصل!

- حاسة إن رحلتك للمستقبل هتبقى أنجح رحلة فينا!

قلت لندي بصوت تملؤه السعادة:

- اطلبيلي الباشمهندس محمود بسرعة.

∞ ∞ ∞ ∞ ∞

أمسكت هيام بيدي ودخلنا الآلة، وما إن أغلق محمود الباب حتى سمعتها

تقول بصوت تملؤه السكينة:

- توكلت على الله..

وبعد ثوان...

وجدت نفسي في أحد أحياء إحدى الدول الأوروبية.. كانت اللافتات حولي كلها مكتوبة بلغة لا أفهمها... لم أستطع تخمين أين أنا إلا حينما ربتت إحدى السيدات على كتفي قائلة:

- إنتي غريبة هون، أول مرة تيجي ع إيطاليا؟

قلت بتلغتم:

- آه.. فعلا.. أول مرة آجي هنا.

- تقبريني، إنتي مصرية... حسيت والله.. كلك تايهة.. أقدر أساعدك بشي؟ ابتسمت، فإذا بي ألمح خلفها لافتة كبيرة جدا عليها صورة هيام تقف بثقة، وقد ازدادت جمالا فوق جمالها...

قلت وأنا أشير باتجاه اللافتة:

- عاوزة أروح العنوان اللي على الياقطة هناك دا.

قالت بسعادة:

- آه، إنتي جاية لهون للمعرض لحبيبتني هيام.

- إنتي تعرفيها؟

- وهو في حدا ما بيعرفها لهيام.. تعا فوتي معي.

مشيت بجوار السيدة حتى وصلنا إحدى البنايات الفخمة... دخلنا إلى قاعة كبيرة الحجم، على جدرانها مجموعة من اللوحات الباهرة... مزدحمة بأشخاص كثيرين من مختلف الجنسيات... وما هي إلا لحظات حتى دخلت هيام القاعة، وجوارها شاب أجنبي وسيم..

صفق الجميع بحرارة...

وقالت السيدة بفخر:

- كل هيدي اللوحات رسمتها لهيام، تقبرني حياة قلبي، شو فنانة حسها عالي...

قلت للسيدة، بعد أن كان مختلطا داخلي مزيج من الفرحة والانبهار والذهول:

- مين اللي ماشي جنبها دا؟

- هيدا خطيبها.. شايفة كيف حلوين.

وبعدها بثوان وجدت نفسي أقف في شقة محمود وأمامي هيام، التي أجهشت في البكاء وهي تقول:

- والله العظيم مش قادرة أصدق...

والله العظيم مش قادرة أصدق...

قلت وأنا أمسك كتفيها بيدي:

- النهارده أسعد يوم في حياتي...

- مش عارفة أشكر إزاي!

- لله الفضل من قبل ومن بعد... إنتي إنسانة متميزة، وأنا قربت دا فيكي من أول يوم..

كل الحكاية إن طاقة الحب والمشاعر جواكي كانت محتاجة تتوجه صح. أخذت تردد:

- الحمد لله.. الحمد لله.

∞ ∞ ∞ ∞ ∞

وفي الأوقاف..

- أرجوك يا شيخ صبري، لازم الخطبة اللي أنا كاتبها دي تتحط في الخطبة.

نظر الرجل إليه بتشكك:

- المشكلة إن الموضوع اللي إنت كاتبه دا يا شيخ عبد الواحد شائك، وليه كذا زاوية.. أنا عاوز أعرف إيه بس سر الاستعجال.. إديني فرصة ناقش باقي الزملاء.

- ناقشهم، بس حاول تقنعهم يا شيخنا.

قال الشيخ صبري باستسلام:

- هحاول.

∞ ∞ ∞ ∞ ∞

قال الشيخ صبري في قاعة الاجتماعات:

- جمعتمكم النهارده بناء على طلب الشيخ عبد الواحد، عاوز يعرض عليكم موضوع نتناوله الفترة الجاية، يتم وضعه في الخطبة، ويتم تسليط الضوء عليه.

قرأ الشيخ عبد الواحد خطبته أمام المشايخ...

وامتلأت قاعة الاجتماع عن آخرها بهمهمات التأييد والاعتراض.

قال الشيخ جودت أبو الحق:

- أنا معترض، لأن درء المفسد أولى من جلب المصالح، وأخشى إنه يتم فهم دعوتك بشكل خطأ، أو يتم توظيفها لخراب بيوت المسلمين وتقليب النساء على أزواجهن.. وتسهيل الطلاق للحد الذي يزيد الطين بلة يا شيخنا.

رد عليه الشيخ عبد الواحد بعدما اعتدل في جلسته:

- مفيش كلمة واحدة في الخطبة مش من صميم الدين.. أخرجلي مواطن الضعف أو الخلل في الخطبة ونسعى لتغييرها.. أما رفض الخطبة من بابها فجانبك الصواب فيه يا شيخ جودت.

فقال الشيخ عبد الله البنهاوي:

- أنا مؤيد لكلام الشيخ عبد الواحد...المفسد الحقيقية في ترك الوضع على ما هو عليه.

قال الشيخ عبد الرازق:

- أنا معاكم... هذا دورنا الحقيقي.. أنت تعرف جيدا أن ديننا الإسلامي الحنيف أوصانا بالنساء.. فلقد حرر الإسلام المرأة.. وأعطاهما جميع الحقوق.. فإذا شعرنا بجزء من الجاهلية يجتاح أمة الإسلام يجب أن نتصدى له.. فصلاح أمور أمهاتنا وأخواتنا وبناتنا هو صلاح لأحوالنا يا شيخ جودت.

قال الشيخ إبراهيم:

- أنا معارض.

وهنا تحدث الشيخ صبري قائلا:

- الاختلاف لا يفسد للود قضية، فليتحرك كل منكم وفق قناعاته، والله الموفق والمستعان.

قال الشيخ عبد الواحد:

- وياريت كمان يا شيخنا أساتذتنا وزمائلنا من الأزهر نعرض عليهم الأمر، والمهتمين منهم يسعوا لنشر الفكر دا في الفضائيات وصفحاتهم، وطبعاً مانساش نتواصل مع القضاء ومحكمة الأسرة، ونحاول بمنتهى الجد عرض مشروع تحديث القوانين بما يتوافق مع الدين الإسلامي، مثل أحكام النفقة في الشريعة وحقوق المطلقات وعلاقة الأبناء بالأبوين، بما لا يضر مصلحة أي طرف.

وفي مكتب رئيس تحرير جريدة «اليوم السابع»

- أنا سعيد بموضوعك اللي كتبتيه دا جدا.
 - كله بفضل توجيهات حضرتك.. أنا عملت زيارة بنفسي وشفقت بعيني كل حاجة.
 - موضوعك هينزل بكرة إن شاء الله.
 - مش عارفة أشكر حضرتك إزاي.
 - أنا اللي مش عارف أشكرك إزاي على السبق الصحفي دا.. بالتوفيق يا رانيا.
- وفي صباح اليوم التالي..

فتحت ملك باب المكتب دون استئذان.. وقالت بسعادة:

- إلحقي يا دكتورة مها.. كاتبين عنك وعن الجمعية في الجرنان.. بصي كدا.
- ناولتني الجريدة.. جلست أقرأ ما فيها... وجدت مقالا بعنوان...

«سيدات خارج الصندوق»

في الآونة الأخيرة ارتفعت معدلات الطلاق حسب تقرير معلومات مجلس الوزراء، إذ احتلت مصر المرتبة الأولى عالميا، بعد أن زادت النسبة من ٧٪ إلى ٤٠٪ خلال الخمسين عاما الأخيرة..

ووصل عدد المطلقات إلى ٣ ملايين مطلقة...

فكان من المنطقي أن يعلو صوت النساء مجددا، مطالبات بحقوقهن، ولكن هذه المرة ليست الحقوق لشغل مناصب رفيعة..

وإنما مناهضات لما يتعرضن له بعد الطلاق أو فقدان الزوج من ظلم مجتمعي، نظرا لوضعهن الاجتماعي، إلى جانب عدم وجود قوانين تنصر المظلومات منهن بشكل كاف ضد بعض الأزواج المستهترين.

ورغم أنه في السنين الماضية شهدت حرية المرأة تصاعدا ملحوظا، ما زالت تحكنا بعض المعتقدات الخاطئة..

ورغم سجل الكفاح الضخم ما زال الطريق طويلا...

وبما أن الحركات النسائية هي مكون أساسي مُدرج في كل مشروعات التمدن المصرية، منذ القرن الماضي...

قررت مها سامي - مطلقة مصرية صيدلانية مواليد الثمانينات - كسر حاجز الخوف، وانطلقت في محاولة لتغيير الواقع، عن طريق القيام بعمل جمعية نسائية ليس الغرض منها النقد والحنق على الأوضاع.. وإنما تجربة فريدة من نوعها تنوي من خلالها تغييرا حقيقيا للنهوض بالمرأة المصرية.

فقد أكدت مها سامي أن الجمعية كانت فرصة سانحة للوصول لأكبر عدد ممكن من النساء اللاتي تجمعهن نفس الظروف.

ومن ثم العمل على تطوير إيجابيتهن وتنميتها...

وبالفعل تحققت إنجازات متوالية مع كل المنضمات، بسبب رغبتهن الحقيقية في كسر الإطار الذي لا يليق بهن... ولكن من خلال خطوات عملية...

فلقد رأينا قصص نجاح متعددة داخل الجمعية، لسيدات كسرن حاجز الخوف من المجهول أو عدم التأييد والخجل، وانطلقن للعمل والإبداع، غير آبهات بظروفهن الاجتماعية، أملا في تغيير الأوضاع حولهن...

ينظرن إلى إحلامهن بعين الإمكانية.. قمن بعمل مجتمع صغير يتم فيه بث الطاقة الإيجابية بينهن...

ورأيت أنه من واجبي أن أدمعنهن بنقل تجربتهن الفريدة.. ومن ثم يجب أن نقوم جميعا بدعمهن بكل الوسائل الممكنة لإنجاح عملية التغيير، التي ستسهم في تطوير المجتمع بأكمله، لتحقيق أهداف جديدة والارتقاء إلى مراقٍ جديدة...

يجب أن ينظر السادة المسؤولون إلى هذه المشكلة الضخمة بعين الاعتبار، وهي مشكلة الطلاق، لحلها من جذورها، وتفعيل التجربة الماليزية للتأهيل قبل الزواج.

لقد أوجدت ماليزيا حلا عمليا للطلاق.. استطاعت بتطبيقه خفض نسب الطلاق من ٣٢٪ إلى ٨٪، خلال العشر سنوات الأخيرة، وذلك بتفعيل مشروع (رخصة الزواج) الذي هو بمثابة شهادة يحصل عليها الشباب المقبلون على الزواج، وبموجبها يلتزم هؤلاء الشباب بحضور دورات تدريبية في مراكز متخصصة يحصل بعدها المؤهلُ منهم على تلك الرخصة..

إذ يدرس مواد شرعية حول الحياة الاجتماعية قبل وبعد الزواج، ويتلقى دروسا حول الحياة الصحية والنفسية والروحية للزوجين.

كما ترمي الخطة المذكورة إلى تدريس هذه الثقافة في المدارس، إضافة إلى التوجه نحو الإعلام المفتوح...

أما نحن فيجب علينا، إضافة إلى ما سبق، أن نتوجه لمساعدة المرأة على استكمال حياتها بشكل لائق بعد الطلاق، وذلك بتعديل القوانين بما يوافق الظروف الحالية، دون الإضرار بمصالح أي طرف من الطرفين.

تقول مها سامي: (جميع نساء الجمعية تحلين بالجرأة والشجاعة، ونظرن لأنفسهن بإجلال واحترام، ولم يرفضن فقط تلك العلاقات المليئة بالآلم والإهانة، وإنما رفضن أيضا أن يهدرن أوقاتهم فيما لا يفيد).

وأضافت قائلة:

(أملنا أن يتم تأييد دعوتنا لتغيير نظرة المجتمع للمطلقات، وتقييمهن بعيدا عن الحالة الاجتماعية، ومساندتنا من قبل جميع الجهات المعنية.. وأملنا أن يساهم الرجل المصري المثقف في مساندة دعوتنا، بحيث يكون شريكا للمرأة في قضيتها).

وقالت نرمين إحدى العضوات: (عملنا بمنتهى الجد على تغيير أنفسنا حتى تتغير النظرة لنا ولمن هن في مثل ظروفنا، وذلك أملا في تغيير الأوضاع بشكل عام).

بينما قالت مدام نجلاء المتحدث الرسمي باسم الجمعية: (أوجه حديثي لأخواتي المطلقات والأرامل.. إن أمام كل واحدة منكن خيارين لا ثالث لهما. إما أن تصدري قرارك وتمضي قدما، وإما أن تقرري البقاء حيث أنت، والانزواء لبقية عمرك تتحسرين على آمال لم تتحقق ومواهب لم تقدر.. أحرقي زوارقك القديمة وانوي تغييرا حقيقيا).

كان هذا أول تحقيقاتي بخصوص هؤلاء السيدات... انتظروا مزيدا من التحقيقات والأخبار حول هذا الموضوع خلال الفترة المقبلة.

رانيا سعد الدين

طويت الجريدة في فرح، وقلت:

- الله يا رانيا، ربنا يفرح قلبك زي ما فرحتنا وبتحاولي تساعدينا.

ثم نظرت إلى ملك قائلة:

- خلي ندى تنزل بوست على صفحة الجمعية على الفيس بالخبر الحلو دا.

وبعد ساعتين، رن هاتفي المحمول...

- أيوه يا رانيا... لسة كنت هتصل بيكي.

- طبعا إنتي دريانه بحاجة! من الصبح وأنا بتشتتم بسبب المقالة اللي نزلتها عنكم.

قلت باستغراب:

- ليه كذا؟ هو إنتي كتبتني حاجة غلطا؟

- لأ يا بنتي مش الفكرة، أنا متوقعة أصلا... الكل بيتهمني إني بشجع الستات على الطلاق، والمجتمع مش ناقص خراب وكلام كذا... بس بالمناسبة كذا حد من زمائلي الصحفيين كلموني وسألوني عنكم، وهتلاقيهم الفترة الجاية بيتواصلوا معاكي...

عموما ماتقلقيش.. إنتي صح، وربنا بإذن الله هيوפק.

وفي يوم الجمعة...

صعد الشيخ عبد الواحد المنبر، بعدما استجمع قوته، ثم بدأ كلامه قائلا:

الحمد لله رب العالمين... الحمد لله الحق المبين الذي خلقنا من نفس واحدة وخلق منها زوجها وبث منهما رجالا كثيرا ونساء...

إن الحمد لله نحمده ونستعينه ونستغفره، ونعوذ بالله من شرور أنفسنا ومن سيئات أعمالنا، ونشهد أن لا إله إلا الله وحده لا شريك له...

دلنا على ما يرضيه، وشرع لنا من الأحكام ما يرتضيه، وأشهد أن محمدا عبد الله ورسوله، ثم أما بعد...

يقول ربنا جل وعلا في كتابه الكريم: «وما كان لمؤمن ولا مؤمنة إذا قضى الله ورسوله أمرا أن يكون لهم الخيرة من أمرهم».

فلقد أمرنا الله باجتئاب الهوى، والتزام شرعه، والبعد عن نواهيه...

إخوتي في الله..

كما شرع الله لنا الزواج فقد شرع لنا الطلاق...

فالغرض من شرع الله سعادة البشر، وحينما يتعكر صفو الحياة الزوجية بمشكلات لا يمكن حلها، فإن استمرار الحياة الزوجية على هذه الحال سيُحيل بيوت المسلمين إلى جحيم لا تطاق... وهو ما لا يرضاه الله عز وجل...

إذ كيف يوثق الإنسان نفسه برباط لا فكاك منه؟

وكيف نحرم على بناتنا ممن يذقن صنوف العذاب في بيوتهن الطلاق؟

كيف نحرّم ما أحلّ الله بشكل مباشر أو غير مباشر بمعاقبتهم، بعد أخذ قرار الطلاق، بظلم اجتماعي، بنظرة لا أساس لها في الشرع والدين، وظلم مادي من طليقتها انتقاماً منها على استعمال حق مشروع كفله لها الله، إذا كانت تستحيل العشرة بينهما؟

حينما شرع الله الطلاق لم يشرعه كعقوبة للمرأة، كما هو في عصرنا الحالي..

ولم يشرعه الله لترك المطلقة لهمومها وأحزانها، وأكل أموالها وحقوقها بالباطل..

بل على العكس تماماً، فلقد شرع الله لها حقوقاً لتطيب خاطرها... وهي حقوق على طليقتها،

وحقوق على أهلها، وحقوق على جماعة المسلمين...

وفي مسجد النور بالعباسية، كان الشيخ عبد الرزاق يلقي الخطبة قائلاً:

- فأما حقها عند طليقتها فيئنته الكثير من آيات الذكر الحكيم، وهي حقوق واجبة الأداء، وليست سلاحاً للابتزاز أو مجالاً للتفاوض لسلب حقوق بناتنا... فلقد حذرنا الله وشدد على هذه الأمور، لدرجة تسمية سورة في القرآن بسورة «الطلاق» التي فيها تحذير واضح بقوله تعالى: «وَمَنْ يَتَعَدَّ حُدُودَ اللَّهِ فَقَدْ ظَلَمَ نَفْسَهُ».

وكذلك بعض من آيات سورة البقرة، التي تم فيها ذكر بعض من أحكام الفراق بين الزوجين، وحلول مشكلات الأولاد، مروراً بحضانتهم وإرضاعهم والإنفاق عليهم...

فالويل كل الويل لمن يأكل حقوق طليقته بالباطل، ويجرها جرّاً لساحات المحاكم، فالله عليم بالنوايا وذات الصدور، وعليم بمن يتحايل ليكيد لمطلقته...

بل لقد حرص ديننا الإسلامي على امتداد أواصر الود حتى بعد الطلاق..

فقال الله تعالى: «ولا تنسوا الفضل بينكم»... ويشمل ذلك البعد عما تنطق الألسن من الغيبة والنميمة، لما له من أثر سيئ على الأولاد..

أما حق المطلقة على أهلها أن يشدّوا من أزرها... فلا يلقوا عليها اللوم ليجعلوا كربها كربين، ولا يعيروا زوجها مرة أخرى نظراً للخوف من أصنام مجتمعية، مثل نظرة الناس وغيره، فلا مانع من أن تستفيد من أخطائها وتتزوج مرة ثانية وثالثة.

أما حق المطلقة على جماعة المسلمين، فكما قال نبينا الكريم: «المسلم للمسلم كالبنيان يشدُّ بعضُه بعضًا».

فالمطلقة هي الأم والأخت والابنة، و«لا يؤمن أحدكم حتى يحبَّ لأخيه ما يحبُّ لنفسه»، فلا داعي لوصمهن بالفشل، والانتقاص والشك في أنهن لا يصلحن زوجات، والتقليل من شأنهن دون الرجال الذين مروا بنفس الظروف... وإنكار زواج كل واحدة منهن دون إنكاره على طليقها...

كما يجب علينا المساهمة في رفع الظلم عن المطلقات، عن طريق الأمر بالمعروف والنهي عن المنكر، فقرابة المطلق الظالم يجب عليهم أن يعظوه، وينكروا عليه تصرفاته لو كانت ضد الشرع والدين...

كما يجب على جماعة المسلمين أن يسعوا لمعرفة الأسباب الحقيقية للطلاق، للحد منه، وفي نفس الوقت مساعدة المطلقات في الحصول على حقوقهن، وتذليل العقبات أمامهن.

أما في مسجد الرحمة:

- وأخيرا، فإنه يجب على المطلقات أن يبدأن بأنفسهن، بعمل تغيير حقيقي.. ومن ثم يقمن بنسيان الماضي ويتفاءلن بمستقبل مشرق، ولا يتوجسن خيفة من الزواج مرة أخرى...

فلقد كانت زوجة النبي الأولى السيدة خديجة رضي الله عنها وأرضاها ثيبًا، تزوجت قبل النبي الكريم مرتين... ولم ينتقص ذلك من قدرها نهائيا...

بل على العكس، كانت أحب زوجاته إليه، وكان دائم القول إن الله لم يبدله خيرا منها...

بل وصل إحسانه إليها، حتى بعد وفاتها، إلى قيامه بتكريم صديقاتها اشتياقا إليها، وإحياء لذكرها...

وغيرها من الصحابيات اللاتي تزوجن مرتين وربما ثلاث مرات، وأشهرهن السيدة أسماء بنت عُمَيْس..

التي تزوجت بسيدنا جعفر بن أبي طالب، وسيدنا أبي بكر الصديق، وسيدنا علي بن أبي طالب...

فاصبري يا ابنتي، وتأكدي أن الله لا ينسى عباده، وانشغلي بحياتك حتى يعوضك الله من حيث لا تدريين ولا تحتسبين.

وأخيرا، فإن دعوتنا ليست لتشجيع بناتنا على الطلاق.. حاشا لله.. ولكن هي دعوة لهن في استخدام حق مشروع في حالة استحالة العشرة...

مع تقبلنا الكامل لاختياراتهن ما دامت في نطاق الدين، ويجب أن نغلب ديننا على أهوائنا ونتقبل شرع الله، ونبتعد كل البعد عن تقاليد وأعراق بالية، أصبحت أصناما تخالف كلام الله وهُدًى نبيّه وتجرُّنا إلى الكثير من المفاسد.

∞ ∞ ∞ ∞ ∞



الفصل الحادي عشر: هنخلي الحلم حقيقة

«الأشخاص الذين يدعون أن بعض الأهداف مستحيلة التحقيق يجب ألا يتدخلوا في محاولات غيرهم لتحقيقها»

جورج برنارد شو

قالت وهي تتحدث بتوتر:

- مش ممكن يا دكتور بعد ما صفحة الجمعية اتعرفت على الفيس بوك.. مش قادرة أقولك كمية التعليقات السلبية عاملة أزاى...

بصي مثلا، عندك كريم عبد الغفور، الكاتب الصحفي المشهور، كاتب إيه على صفحته...

«قامت إحداهن بعمل جمعية نسائية تصور للنساء أن الطلاق رحلة رائعة الجمال مليئة بالمغامرات.. لأومش بس كدا، دي كمان عاوزانا كلنا نساعدنا ونقف جنبها ونسقلها ونؤيد دعوتها... وعادي الست تطلق وتتجوز مرة واتنين مفيش مشكلة... وغيرها من الأفكار المستفزة، إلى متى سنسمح بانتشار مثل هذه التقاليع التي تضر بالمصلحة العامة، إلى متى سنسمح بكسر عاداتنا وتقاليدنا، لدرجة لن تجعل بيننا وبين المجتمعات الغربية أي فارق..»

خوف المرأة من الطلاق يجعلها تسعى بكل الطرق والوسائل للحفاظ على بيتها... أما تيسير الأمر وكأنه رحلة إلى جزر المالديف سيجعل خراب البيوت أسهل مما سبق، وستزداد نسب الطلاق، والمصيبة في تأييد بعض شيوخ الأزهر ليهم.. وبعض المثقفين

#فضلا_أوقفوا_مثل_هؤلاء

#رايحين_بيننا_على_فين...»

وبصي الست دي كمان اسمها شيري عبد السلام، من مشاهير الفيس بوك، وعندها فولورز كثير:

«بصراحة الموضوع استفزني جدا، ماكنتش ناوية أعلق ولقيت الوبول كله عندي بيتكلموا في الموضوع دا، الست إياها اللي عاملة فيها مناقلة وعاملالي جمعية، يعني إنتي عشان مطلقة وست طالعك شنب، عاوزة كل الستات يطلعهم شنبات زيك؟ نفسي المطلقات يهدوا علينا بس شوية،

ما هو إنتي أكيد يعني ماتطقتيش من فراغ... وتلاقيهم أكثر ناس يبشجعوا على دعاوى تعدد الزوجات، عددوا عليهم بدري

#ارحمونا_يرحمكم_ربنا

#أमितوا_دعوتهم».

قلت وأنا مبتسمة:

- وماله يا نجلاء.. ما براحتهم يعترضوا.. دا مش هياخر في طريقنا ناحية أهدافنا ولا خطوة... دا رأيهم.. هُمّ حرين.

قالت بخيبة أمل:

- مش هكدب عليكى، كلنا في الجمعية محبطين لأن الهجوم شديد جدا... ودا خلانا حسينا إن تغيير المجتمع بقى من سابع المستحيلات.

- حددي طيب اجتماع يوم الاثنين الجاي، وأكدى عليهم كلهم يجوا. وفي الاجتماع...

- وحشتوني جدا.. بقالنا فترة ما عملناش اجتماعات... بصوا بقى، أنا النهارده اجتمعت بيكم عشان موضوعين، واحد مهم والثاني مش مهم...

وجدت علامات الدهشة على وجوههن.

تابعت حديثي قائلة:

- هبتدي بالموضوع اللي مش مهم...

حوار الناس اللي بتهاجمنا وبتهاجم طريقتنا في التفكير...

عاوزين بس نتفق على حاجة تحطوها قاعدة لازم تمشوا بيها في حياتكم... إذا كان العباد ماتفقوش على رب العباد، هيتفقوا كلهم علينا مثلا؟!

قالت هاجر بحزن:

- بس دا معناه إن ممكن فكرتنا تموت قبل ما تتولد أصلا!

قلت وأنا أضحك:

- إزاي بس! كل ما هنالك، أي حاجة جديدة في أولها لازم الناس تستغربها..

زي مثلا إنتي على سبيل المثال، ممكن تاخدي قرار استحالة هتلاقي كل اللي حواليكى متفقين عليه... دا مايحبطكيش أبدا، طالما درستى أبعاد قراراتك زي ما قلنا قبل كدا...

بصوا، الأول هفكركم بحوار يضحك كدا...

مين فينا فاكر الكيس البلاستيك اللي كانوا أمهاتنا يحطولنا فيه السندوتشات وإحنا رايعين المدرسة؟ ونروح المدرسة نفتح الشنطة نلاقي الساندوتش بلفظ أنفاسه الأخيرة.. لأنه بيكون داس عليه القطر رايع جاي عشر مرات، أثناء رحلة نقله من البيت للمدرسة!

ضحك جميع الحاضرين...

قلت وأنا مبتسمة:

- وجيلنا كله عاش واتربى على الكيس البلاستيك.. من كام سنة كدا... واحدة من الأمهات قطعت الكيس البلاستيك وقررت استخدام اللانش بوكس... قوم كلنا قلدناها... وشوية وبدأ ينتشر على صفحات الفيس بوك إزاي نحط ما لذ وطاب في اللانش بوكس... تخيلوا كدا لو طفل مننا زمان خد اللانش بوكس دا.. كان كل العيال هيستغربوه، واحتمال الميس تطرده أصلا برة الفصل.. خوفًا على باقي الأطفال من «ذلك الصندوق المغلق».

وعندنا أمثلة كتير لحاجات اتغيرت، إذا كان إحنا نفسنا بتتغير كل سنة عن اللي قبلها...

دوام الحال من المحال يا جماعة... دوام الحال من المحال، دي كلمة بتعدي علينا كدا ماينقفش عليها كتير، لكن هي فعلا حقيقية... بقولها لنفسي دايمًا، وبقولها لأي بنت بتقع في أي مشكلة... لو تفكري في حالك مثلاً آخر خمس سنين من عمرك، هتلاقي إن كان فيه حاجات بتهمك مايقتش بتهمك... كان فيه حاجات مابتهمكيش بقت تهمك... أكل كنتي بتحبيه وبقيتي بتكرهيه والعكس... مشاكل كتير اتحلت... حاجات ماكانتش مشكلة وبقوت مشكلة... ناس كنتي بتحبيهم ودلوقتي مابتطيقيش سيرتهم والعكس... نظرتك لأمر كتير ووجهة نظرك فيها اتغيرت...

هتفتكري أكيد موقف مؤتي نفسك فيه من العياط، ودلوقتي أكيد اتحل أو لما تفتكره بتضحكي أو أوحش الافتراضات نسيته... وغيرها وغيرها...

الشاهد من كلامي اللي فات، إنك ماتزعلّيش نفسك وماتديش الأمور أكبر من حجمها، طالما أخذتي بالأسباب انتهينا، مفيش في إيدك حاجة تانية تعملها، ارمي حمولك على ربنا... لازم تفهموا إن تغييرك إنتي أو رغبتنا في تغيير المجتمع حوالينا محتاجة صبر مننا.. ودا هينقلني للنقطة الثانية... إن إحنا ماينفعلش نختار نعيش في بؤس ونقعد نصوت زي مسعود في مسرحية وجهة نظر...

مفيش فايده...

وللأسف أغلب مجتمعات المطلقات بتبخ البؤس والتنافس فيه.. ومش عاوزين
إحنا نعمل كدا...

تلاقي مثلا جروب الفيس من دول اسمه من بابہ حزن «طلاقي نهاية
حياتي»... وتلاقي اليوست المثير... «شكري وتحياتي لمن دمر حياتي»...
شوية وتلاقي واحدة داخله: «أنا طليقي دمرني وحذف عليه قنبلتين وجري»..
تقوم الثانية ترد «أنا حذف عليه ثلاثة والنبي يا أختي»...
دعونا نلطم في صمت...

من غير البحث أو تقديم أي حلول منطقية... ودا بالظبط اللي إحنا عملناه
دلوقتي... كلنا اتأثرنا بالنقد تأثير سلبي..

قعدنا نندب مع بعض... كلنا جالنا إحباط... عاوزين فوراً نبطل دا، وناخذ رد
فعل من اتنين:

يا ندور على حلول منطقية، يا ندور على معاني إيجابية.. إيه رأيكم؟
قالوا جميعهم في نفس واحد:

- تمام جدا.

قلت:

- اسمحولي أتكلم في الموضوع المهم.. إحنا من أول الجمعة والسبت الجاينين
هنجيب الأولاد معنا... يوم الجمعة يوم التربية... ويوم السبت يوم الترفيه.

هنجيب الأولاد والبنات طبعاً، والأعمار مفتوحة، هنقسم المحاضرات وفقاً لكل
شريحة عمرية.

قلت مدام دعاء بحزن:

- طيب واللي ما عندوش ولاد.

قلت بعدما ابتسمت ابتسامة عريضة:

- تيجي برضه تساعدنا في تربية ولاد إخوانها، صح ولا إيه؟!

قلت بسعادة:

- صح.

قلت وأنا أوجه كلامي لجميع الحاضرين:

- شفتم مدام دعاء زعلانة إن ما عندهاش ولاد... في حين إن كل واحدة فينا اتطلقت بأولاد، كانت تتمنى إنها تخرج من غير ولاد يتظلموا وتشيل مسؤوليتهم.. ياترى أي وضع أفضل؟! الوضع الأفضل هو الوضع اللي إنتي فيه، لأن ربنا عالم بيكي وبقدراتك وبالرسالة اللي المفروض تعملها.

∞ ∞ ∞ ∞ ∞

وبعد أن عدت لمنزلي في المساء، استقبلني أبنائي الثلاثة بحرارة وانصرفوا لغرفة الألعاب... ساقاني الفضول لأتابع الأمر عن بعد دون أن يروني، فوجدت الحوار التالي بين ولديّ حمزة وصهيب...

قال حمزة وهو يمسك دبابته الصغيرة:

- تعرف يا صهيب أنا بحمد ربنا إني ما طلعتش أم.

رد صهيب ببراءة:

- ليه؟

- عشان الأمهات بيتعبوا أوي عشان ولادهم... أنا لما أكبر هبقي راجل وهريح نفسي، هروح الشغل بس وهرجع أنا م براحتي.

رد صهيب بعد أن لمعت عيناه:

- أنا كمان الحمد لله إني ما طلعتش أم.

ثم قال بنظرة شريرة:

- فاطمة (شقيقتها) هتطلع أم وهتتعذب.

وتوالت ضحكاتهما الصغيرة الممتزجة بشر طفولي.

ضحكت في سري:

- أهلا بالذكور الصغنة.

طرقت الباب عليهما، فقال حمزة من الداخل:

- ادخل.

دخلت وجلست بجوارهما على الأرض، وشاركتهما اللعب، ثم قلت فجأة:

- مين فيكم راجل.

نظر حمزة بزهو إلى عضلاته:

- أنا.

فقلده صهيب على الفور:

- وأنا كمان.

- إنتم عارفين طبعا إني أم وتعبانة.

قال حمزه بأسى:

- آه فعلا إحنا عارفين.

قلت بخبث:

- مين فيكم هيجي معايا الجمعية يوم الجمعة؟ كل الأمهات تعبانين زيي،
وعاوزين الرجالة الأقوياء يساعدونا إننا نعمل شوية حاجات هناك وهنروقها.

هب حمزة واقفا بزهو:

- أنا طبعا.

فقال صهيب بتشكك:

- تينة بتقول الترويق بتاع البنات بس يا ماما.

- طيب ممكن بس تيجوا معايا إنتم وفاطمة ونشوف هنعمل إيه؟

قالا ببراعة:

- ماشي.

وفي يوم الجمعة...

كان من أسعد أيام حياتي... توافد الأطفال مع أمهاتهم... كانت تمتلئ أعينهم
الصغيرة بمزيج من الفضول والسعادة لوجود هذا الكم من الأطفال... شعرت
أن الأمل الحقيقي في هؤلاء الصغار.

بدأت الدكتورة نهى الطنب اللقاء بحدوتة تربية للأطفال صغار السن...

لشرح الطلاق بأسلوب مبسط...

«كان فيه مرة قطتين إخوات اسمهم ميشو ومشمش...

كانوا عايشين فرحانين وسعداء وكلهم بيحبوا بعض

ماما بتحب ميشو ومشمش

وبابا بيحب ميشو ومشمش

وميشو بيحب مشمش

وفي يوم من الأيام باباهم قالهم أنا لازم أروح أعيش في بيت لوحدي...
ميشو ومشمش قعدوا يعيطوا ويقولوا: ليه يا بابا؟ هو انت خلاص مابقتش تحبنا
ولا بتحب ماما؟

قالهم: أكيد بحبكم وبحب ماما عشان هي مامتكم.

قالوا له: طيب ومين هيجيلنا لعبنا وحاجتنا؟

قالهم: أنا طبعا.

قالوا له: إنت ليه هتمشي يا بابا؟ هو إنت وماما زعلتم منا في حاجة؟

قالهم: لأ خالص مازعلتش منكم، بس لازم أروح بيت تاني أنا فيه... وهنفضل
نتقابل ونخرج كلنا أنا وانتو وماما.

راحت مامتهم قايلة: علاقتي بيكم وعلاقة بابا بيكم حاجة دائمة، إحنا الاتنين
هنفضل باباكم ومامتكم وهنفضل نحبكم.

لكن علاقتي أنا وبابا ببعض مش دائمة... عادي ممكن بابا يتجوز واحدة تانية
وأنا كمان..

بس المهم في دا كله إننا هنفضل نحبكم ونبص على مصلحتكم قبل أي حاجة.

ومن بعدها قام الباشمهندس محمود الأسعد بإعطاء المراهقين محاضرة
بعنوان: «الحيطان ليها ودان ولا الملايكة عندها أقلام؟»..

كان الهدف منها التأكيد على الخوف من الله وليس من كلام الناس..

ومن ثم أعلنت مدام نجلاء عن وقت البريك..

قلت وأنا أنظر إليهم:

- يا ترى مين هيساعدنا في تحضير العدا؟

قامت كل بنت في القاعة من مكانها، ولم يتحرك ولد واحد من مكانه.

ضحكت قائلة:

- مين من الشباب هيساعدنا؟!

قال أحد الأطفال:

- إحنا مانعرفش نطبخ يا طنط، وبعدين الطبخ دا مهنة البنات.

توجهت ناحيته وقلت وأنا أداعبه:

- أومال الشيفات الرجالة اللي بيطلعوا في التلفزيون دول إيه؟ وكمان
بيطبخوا أحسن من الستات.. بصوا بقى.. مين فيكم راجل؟

قال الجميع بأصوات عالية:

- أنا.. أنا.. أنا..

- حلو أوي.. وتفتكروا مين أقوى؟ الراجل ولا الست؟

قال الأطفال دون تردد:

- الرجالة طبعاً.

قلت:

- حلو أوي، عاوزين الرجالة الأقويا يساعدوا إخواتهم البنات وأمهاتهم في كل
حاجة في البيت...

لأنه أقوى منهم، وكمان بيحبهم وهييقى عاوز يساعدهم عشان يريحهم..

مين قوي وهيساعدنا؟

وجدت جميع الأطفال هبوا من كراسيهم، وتدافعوا نحوي في حماسة..

قلت بسعادة:

- إنتم عارفين إنكم كدا هتعملوا زي الرسول بالطبط؟ لأنه كان راجل قوي،
فكان بيساعد أهل بيته في شغل البيت، وبيكنس، ويعمل حاجته لنفسه كمان،
مش بس بيساعدهم.

وبعد الانتهاء من إعداد الطعام، قاموا بمساعدتنا بغسل الأطباق وإعادة الوضع
كما كان عليه...

وفي نهاية اليوم قلت وأنا أودعهم:

- بكرة بإذن الله هنخرج كلنا هنروح الأزهر بارك، هنفرح وهنلعب عشان كلكم
كنتم شاطرين النهارده، احترمتم بعض، وكل واحد فينا ساعد باللي قدر عليه،
فلازم نعملكم خروجة حلوة وهنديكم هدايا كمان...

وبالنسبة للأمهات عندنا اجتماع مهم جدا يوم الحَدّ... في انتظاركم بكرة بإذن
الله قدام الحديقة الساعة عشرة صباحاً.

∞ ∞ ∞ ∞ ∞

عارفين يعني إيه ابني راجل؟!

قالت مدام شاهيناز ضاحكة:

- آه طبعاً، يعني الكلمة اللي بتقولها الأمهات اللي عندها ولاد بمنتهى الفخر والاعتزاز: أنا عندي راجل وسيد الرجالة كمان!
قلت ضاحكة:

- آه بس دا مش المعنى اللي أقصده...

«ابني راجل» مش معناها إني خلفت راجل، لأ... معناها إنتي قومي ببناء راجل، بحس أكبر تحدي ممكن أواجهه في الدنيا إني أطلع ابني راجل بمعنى الكلمة..

راجل عند كلمته، وما يخافش، وبالتالي ما يكذبش، راجل يشيل مسؤولية نفسه وإخواته، راجل يعرف إن الرجولة تكليف مش تشریف... راجل عنده دين ويقف عند حدود الله ويخاف يتعدها... راجل يحترم الست سواء أمه أو أخته أو مراته... راجل يراقب الله في كل تصرفاته...

راجل قوي، وصاحب قرار، وعنده شخصية وحكمة... عارف يقول إيه إمتي وإزاي...

كل واحدة عندها ولد تسعى بكل قوتها إنها تزرع فيه معاني الرجولة الحقيقية، اللي للأسف بقت نادرة جداً...

وفي نفس الوقت... ابني امرأة

امرأة قوية مستقلة بذاتها واثقة في نفسها... غرّقيها مشاعر عشان ماتروحش تدور عليها برة... علميها العطاء، بس العطاء المتبادل بينها وبين اللي حواليتها، ماتعيشني تضغط على نفسها... علميها فضل الزوج والزواج، ولكن ماتعظميش الأمر في دماغها فيوصل للتمحور زي ما جراننا..

علميهم الاتنين يختاروا شركاءهم في الرحلة الصّح بناء على أسس..

أثناء تربيتكم ليهم ماتفرّقوش بين ولد وبنت أبدا مهما حصل...

إوعوا تكررّوا نفس التصرفات الجاهلية اللي حصلت معانا...

قالت مدام نجلاء:

- يا ريت توضحي أكثر.

قلت بحزن:

- كام واحدة فينا كانت بتخدم إخواتها الولاد وهمّا شايلين إيدهم تماماً من كل حاجة؟

كام واحدة فينا كان بيتضغط عليها عشان تشيل مسؤولية نفسها وإخواتها؟ في حين أخوها موجود ولا عارف يشيل مسؤولية اللي حواليه، ولا حتى مسؤولية

الشراب اللي بيرميه في الأرض...

كام واحدة فينا أهلها كانوا بيتعاملوا مع أخوها بمبدأ إنه هو اللي لازم يأمر وينهي وبشكم، حتى لو كان أصغر منها... وكانت بتوصل أحيانا لمد الإيد بدون أي رد فعل من الأهل؟

كام واحدة فينا لقت أخوها مصاحب خمستلاف بنت، يخرج وقت

ما هو عاوز ويرجع وقت ما هو عاوز من غير ما يتقال له حرام، في حين هي بيتم منعها من حاجات عادية جدا تحت مسمى العيب؟

كام واحدة حست إن أهلها مهتمين بتعليم إخوانها الولاد عنها، أو بيتعلموا السواقة وهي لأعشان بس هم (رجالة) من غير إبداء أي أسباب مقنعة تانية؟

كام واحدة فينا حست قد إيه حماتها بتفرق في التعامل بينها وبين جوز بنتها، لأنك ببساطة واحدة ست لازم تاخدي على دماغك وتتحكم في كل حاجة تخصك، إنما هو راجل وبنتها في إيده؟

كم واحدة حست إن حماتها بترضاها اللي مابترضاهاوش لبنتها مثلا؟

وغيرها وغيرها من التصرفات، اللي خلتنا حسينا إن فيه انعدام مسؤولية بين قطاع كبير من الرجالة، وبقت فيه فجوة كبيرة خلت إن فيه عدد لا بأس به من البنات تقول أنا حاسة إنني أرجل من جوزي...

كل دا أدى إلى إن البنات كبر عندهم الشعور بالدونية لمجرد إنهم بنات، والولاد اندعم عندهم الشعور بالغرور لمجرد إنك راجل..

مابقيناش بنتقيّم مين أكفاً في إيه

بقينا نتقيّم راجل وست

ودا جرّنا لإننا بقينا نتقيّم على أساس وضع اجتماعي للست غير الراجل..

ربنا لما قال «ولهن مثل الذي عليهن بالمعروف، وللرجال عليهن درجة»، الدرجة دي درجة مسؤولية... تكليف أقسم بالله مش تشريف...

علمي ولادك البنات والولاد الإنسانية...

علميهم نفس القيم والمبادئ، بغض النظر مين فيهم ولد ومين فيهم بنت... الإنسانية كلمة ماكنتش بركز في معناها أوي، لحد ما الواحد شاف كتير أوي في الدنيا فعلا، ولقيت إن الإنسانية شعور مش موجود عند ناس كتير... عشان كدا لما حد بيشتم حد بيقوله يا حيوان...

لأن الحيوان ما عندوش إنسانية رغم إن عنده شعور..

يعني الكلب عنده وفاء شديد
والحصان بيحس ويبكي
الإنسانية من وجهة نظري هي إنك تعلميهم:
يحسوا بالناس
يعاملوا زي ما بيحبوا يتعاملوا
يحطوا نفسهم مكان اللي قدامهم ألف مرة قبل ما يصدروا أحكام
يرحموا الأضعف منهم مش يستقوا عليهم
يقفوا جنب الناس اللي محتاجينلهم
إن اللي حوالهم يحسوا بحبهم وتقديرهم ليهم، بكلمات ومواقف ولو بسيطة
إنهم مايظلموش حد
إنهم يعذروا الناس
مايكونش عندهم أنانية
إنهم يحترموا الأصغر منهم
إنهم مايكونش عندهم كبر عن الحق وتمسك بالباطل
عندهم شجاعة الاعتراف بأخطاءهم
من الآخر يكونوا صالحين بمعنى الكلمة...
أوقات كتير بحس إن أسباب انتشار الظلم في مجتمعنا، بجانب طبعا عدم
الخوف من الله، هو انعدام الإنسانية في كل العلاقات بين الناس
الآباء والأبناء
الناس مع بعض في الشغل
الراجل ومراته والعكس
الأصدقاء
والأدهي إن ناس كتير للأسف فقدوا الإنسانية والشعور، فبقوا في درجة أقل
من الحيوانات...
لو بصينا على الصفات اللي كتبتها، هنلاقي إن دي صفات الرسول عليه الصلاة
والسلام،

عَلّمي الولاد يقتدوا بسنته.. وعَلّمي البنات إزاي يكونوا أمّهات في المستقبل...

من الآخر ربّي ولادك بمنتهى العدل والإنصاف... لو كل واحد فينا عمل كذا مع ولاده، هنلاقي جيل كامل من الأفراد المختلفين في طريقة التفكير...

هنراجع إيه؟ أخطاء الماضي، ونشوف مشكلات الحاضر...

كفاية بس دلوقتي ناخذ القرار مبدئيا بصدق..

ونخطط للمستقبل بالمشاركة مع ولادنا في اللي هيناسبهم..

بس لازم نخطط تخطيط صح، وكمان نسيبهم ياخدوا القرارات المصيرية اللي تخص حياتهم، هنخطط معاهم إزاي، ونعلمهم إزاي، دا موضوع كبير هنعمله قصة لوحدته على جنب.

فرح الجميع لهذا الخبر، وبدأت الأحاديث الجانبية فيما بينهم، تعبيراً عن رضاهم عن الفكرة...

وفجأة رن جرس الباب...

ذهبت ندى لتفتح، وبعد ثوان:

- دكتور مها، دسوقي البواب عاوزك ضروري.

خرجت لأعرف ما الذي يريد، وجدته يقول بارتباك:

- فيه ستات كاتير جوووي تحت يا ضاكتوره، مصممين يطلعوك هنا، ولما سألتهم بخصوص إيه جالولي بلّغها وبس...

قلت بعد أن قطبت جيني:

- غريبة، خليهم يتفضلوا...

وماهي إلا دقيقة حتى وجدت جمعا من السيدات، نحو عشرين سيدة تتراوح أعمارهن ما بين الثلاثين والأربعين...

نظر إليهن جميع العضوات بقلق، وقلت باستغراب:

- أهلا وسهلا، نقدر نساعدكم بإيه.

قالت واحدة منهن:

- الصراحة، سمعنا عن الجمعية بتاعتكم، إحنا مش مطلقات، بس كلنا بنفكر جديا في الطلاق.

قلت بعدما تنهدت بارتياح:

- ههههه.. مش تقولوا طيب! اتفضلوا.

رحبت عضوات جمعيتنا بهن، وقامت ملك وندى بجلب كراسي إضافية... عدت ووقفت في مكاني وقلت:

- أنا ما عنديش مانع إنكم تنضموا للجمعية طبعاً تنورونا، لكن المانع اللي عندي إنكم تكونوا بتتطلقوا لمجرد اقتناعكم بدعوتي...

قالت إحداهن:

- بصراحة إحنا اتخنقنا من معاملة اجوازنا وإهمالهم لينا...

قلت:

- أرجوكم إدوني فرصة أسألكم شوية أسئلة مش عاوزة إجابتها بشكل علني...

اكتبوا الأسئلة ورايا في ورقة، وكل واحدة منكم تقعد تبص لها بعمق مرة واثنتين وثلاثة...

وهديكم فرصة بعد ما تجاوبوا على أسئلتني إجابات منصفة بينكم وبين نفسكم، إنكم تاخدوا القرار الأسلم لحياتكم... اللي هيكون نايع عن اقتناع مش انفعال لحظي...

ثم ابتسمت:

- خلونا الأول نتعرف على كل واحدة فيكم، وتدينا نبذة مختصرة عن مشكلتها...

وبعد أن استمعنا إليهن جميعاً قلت:

- أكيد مهما سمعنا الكلام اللي قلتوه عمره ما هيكون كافي إننا نحكم.

قالت إحداهن (تدعى مدام جيحي):

- أومال ليه حضرتك خلتينا نحكي؟

ابتسمت بغموض:

- لحظة واحدة وهتعرفي..

مدام نجلاء.. إيه رأيك مدام جيحي تطلق ولا لأ؟

- ياه، اللي حكيتيه ولا حاجة جنب اللي شفته، أنا لو منك عمري ما هتطلق.

أدرت بصري باتجاه أمنية:

- وإنتي يا أمانة إيه رأيك؟

قالت بسرعة:

- لأ طبعا ماقدرش أستحمل اللي هي حكته دا ولا يوم واحد.

ارتفع حاجبا السيدة من الدهشة..

وجهت كلامي لهاجر:

- وإنتي يا هاجر؟

- أنا شايفة إنها تستحمل كمان شوية، ولو ماتضطبطش تتطلق..

ابتسمت ابتسامة عريضة، وقلت موجهة كلامي لجيجي:

- ها.. تحبي أجيبك رأي رابع وخامس؟!

لم تنطق السيدة بكلمة واحدة، وقالت وهي دامعة العينين:

- طب والحل؟!

توجهت بنظري نحو جمع السيدات، وبعد أن تنهدت:

- الطلاق مش سهل، وإدارة بيت وتحمل مسؤوليته مش سهلة..

إنك تربى ولادك بين أب وأم مش متفاهمين مش سهل، وإنك تربى ولادك من غير أب خالص برضه مش سهل...

عاوزين تعرفوا الحل؟!

الحل عندك إنتي وبس...

العلاقة الزوجية شيء في منتهى التعقيد، ما يعلم اللي ما بين الزوجين إلا الله.. إوعي تروحي تحكي لحد.. إلا المشاكل اللي محتاجة فيها ضهر وسند يُقفلك... غير كدا الحوارات العامة إوعي.. ما حدش هيديكي رأي يناسبك...

لأنه ببساطة هيقولك كلام وفق قناعاته وتجاربه...

قالت مدام جيجي بنفاد صبر:

- آه، إيه الحل بقى؟!

- فيه حاجتين...

أولا: إنك تكوني صريحة مع نفسك لأقصى درجة في الأسئلة اللي هقولكم عليها...

وثانياً: يوم ما تقررې تخرجي من العلاقة هيكون عشان دا فعلا الحل الأسلم...
وهتخرجي وإنتي بتنفضي إيدك وبتقولي «ليس في الإمكان أكثر مما كان»...

خليني الأول أقولك الأسئلة:

«أسئلة مها لمن تفكر في الطلاق»

حاولتي محاولات بجد عشان العلاقة تتصلح؟!

.....
.....
.....
.....
.....
.....
.....
.....
.....

.....
حاولتي كام مرة؟!

.....
.....
.....
.....
.....
.....
.....
.....
.....

.....
هل سجدتي ودعيتي ربك بصدق وإخلاص يدلك على السبيل؟!

.....
.....
.....
.....
.....
.....
.....
.....

.....
.....
كنتي صريحة مع نفسك في عيوبك اللي إنتي أكيد عارفها كويس، وحاولتي
تصلحها من غير جلد لذاتك ولا إلقاء لوم على الآخرين؟!
حاول تي تقعدي معاه قعدة صدق عشان تقربوا بينكم وجهات النظر؟!
.....
.....
.....
.....
.....
.....
.....
.....
.....
.....

.....
وصل الأمر لشقاق فظيع، والدنيا مش نافعة، قمتي جبتي حكم من أهلك
وحكم من أهله من الناس اللي عاوزة الإصلاح عشان يشوف مين غلطان؟!
.....
.....
.....
.....
.....
.....
.....
.....
.....
.....

.....
عملتي كل اللي ما يعمل، والموضوع واصل لمرحلة لا تطاق بتضر نفسيتك
ونفسية أولادك؟!
.....
.....
.....
.....
.....
.....
.....
.....
.....

وخاصة إن العقل بعد انتهاء أي علاقة يسترجع بس اللحظات الجميلة..
واللحظات الوحشة لو مش كثير بتتنسي للأسف.. من خلال خبرتي المتواضعة
في الحياة... بحس إن أي علاقة يتحطلها جدول زمني معين..
خلال الوقت ده الواحد يبذل كل ما أوتي من قوة لإنجاح العلاقة

ويعدّي

ويفوّت

ويشتري

ويتنازل حبتين

لو لقي عدم تقدير من الطرف الآخر، فورا بعدها مايستمرش في العلاقة دي
ولا ثانية زيادة... هيبقي عندك مخزون من المواقف يكفيكي لحد ما تموتي،
وكل ما تفتكرها عمرك ما هتشعري بالندم..

وطوحي بطول ذراعك بلا رجعة، واخرجي من العلاقة وإنتي بتنفضي إيدك
وتقولي

«ليس في الإمكان أكثر مما كان»..

في اللحظة دي بيبقى الواحد عنده ثقة عمياء لمياء... إن فعلا العلاقة مش
نافعة - مين لمياء؟ ماعرفش ما علينا - وساعتها هقولك إنك عمرك
ما هتبصي وراكي تاني أبدا...

إوعي تخافي تاخدي قرار الطلاق، وإنتي في علاقة فاشلة على كل المستويات
بشهادة الجميع!

وإوعي تقرر الطلاق نتيجة تسرع وانفعال لحظي، بدون دراسة حقيقية
وسعي حقيقي لإصلاح العلاقة..

إوعي تستمري في علاقة فاشلة وتدمري ولادك خوفا من المجتمع!

وإوعي ماتستمريش في علاقة قد تبدو ليكي فاشلة، في حين إنها مش فاشلة
ولا حاجة، وإنتي بس محتاجة تصارحي نفسك، وبرضه تدمري ولادك!

لازم تفهموا إن لا الطلاق فسحة ولا الجواز فسحة..

ولا ينفع كلنا نعيش زي بعض... أو نحط نفسنا جوة قوالب جامدة ونبقى نسخ
من بعض..

ولا ينفع آخذ رأي اللي حوالياً في قرارات مصيرية... آخذ مشورة وأسمع آه..
أأخذ رأي وأنفذ لأ.. كل واحد فينا ليه رسالته في الحياة يختار الطريق اللي
يناسبه بمنتهى التعقل، ومن غير ما يضر اللي حواليه.

لازم يكون القرار في صالح كل الأطراف، إنتي، وولادك، وحتى هو.
انتهى الاجتماع بعد أن وعدتني كل واحدة منهن بأن تصارح نفسها، وتعود عما
قريب لتخبرنا بقرارها النهائي...

واتفقنا على أن يُعقد الاجتماع التالي بعد أسبوع..

واتفقنا على تثبيت يوم الاثنين لعمل مناقشات لمتابعة خط سير كل واحدة
منهن.

∞ ∞ ∞ ∞ ∞

بصي يا مها... يقولك في الأخبار: عضو مجلس شعب مقدم مذكرة فيها
مقترحات لتعديل قوانين محكمة الأسرة...

نسب الطلاق زادت بشكل رهيب، وللأسف فيه رجالة ما بتصرفش على ولادها،
وستات بيمنعوا طليقهم من رؤية الولاد... لازم فعلا قوانين تحط حد للمهازل
دي...

قلت بعد أن تنهدت بحرارة:

- يا رب يا ماما... إنتي عارفة إن المشكلة الحقيقية إننا هنا في مصر
ما بناخدش قرار الطلاق عن قناعة تامة من الطرفين إن الحياة مستحيلة..
يبقى غالباً تحت ضغوط الشعور بالكرامة أو تدخل الأهل أو عدم صراحة كل
واحد مع نفسه، فتلاقيه هو بعد الطلاق بينتقم وهي تنتقم، والموضوع بيقلب
خناقة..

نفسى أشوف حالة طلاق محترمة بمعنى الكلمة...

- ليه؟ هو أنا ما حكي تليكيش على ابن طنط حنان؟

- يانهار أبيض، هو ابن طنط حنان طلق مراته؟

- آه... بس ما بشاء الله ربنا يحميهم، مامته بتقوللي خرج من البيت بشنطة
هدومه وشنطة أوراقه.. وسابلها كل حاجة بمعنى الكلمة..

طنط حنان قالتلي وهما قدام المأذون قالها إنتي طالق يا ليلي، بس مع
احترامي...

والبنت قالت له وأنا عمري ما هنسى الأيام الحلوة اللي قضيناها مع بعض،
ودول ولادك مهما حصل.

قلت باهتمام:

- كملي يا ماما.

- المهم يا ستي بيديلهم مصروف شهري زي اللي كان بيصرفه عليهم وهو معاهم بالضبط... لدرجة طنط حنان قالت له: حرام عليك نفسك يا وائل هتتجوز إزاي؟!

راح قايلها: من فضلك يا ماما هو إنتي اللي هتتحاسبي ولا أنا؟ من فضلك ماتتكلميش معايا في أي حد من حدود ربنا...

ومثبتين يوم في الأسبوع بيخرجوا كلهم مع بعض... هو وهي والأولاد، وبيكلمهم وبيكلموه... وبيأخذهم يباتوا معاه يوم أو يومين في نهاية الأسبوع، حسب الظروف...

- ما شاء الله... يا رب دا يبقى الوضع الطبيعي.

وخلال الأسبوع الذي سبق الاجتماع، كانت جميع وسائل الإعلام المرئية والمسموعة تتحدث عن جمعيتنا، وارتفاع معدلات الطلاق، وتعديل القانون.. ما بين مؤيد ومعارض... وتوافد العديد من الصحفيين والمحطات الفضائية على الجمعية للاطلاع على الأمر عن قرب...

كنت أدعو الله أن يهدينا لما فيه صلاح أحوالنا.

وفي الاجتماع...

- النهارده بإذن الله هنسميه يوم سؤال وجواب... كل واحدة عندها استفسار يا ريت تقوله ونجاوبه مع بعض... أي واحدة عندها مشكلة تعرضها علينا ونفكر فيها سوا... أي حد فيه حاجة شاغلة باله يقولها، ونحاول نلاقي أسلم طريق...

خلوني بس الأول أرحب بعضواتنا الجداد المتزوجات..

ضحك الجميع...

قالت مدام جيبي:

- أنا جاوبت على الأسئلة اللي قولتلنا عليها المرة اللي فاتت.

- وبعدين؟

- زي ما وضحتلكم المرة اللي فاتت، إني سايبة البيت بقالي خمس شهور تقريبا، وبعد ما مشيت من هنا وقعدت مع نفسي قعدة صراحة زي ما طلبتي مننا، لقيت إن كان ممكن نتقابل في نقط كثير، بس أنا حكمت رأبي في شوية أمور... ورفعت قضية طلاق زي ما حكيتلكم.

نظرت إليها بسعادة:

- برافو يا جيحي، وبعدين؟

- اتصلت بيه واتقابلنا وأقنعتة يقعد هو كمان مع نفسه ويعترف بأخطاؤه، ووعدته إن أسلوب إدارتي للأمور هيتغير معاه... اتبسط جدا ووعدني إنه هيكلمني بعد ما يقعد مع نفسه قعدة صدق، ومن غير ما يحكي لأي حد، عشان مايشوشي تفكيره.. واتفقنا مع بعض إن أي قرار هنوصله سواء كملنا أو ماكملناش، هنكون متفاهمين فيه لأبعد الحدود...

ولو كملنا جوازنا هيكون جواز محترم..

ولو اتطلقنا برده هيكون طلاقنا محترم..

أدرت نظري بين الحاضرين:

- ياه.. بجد نفسي فعلا دا النموذج اللي نوصله...

إحنا مش في حرب صراع الجبابرة وتحدي الأقوياء، ونظرية الغاب والبقاء للأقوى...

إحنا داخليين شراكة بأهداف، لقينا الشركة بتقع هندور مع بعض على الحلول عشان المركب ماتغرقش..

مالقيناش حلول عشان الشركة تكمل، يبقى هنلاقي أكيد حلول إننا مانخسرش... ونخرج من الشركة وكل واحد فينا مَرَضِي ومبسوط.

قالت مدام إيمان، إحدى عضوات الجمعية القدامى:

- أنا فيه موقف بايخ حصلي الأسبوع اللي فات، وغصب عني أعصابي انهارت...

قلت بقلق:

- خير يا إيمو؟

أكملت حديثها قائلة:

- واحد راجل كبير في السن عنده ٥٧ سنة، لقيته عمال يحوم حواليا، ويقوللي عندي ليكي عريس، وفي الآخر صارحني إنه عاوز يتجوزني...

قالت مدام هاجر:

- أومال أنا أعمل إيه اللي زميلي في المكتب طلب مني يتجوزني عرفي؟

- طب وإيه اللي يزعلكم في كدا؟

قلن في ذهول:

- إزاي يعني؟ إنتي مش شايفها حاجة تزعل؟!

قلت بابتسامه عريضة:

- خلّوني أفكركم بحاجة، مش إحنا قلنا إن كل واحد بيحكم من خلال قناعاته وتفكيره وتربيته؟ حلو جدا.. يبقي نظرته ليكي من خلال دماغه، مش من خلال واقع حقيقي...

هضربلكم مثال...

لو واحد يا عيني ذكاؤه محدود ودماغه على قده، ومقتنع من خلال تربيته إن مثلا أساتذة الجامعة دول حاجة فاشلة...

هو قناعاته كدا، قناعاته إنه راجل كسّيب وبيكسب أكثر من أستاذ الجامعة ألف مرة...

حظ واحد أستاذ الجامعة إنه سكن في نفس عمارة الراجل اللي دماغه على قده...

جُم في مرة طالعين على السلم، قام الراجل العيان في دماغه شاتم أستاذ الجامعة، وقاله يا فاشل يا زبال...

تفتكروا أستاذ الجامعة هينهار ويخش يرمي نفسه على السرير زي فاتن حمامة ويقعد يعيط،

ولا هيصحك ويقول جواه لا حول ولا قوة إلا بالله ربنا يهدي؟

ضحك الجميع...

قالت إحداهن:

- نوقفهم عند حدهم إزاي؟ أنا اتنقلت مرة من شغلي بسبب الحوارات دي مع زمايلي في المكتب.

- خدي بالك إن العين مراية الروح.. أوتوماتيك، لما إنتي تعملي كل حاجة باتجاه ثقتك في نفسك، بداية من احترامك لنفسك وتقديرك ليها، وإنك تمشي صح في اتجاه تخطيطك لمستقبلك، هتلاقي الأذكاء منهم هيخافوا يقربوا..

واللي ذكاءهم محدود هيجربوا يرموا السنارة يمكن تغمز، ودا مش عشان عيب فيكي لأ... عشان هو دماغه إن المطلقة أو المتأخرة في الجواز واقعة من على السطوح... إنتي هتكوني أول نمودج يكسر عنده القاعدة...

اللي هيرمي السنارة هتصديه بابتسامه سمجة، وتعقبها كلمة: «لأ آسفة.. إنت ماتناسبنيش بالمره».. وبمنتهى الثقة ومن غير ما ترغي كثير ولا تدافعي عن نفسك...

هيروح يجري يعيط زي فاتن حمامة.. وهيبقى عبرة لكل من تسول له نفسه ولمن لا يعتبر...

إنما تقعدى تهربي وتنقلي شغلك، والناس تعرف ويعملوا اللي عملوه الأولانيين، وتنقلي شغلك تاني، مش هنخلص...

فيه حاجة كدا بيقولوها الأجانب عن الشخص اللي بيتأثر بأي حاجة.. بيقولوا عليه...

He has thin skin

يعني بلغتنا بيتأثر بكل حاجة...

إحنا اتفقنا بقى.. ريموتك في إيدك.

قالت مدام رشا:

- طيب أنا عندي مشكلة، بس أرجوكي تفهمي موقفي.

نظرت إليها بحنان:

- هتفهم والله، قولي بس.

- أنا لما بشوف ماما وإخواتي البنات ناجحين في بيوتهم، بيدب جوايا الحنين إن نفسي بيقالي بيت وزوج وولاد...

- كنتي عاوزة تتجوزي وتخلي لي؟

- أنا عارفة كل اللي حضرتك هتقوليه، وفاكرة رحلاتنا للماضي، أنا بتكلم عن شعوري بالحنين لكدا، اللي أعتقد إنه شعور فطري.

- فاهماكي، وأرجوكي ردي على سؤالي.

- كان نفسي أخلف ولاد وبطلعوا أحسن مني وأنجح معاهم...

- طيب مامتك طلعتك أحسن منها على فكرة، إنتي وإخواتك، وعائشة لابسة الجلابية الفسكوز وتعمل كل يوم صينية بطاطس باللحمة تحفة...

وأختك الكبيرة هي كمان ورثت الجلابية الفسكوز بس بموديل مختلف، وبدل البطاطس باللحمة بتعمل بيكانا بالمشروم، ودخلت ولادها مدارس لغات، رغم إنها أكيد زي كثير مننا كانت مدارس حكومة...

قوليلي يا روشا، إيه الفرق بين البقال اللي تحت البيت عندكم، والبقال اللي في الشارع اللي وراكم؟!

قالت بتلعثم:

- مش فاهمة السؤال..

- أقصد كل واحد فيهم بيفتح الصبح يرش فيه قصاد المحل، يلم الفلوس،
ويعصرف على ولاده وربنا يكرمه، وبعدين؟!

تفتكري إيه الفرق بينهم وبين كارفور مثلا؟

تفتكري إيه الفكرة في إننا كلنا نعيش نلبس جلابيب فسكوز، ونخلف عيال
ونربيهم ونطلعهم أحسن مننا، ونموت...

هم لا ننكر أبدا عليهم اللي بيعملوه، بس إنتي هتعملي حاجة مختلفة...

هتنجحي جدا فمش هتتجوزي إلا واحد ناجح جدا إن شاء الله، وهتعملي حاجة
مميزة جدا...

ليه آخذ الطريق التقليدي، لما ربنا إداني فرصة آخذ طريق أصعب بس مبهر
أكثر؟

لو عندك طاقة حب ناحية الأطفال، انزلي أقرب دار أيتام واختاري طفل منهم
تعتبره زي إبنك، عدي عليه كل يوم وامسحي على شعره..

وقوليله تعالى نخط هدف سوا، وربيه تربية صح، وادعي ربنا إن الخير اللي
بتعمله معاه يكون حاجة تقربك لربنا، وربنا يقبلها وبوفقك في الطريق اللي
إنتي راسماه...

قالت مدام إيناس:

- أنا بقى مش عارفة أبتدي لحد دلوقتي، كل ما آخذ القرار ألاقي حاجة
بتشدني...

- كنتي مقررة هتبتدي مينين؟

- كنت هقرأ كتب في علم النفس عشان أثقف نفسي.

- بتهرجي يا إيناس! إنتي من ساعتها وإنتي قاعدة؟! عارفة فكرتيني بينا أيام
المدرسة، لما كانت نفسنا تبقى مسدودة من مادة وكل ما نيجي نذاكرها نفتح
الدرس الأول نذاكره وننقل الكتاب...

ونلاقي السنة خلصت وإحنا ماذاكرناش غير الدرس الأول بس...

بالمناسبة دا دليل على إنك مختارة بداية إنتي مش مستعدة ليها نفسيا..
فورا غيري البداية، وماتضيّعيش وقت أكثر من كدا...
ابتسمت قائلة:

- عندك حق، هغير البداية...

قالت مدام هبة إحدى العضوات الجديديات:

- طيب أنا كتبت كل الأسئلة اللي قلتلنا عليها المرة اللي فاتت، ولقيت نفسي
فعلا استنفدت كل السبل، بس أهلي مش موافقين...

- طبعا، ولا هيوافقوا...

- حطوا في اعتباركم أي أهل بيرفضوا إن بنتهم تطلق بيكون لسبيين:

خوف من شيل مسؤوليتها المادية..

خوف من شيل مسؤوليتها المعنوية...

يوم ما تحسي الدنيا قفلت في وشك، وطليقك إنتي عارفة إنه هيشيل إيده،
لازم تعملي خطة للهروب للعظيم...

الأول اعرضي عليه إن طلاقكم يكون محترم..

ماكانش...

تبتدي الأول تشتغلي على نفسك، وتمسكي الخيوط وتحضري قوارب النجاة...

لو قلتيلي: مش سامحلي وقافل الدنيا عليّ خالص...

هقولك ساعتها بس إرمي حمولك على ربنا، ونطي في البحر.. طالما مش
ساييلك شباك مفتوح هتفضلي طول عمرك محلك سر...

لازم وإنتي بتعرضي موضوع الطلاق على أهلك يحسوا إنك فعلا قدها، ومش
هتحمليهم فوق طاقتهم ماديا ومعنويا...

قالت مدام رضوى: أنا عندي سؤال محرج جدا مش عارفه أقوله ازاي!

سألتها: إيه السؤال؟ قولي يا حبيبتني براحتك.

أومأت رأسها بخجل: احنا عندنا احتياجات ربنا خلقنا بيها، ازاي نقدر عادي
نتعايش من غيرها، ودي زيبها زي الأكل والشرب..

- فهمت قصدك.. أولا اسمحيلي أعقب على نقطة إن احتياجاتنا اللي تقصديها زي الأكل والشرب.. لأن الأكل والشرب من غيرهم نموت، إنما احتياجاتنا لاء، عادي ممكن نعيش من غيرها مع شوية صبر وانشغال...

هقولكوا ليه الانشغال؟

مين فينا لما بيبقى سهران بالليل وماورا هوش حاجة يروح يفتح التلاجة عشر مرات؟ إنما لو انتي في الشغل مثلا والدنيا مقلوبه ووراكي حاجات كتير، بتلاقيكي حرفيا عدى اليوم وانتي ماكلتيش ولا حاجة (بالرغم من إننا من غير الأكل بيحصلنا مضاعفات كتير) إلا إننا ما بنحسش بيها، على عكس واحنا فاضيين، لأن الفراغ بيخلي الواحد بيتدي يفكر في شهواته.

يبقى حلك فعلا إنك تشغلي نفسك حتى الثمالة، ما يبقاش عندك وقت لأي حاجة، يومك كله مشغول.

انجحي وافرحي بإنجازاتك، وحطي في اعتبارك زي ما قلنا إنها مجرد متعة من متع الحياة، إنما مش محورها، ولا من غيرها تقف الحياة..

ثم التفثُ إلى باقي العضوات قائلة:

إن شاء الله عاوزين الفترة الجاية ننشر فكرتنا على قد ما نقدر، بإننا نعمل ندوات وننزل بوستات على صفحاتنا على الفيس بوك...

نتكلم مع قرايبنا وكل اللي حوالينا...

عاوزين نركز بجد مع ولادنا، ومانفوتش ولا يوم من أيام التربية، عشان نستفيد من آراء المتخصصين...

الخاتمة

«إياك أن تقول لا أستطيع، ولكن قل لا أريد، لأنك لو أردت فعلا أن تحقق أمرا فستحققه، فكلنا نستطيع ولكن لسنا كلنا نريد»

د. إبراهيم الفقي

وبعد ٣٠ سنة...

في منزل مدام نجلاء...

- إيه اللي حصل بس يا زياد يا ابني بينك وبين مراتك رقية؟

- خلاص يا ماما الموضوع وصل بيننا لطريق مسدود، ولو كملنا أكثر من كذا مع بعض هنخسر وقت، وأنا مايرضينيش لا هي تخسر ولا أنا أخسر...

- طيب وولادك؟

- هأخذ شقة جنبهم، واتفقنا نقسم المهام بيننا فيما يخص الأولاد، زي ما كنا متجوزين بالطبط، وطبعاً مادياً أنا هشىل كل حاجة...

- طيب مراتك مَرَضِيَّة يا ابني؟!

- آه والله يا ماما مفيش أي مشكلة، واتفقنا كل واحد فينا بعد الطلاق حر تماماً في اختياراته، حتى لو حب يخوض تجربة ثانية عادي، وهنشوف ساعتها مصلحة الأولاد هتكون مع مين فينا... هنقعد ونتكلم ونتشاور.

أما سالي...

- حبيبي، وَصِّلْ أختك للدكتور عشان تعبانة أوي.

- يا نهار أبيض، ليه بس يا ماما ماتقوليليش إنها تعبانة؟!

- والله تعبت فجأة بالليل.

- خلاص يا ماما هوديها للدكتور حاضر، وهروح معاها البيت أظبطلها الشقة وأروقها لها، عشان جوزها في الجيش أنا عارف وهي تعبانة...

وبعدين هي عمرها ما قصرت معايا ولا مع مراتي، لسه مراتي كانت تعبانة الأسبوع اللي فات وحت ساعدتنا في شغل البيت والله، وظبطت معانا الدنيا... عارفة لولاش مراتي لسه تعبانة هي كمان كانت جت معايا.

- ربنا يخليكم لبعض يا حبيبي.

أما مريم ابنة هيام...

- ماما أنا مش بفكر في الجواز دلوقتي خالص...

- يا حبيبي براحتك، ابن طنط هاجر راجل محترم، قلت أما أعرض عليك الموضوع... أنا مِدِّيَاكِي فرصة الاختيار ومش عاوزاكي تتمحوري حوالين دراستك وشغلك.. وكلمتك في الموضوع دا قبل كدا...

- قالت مريم بعد تفكير عميق... خلاص يا ماما موافقة، هقابله وهشوف يمكن فعلاً يكون طموحنا مشترك...

- طيب تمام، هحدد معاد وربنا يكتب اللي فيه الخير.

وفي منزل مدام ناريمان...

- ماقلتيليش رأيك يا ماما.

نظرت إليه بتعجب:

- رأيي في إيه يا واد؟ مش لما تكلمّي مواصفات العروسة وأسباب اقتناعك بيها!

- ما أنا بقولك أهو، هي حد محترم وناجح بشكل لا تتخيليه، أكثر واحدة ناجحة في الشركة، وجميلة جدا، ومعها ولد زي العسل...

- اللي يهمني إنت متفق معاها نفسيا وحاسس إن فيه بينكم أراضى مشتركة وأحلام وأهداف هتحققوها مع بعض وتفاهم؟

- آه يا ست الكل، مش ناقص غير بس رضاكي عني، وإنك تيجي معايا.

- ماشي يا حبيبي، حدد معاد مع أهلها وربنا يتملكم على خير يا رب.
وفي منزلي...

خلاص يا طنط مها مش قادرة أستحمل، أنا وحمزة وصلنا لطريق مسدود...

- هدي نفسك بس يا حبيبتى، وكل حاجة هنلاقيها حل.. أنا عاوزه أعرف إيه اللي مزعلك...

- اتفق معايا يساعديني في رسالة الدكتوراه بتاعتى، ويقاله أسبوعين مش في دماغه، واتعطلت فعلا...

- إمام.. طيب وحاولتى تتكلمى معاها وتفهمى منه السبب...

- ما عندوش وقت، أصله مشغول هو كمان في الرسالة بتاعته، بس أنا بساعده رغم اللي ورايا...

- طب حاولتم تشتركوا في وضع جدول إنتم الاتنين تقسموا فيه الوقت...

- تصدقي يا طنط ما عرضتش عليه الفكرة دي... أو بمعنى أصح ماجتش في بالي أصلا...

ثم قالت وهي تنظر في خجل:

- أصلى عكيت الدنيا واتخانقت معاها امبارح.

ضحكت بشدة..

- نكدتم على بعض.

ابتسمت بخجل:

- لأ أنا اللي نكدت.

نظرت في الساعة:

- عموما هو اتصل بيا زمانه جاي في الطريق... ماتقلقيش هصالحكم على بعض.

قالت وهي تنظر حولها:

- أومال فاطمة فين؟!

- فاطمة يا ستي سافرت مؤتمر في إسبانيا تبع الشغل.

- جوزها سافر معاها؟

- آه... دا هو اللي ساعدها في ترتيب كل حاجة، كانت محتاسة على الآخر.

- يلا ترجع بالسلامة إن شاء الله يا طنط مها.

وبعدها بدقائق.. دخل حمزة...

- مالك داخل واخذ في وشك ومكشر ليه؟

نظر لزوجته جودي ثم قال:

- مافيش يا ماما.

- يلا يا جودي عشان نلحق نروح مشوار كدا.

- استنوا هنا إنتم مش هتتغدوا معايا؟!

- لأ ما أنا عازم جودي برة على الغدا، عشان عملت جدول كدا هعرضه عليها.

غمزت لها بعيني...

- أنا مش فاهمة طبعاً جدول إيه بس ماشي.. طيب لما تفضوا إبقوا عدّوا عليا

تتغدى سوا أي يوم...

- ما تيجي معانا يا ماما بجد...

- لأ يا حبيبي أنا هاخذ الدوا وهريح شوية، عشان أخوك صهيب هيطلبنى من

أمريكا هيطمّني على مراته، بتولد النهارده.

قال حمزة في فرح:

- ياه، ربنا يطمّنا عليها.

لملمت جودي أشياء ابنهما سريعا.. انحنى حمزه وحمل الحقائب، ومن ثم

حمل ابنه وقال وهو يغلق الباب:

- سلام يا ماما.

دخلت إلى سريري وتناولت المسكن ونمت في سبات عميق...

فلم أشعر بكل هذا الارتياح من قبل...

لما اتطلقت حظيت مجموعة أهداف... أولها إني أنجح.. وبعدين إننا نساعد بعض كلنا إننا ننجح...

الكتاب إهداء لبنات جيلي من المطلقات والأرامل، وحتى المتزوجات وغير المتزوجات...

إهداء لجيل المستقبل اللي أتمنى نربيهم صح عشان مايعانوش من اللي عانينا منه...

الجواز مش خناقة.. الجواز شركة قابلة للنجاح وقابلة للفشل...

كانت معكم مها سامي القاطنة بعمارة طنط جولفدان...

شكرًا...

الشكر دا بقى، اسمحولي هقف عنده شوية، وكل كلمة فيه مش أفورة مني والله ولا حاجة، ولكن لازم تعرفو القصة من أولها..

أولا صديقتي ريهام حسن..

أنا جتلي فكرة الكتاب من سنتين ونص وقلت لريهام، ونسيت الموضوع أصلا.. لكن الغريب إن هي مانسيتش، بقت أجاكركم الله بمعدل كل كام يوم تسألني فين الكتاب؟

لدرجة فكرت أعملها بلوك عشان أخلص منها، ولكن قلبي رهيف ويحبها، فاستحملت مطاردتها زي الديانة وأمري إلى الله..

لحد ما في يوم قالتلي هتكتبي الكتاب ومفيش رجعة، وكانت كل ما أكتب حته عشان تحل عن سمايه؛ ألقبها تبعثلي بالليل فين الباقي!

وياريت بس على كده، كانت بترخم عليا رخامة السنين والتنين، وتحفل عليا في أي حاجة ماتعجبهاش!!

هقولكوا سر: كانت أرخم قارئ موجود في الوجود!

لكن بصراحة، استحملت اللي مفيش حد يستحمله، وخصوصا اتصالي الساعه ثلاثة الفجر لما تطق في دماغى أي فكرة.. باموت فيها، حد مبيتكررش كثير.

الشكر اللي بعده لا يقل أهمية عن الشكر اللي قبله، وهو شكري لأستاذي الكاتب الساخر والاستشاري الأسري إيهاب معوض، اللي وقف معايا في كل خطوات الكتاب، من قبل حتى ما يتكتب، وكان دايمًا بيوجهني صح، وأحلى

حاجة المقدمة التحفة اللي كتبها لي وبعتهالي مفاجأة، وكانت شهادة منه أعتز
بيها بجد، ومت طبعا من الضحك لأنني ادبته ألف جنيه مش خمسمية، بس هو
أنكر الباقي، ههههههههه (بهزر طبعا).

الشكر الأكبر لأستاذي الفاضل أحمد عبد المجيد، إيديتور كتابي، اللي كان فعلا
كل نقده بناء وآراؤه كانت كلها سديدة، أنا فعلا بشكره وبشدة.

∞ ∞ ∞ ∞ ∞

(تم الكتاب بحمد الله وتوفيقه)

∞ ∞ ∞ ∞ ∞



متميزون للكتب النصية



لينك الانضمام الى الجروب - Group Link

لينك القناة - Link

رس المحتويات

عن الكتاب..

إهداء..

تقديم..

المقدمة

البداية

الفصل الأول: وشوشة أم أحمد

الفصل الثاني: المشكله الأولى: المجتمع

الفصل الثالث: المشكله الثانية: الدعم المادي

الفصل الرابع: المشكله الثالثة: البحث عن السند والأمان_والدعم العاطفي

هيببيج

الفصل الخامس: المشكله الرابعة: الأبناء بعد الانفصال...

الفصل السادس: باما في الجمعية مظالم

الفصل السابع: بداية الحلول العملية في الجمعية

الفصل الثامن: بين الماضي والحاضر..

الفصل التاسع: أهلا بمستقبل مشرق

الفصل العاشر: مشوار تغيير المجتمع دائما يبدأ بخطوة

الفصل الحادي عشر: هنخلي الحلم حقيقة